

प्रेरितन क काम

लूका क लिखी भइ दूसर किताबे क जानकारी

1 हे थियुफिलस, मई आपन पहिली किताबे में ओन सबइ कामे क बारे में लिखेउँ ह जेका सुरु स ईसू किहेस ह अउर 2उ दिना तलक उ प्रेरितन क जेनका उ चुनेस जब ताई उ पवित्तर आतिमा क आदेस क अनुसार उ सरगे में ऊपर नाहीं उठाइ लीन्ह गवा। 3आपन मउत क पाछे उ आपन क ठोस प्रमाण लइ के ओनके समन्वा परगट भवा कि उ जिअत बा। उ चालीस दिना तलक ओनके अगवा परगट होत रहा अउर परमेस्सर क राज्य क बारे में ओनका बतावत रहा।

4फिन एक दाई ओनके संग खइया क खात रहा तउ उ ओनका हुकुम दिहेस, “यरूसलेम क जिन तजा अउर मुला जेकरे बारे में तोसे कह्यो कि, परमपिता क सपथ पूरा होइ तलक जोहत रहा। 5काहेकि यूहन्ना तउ पानी स बपतिस्मा दिहेस, मुला अब तनिक दिना क पाछे पवित्तर आतिमा स बपतिस्मा दीन्ह जाइ।”

ईसू क सरगे में लइ जावा जाब

6तउ जब उ प्रेरितन आपुस में भेंटेन, उ पचे पूछेन, “पभू! का तू इहइ समइ प इस्राएल क राज्य क फिनस लिआइ देब्या?”

7उ ओनसे कहेस, “उ बेलन या तिथियन क जानब तोहार काम नाहीं, जेका परमपिता खुद आपन अधिकार स तय किहे अहइ। 8मुला जब पवित्तर आतिमा तोह प आइ, तोहका सक्ती मिलि जाइ। अउर यरूसलेम में, समूचइ यहूदिया अउर सामरिया में अउर धरती क छोर तलक तू पचे मोर साच्छी होब्या।”

9एतना कहे क पाछे ओनकइ लखत लखत ओका सरगे में ऊपर उठाइ लीन्ह गवा अउर फिन एक बादर ओका आँखी स ओझल कइ दिहेस। 10जब उ जात रहा तउ पचे आँखी पसारि के ओका निहारत रहेन। तबहिं फउरन सफेद कपड़ा पहिरिके दुइ मनई ओकरे समन्वा आइके ठाड़ भएन।

11अउर बोलेन, “अरे गलीली मनइयो। तू पचे हुवाँ ठाड़ भवा टकटकी काहे लगाए बाट्या? इ ईसू तोहरे बीच स सरगे में ऊपर उठाइ लीन्ह गवा, जइसे तू ओका सरगे में जात देख्या, वइसे ही उ फिन वापिस लौटि आई।”

एक नवा प्रेरित क चुनाव

12फिन उ प्रेरितन जैतून नाउँ क पर्वत स, यरूसलेम लौटि आएन जउन यरूसलेम स कउनो एक किलोमीटर दूर रहा। 13अउर हुवाँ पहुँचिके ऊपर क उ कमरा में गएन जहाँ उ पचे ठहरा रहेन। इ पचे रहेन-पतरस, यूहन्ना,

याकूब, अन्द्रियास, फिलिप्पुस, थोमा, बरतुलमै अउर मती, हलफई क बेटवा याकूब, समौन जेलोतेस अउर याकूब क बेटवा यहूदा।

14एँके संग कछू स्त्रियन, ईसू क महतारी मरियम अउर ईसू क भाई भी रहेन। इ सबइ आपन क एक संग पराथना में चित लगाए राखत रहेन।

15फिन इ दिनन में पतरस भाई-बन्द क बीच खड़ा होइके, जेकर गनती कउनो एक सउ बीस रही, कहेस,

16“मोरे भाइयो, ईसू क गिरफतार करावइ वाले मनइयन क अगुआ यहूदा क बारे में, पवित्तर सास्तर कउ लेख जेका दाऊद आपन मुँहे स पवित्तर आतिमा बहोत पहिले ही कहे रही, ओकर पूरा होब जरूरी रहा। 17उ हम पचन में गना गवा रहा अउर इ सेवा में ओकर हाथ रहा।”

18(इ मनई जउन धन ओका ओकरे नीचपना क कामे बरे मिला रहा, उ धने स एक ठु खेत मोल लिहेस मुला उ पहिले तउ मूँडे क बल भहरान अउर फिन बदन फाटि गवा अउर ओकर अँतड़ी बाहेर निकरि आइ। 19अउर सबइ यरूसलेम क बसइयन क एकर पता लग गवा। यह बरे ओनकइ भाखा में उ खेत क हक्लदमा कहा गवा जेकर अरथ अहइ “लहू क खेत।”)

20पतरस कहेस, “काहेकि भजन संहिता में इ लिखा बा, ‘ओकर घर उजरि जाइ अउर ओहमाँ रहइ क कउनो नाँ बचइ।’

भजन संहिता 69:25

अउर, ‘ओकर मुखियई कउनो दूसर मनई लइ लेइ।’

भजन संहिता 109:8

21-22यह बरे इ जरूरी अहइ कि जब पभू ईसू हमरे बीच रहा तउ जउन मनइयन हमरे संग सदा रहेन, ओहमाँ स कउनो एक क चुना जाए। कहइ क मतलब उ समइ स लइके जब स यूहन्ना मनइयन क बपतिस्मा देब सरु किहेस अउर जब तलक ईसू क हमरे बीच स उठइ लीन्ह गवा रहा। इ मनइयन में स कउनो एक क ओकरे फिन स जी उठइ क महेरे संग साच्छी होइ चाही।”

23यह बरे उ पचे दुइ मनई न नाउँ दिहेन। एक यूसुफ जेका बरसबा कहा जात रहा। (यूसुतुस नाउँ स जाना जात रहा) अउर दूसर मत्तियाह। 24फिन उ पचे इ कहत भवा पराथना करइ लागेन, “पभू! तू सबहि क मनवा क जानत ह, हमका बतावा कि इ दुइनउँ में स तू केका चुन्या ह। 25जउन एक प्रेरित क तरह सेवा करइ बरे इ ओहदा क लइ लेई जेका आपन ठउर पर जाइ बरे ओहदा छोड़िके चला गवा रहा!” 26फिन उ पचे एकरे बरे पर्ची नाएन अउर

पर्ची मलियाह क नाउँ क निकरी। इ तरह गियारह प्रेरितन* क दल में गना गवा।

पवित्तर आतिमा क अवाई

2 जब फिन्तेकुस्त क दिन आवा तउ उ पचे एक ठउर प बटुरा रहेन। 2तबबइ हुवाँ एकाएक आकासे स खउफनाक आँधी क सब्द आवा। अउर जउन घरे में उ पचे बइठा रहेन, ओहमाँ समाइ गवा। 3अउर आगी क उठत लपट जइसी जीभ हुँवा समन्वा देखौइ देइ लाग। अउर ओनका आगी क उठत लपट जइसी जिभिया देखौइ लागिन। उ सबइ बँटी भइ जीभ एक क ऊपर आइ ठहरिन। 4उ पचे पवित्तर आतिमा स भावित भएन। अउर आतिमा स दीन्ह गए सामर्थ क अनुसार उ सबइ दूसर भाखन में बोलइ लागेन।

5हुवाँ यरूसलेम में अकास क तरे सबहिं देसन स आवा भएन यहूदी भगत रहत रहेन। 6जबहिं इ सब्द क आवाज सुनि गई तैसहिं एक भीड़ बटुर गइ। उ पचे अचरज में पड़ा रहेन काहेकि हर कउनो ओनका आपन भाखा में बोलत सुनेस। 7उ पचे अचम्भा में घबड़ियाइके बोलें, “इ सबइ बोलवइया मनइयन गलीली नाहीं अहईं! 8फिन हम पचन में स हर कउनो ओनका आपन मातृभाखा में बोलत भवा कइसे सनत अहइ? 9हुवाँ पारथी, मोदी अउर एलामी, मोसोपोटामिया क बसइया, यहूदिया अउर कप्पूदूकिया, पुन्तुस अउर एसिया। 10फ्रूगिया अउर पंफलिया, मिस्र अउर कूरेने सहर क निअरे लिबिया क कछू पहँटा क मनइयन, रोम स आवा भएन सैलानी, 11जेहमाँ जन्मा भवा यहूदी अउर यहूदी धरम क मनइयन, क्रेती अउर अरबी लोग हम सबइ परमेस्सर क अचरज कारजन क आपन आपन भाखा में सुनत अहईं। 12उ पचे सबइ अचम्भा में पड़िके भउचक्का होइके आपुस में पूछइ लागेन, “इ का होत अहइ?” 13मुला दूसर मनइयन प्रेरितन क मसखरी करत भए बोलें, “इ सबइ कछू जिआदा दाखरस पिए बाटेन।”

पतरस क गोहराउब

14फिन गियारह प्रेरितन क संग पतरस खड़ा भवा अउर ऊँची अवाज में मनइयन क गोहराइ क कहइ लाग, “यहूदी भाइयो अउर यरूसलेम क सबहिं बासिंदा, एँकर अरथ मोका बतावइ द्या। मोरे बचन क धियान स सुना। 15इ पचे पिए नाहीं अहईं, जइसा की तू पचे बूझत अहा। काहेकि अबहिं तउ भिन्सारे क नौ बजा अहइ। 16मुला इ बात अहइ जेकरे बारे में योएल नबी कहे रहा:

17“परमेस्सर कहत ह:

आखिरी दिना में अइसा होइ कि मई सबहिं मनइयन प अपने आतिमा उडेल देब फिन तोहार पूत अउर बिटिया भविस्सबाणी करइ लगीहीं। अउर तोहार जवान मनई दर्सन पइहीं अउर तोहार बुढ़वा लोग सपना देखिहीं।

18हौं उ दिना मई आपन नउकर अउर नउकरानी प आपन आतिमा उडेर देब अउर उ पचे भविस्सबाणी करिहीं।

19मई ऊपर अकासे में अचरज कारजन अउर तरखाले भुइयाँ प चीन्हा देखाउब, खून, आगी अउर धुआँ क बादर।

20सूरज अँधियारा में अउर चाँद रक्त में बदल जाइ, अउर जब पभू क दिव्य अउर महान दिन आइ।

21अउर तब हर उ कउनो क बचाव होइ जउन पभू क नाउँ पुकारी।’
योएल 2:28-32

22“ओ इस्त्राएलियो! इ बचन क सुना: नासरी ईसू एक ठू अइसा मनई रहा जेका परमेस्सर तोहरे समन्वा अद्भुत कारज, अचरज कारजन अउर अद्भुत चीन्हन क साथ जेका परमेस्सर आपन खुद किहे रहा तोहरे बीच ओका परगट किहेस। जइसा कि तू खुद जानत ह। 23ई मनई तोहका कउनो तय कीन्ह भइ योजना अउर पहिले क गियान क अनुसार तोहरे हवाले कीन्ह गवा रहा अउर तू पचे ओका अधर्मियन क हाथे पकड़वाइके क्रूस प चढ़वाया अउर खीला ठोंकवाइके मरवाइ दिहा। 24मुला परमेस्सर मउत क दुःखे स अजाद कराइके फिन जिआइ दिहेस। काहेकि ओकरे बरे इ होइवाला नाहीं रहा कि मउत ओका राखि पावत। 25जइसा कि दाऊद ओकरे बारे में कहेस ह:

‘मई हमेसा पभू क आपन समन्वा देखेउँ ह। उ मोरे दाहिन कइँती बिराजत अहइ, काहेकि मई दुग न पावउँ।

26एँहसे मोर हिरदय खुस अहइ अउर मोर बाणी आनन्द में बा; मोर देह भी आसा में जिई।

27तू मोर आतिमा क अधोलोक में न छोड़व्या। तू आपन पवित्तर जन क नास क अनुभव न होइ देव्या।

28तू ही मोरी जिन्नगी क राह क गियान कराइ दिहा ह। अउर तू ही आपन हाजिरी स मोका आनन्द स पूरा कइ देव्या।’
भजन संहिता 16:8-11

29“मोरे भाइयन, मई पतिआइके आदि मनई दाऊद क बारे में तू पचन्स कहि सकत हउँ कि ओकर मउत होइ गइ अउर ओका माटी दइ दीन्ह गइ। अउर ओकर कब्र हमरे हियाँ आजु तलक मौजूद बा। 30मुला काहेकि उ एक नबी रहा अउर जानत रहा परमेस्सर सपथ खाइके ओका बचन दिहेस ह कि उ ओकरे वंस में स कउनो एक क सिंहासने प बइठाई। 31यह बरे अगवा जउन होइ क बाटइ, ओका दाऊद लखत भए उ सब इ कहे रहा कि:

‘ओका अधोलोक में नाहीं छोरा गवा अउर न ही

ओकरे देह स सड़ब गलब क अंजाद लगाएस।’

तउ उ मसीह क पुनरुत्थान क बारे में ही कहे रहा। 32इहइ ईसू क परमेस्सर पुनरुत्थान कइ दिहेस। इ सच्चाई क हम पचे साच्छी अही। 33परमेस्सर क दाहिन हाथे कइँती सबन ते उँचका ओहदा पाइके ईसू पिता स सपथ क अनुसार पवित्तर आतिमा पाएस अउर फिन उ इ आतिमा क उडेरस जेका अब तू लखत बाट्या अउर सुनत बाट्या। 34दाऊद सरगे में नाहीं गवा तउ उ खुद कहत ह:

‘पभू (परमेस्सर) मोर पभू स कहेस: मोरे दाहिने बइठा, जब ताई मई

35तोहरे बैरिन क तोहरे गोड़वा तरे गोड़ धरइ क चउकी न बनइ देइ।’
भजन संहिता 110:1

36“यह बरे इस्त्राएल क समूचइ मनइयन ठीक तरह स समुझ लेइ कि परमेस्सर इ ईसू क जेका तू पचे क्रूस प चढ़ाइ दिहे रहा, पर्भू अउर मसीह दुइनउँ ठहरावा ग रहें!”

37मनइयन जब इ सुनेन तउ उ पचे घबराइ गएन अउर पतरस अउर दूसर प्रेरितन स कहेन, “तउ भाई, हम सबन क का करइ चाही?”

38पतरस ओनसे कहेस, “मनफिराओ अउर आपन पापे क छमा पावइ बरे तू पचन में स हर एक क ईसू मसीह क नाउँ स बपतिस्मा लेइ चाही। फिन तू पवित्तर आत्मा क उपहार में पउब्या। 39काहेकि इ सपथ तोहरे बरे, तोहरे संतान बरे अउर ओन सब कामे बरे अहइ जउन बहोत दूर बाटेन। इ सपथ ओन सब बरे अहइ जेनका हमार पर्भू परमेस्सर आपन लगे बोलावत ह।”

40अउर बहोत स बचन स उ ओनका चिताउनी दिहेस अउर समझाय के ओनसे कहेस, “इ कुमार्गी पीढ़ी स आपन खुद क बचावा!” 41तउ जउन ओकरे संदेसा क अंगीकार किहेन, ओनका बपतिस्मा दीन्ह गवा। इ तरह उ दिना उ बिसवासियन क झुण्ड में कउनो तीनजहार मनई अउर जुड़ गएन।

बिसवासी क मिली जुली जिन्गी

42उ पचे प्रेरितन क उपदेस, संगत, रोटी क तोड़इ अउर पराथना करइ में जिअरा लगाइ दिहन। 43हर मनई प भय रहा अउर प्रेरितन क जरिये बहुत अचरज कारजन अउर अदभुत चीन्हन परगट कीन्ह जात रहेन। 44सबहिं बिसवासी एक संग बटुरत रहेन अउर ओनके लगे जउन कछू रहा, उ पचे आपुस में बाँट लेत रहेन। 45उ पचे आपन सबहिं चीजन अउर धन-दौलत बेचेन अउर ओन सब चिजन्क आपुस में बाँटि लिहन, जइसे जेका जरूरत रही। 46अउर उ पचे हर दिन मन्दिर में एक उदेस स मिलि जात रहेन। उ पचे घरे में रोटी तोड़ लेतेन अउर आनन्द अउर निर्मल मन स खात रहेन। 47उ पचे सब मनइयन क नीक बिचार क आनन्द लेत भए पर्भू क स्तुति गवात रहेन। अउर हर दिन परमेस्सर, जेनकइ उद्धार करत, ओनकइ दल में अउर जोरि दीन्ह जात।

लँगड़ा भिखारी क चंगा कीन्ह जाब

3 दुपहरिया क बाद तीन बजे पराथना क समइ पतरस अउर यूहन्ना मन्दिर जात रहेन। 2तबहिं एक ठु अइसा मनई जउन जन्म स ही लँगड़ा रहा, लइ जावा जात रहा। उ पचे हर दिना ओका मन्दिर क सुन्नर नाउँ क फाटक प बइठाइ देत रहेन। काहेकि उ मन्दिर में जाइवाला मनइयन स पइसा माँग सकइ। 3ई मनई ने जब देखा यूहन्ना अउर पतरस मन्दिर में प्रवेस करयवाला अहइँ तउ ओनसे पइसा मांगेस। 4यूहन्ना क संग पतरस ओकरी कइँती लखत भए बोलें, “हमरी कइँती लखा।” 5तउ उ ओनसे कछू मिल जाइ क आसा करत भवा ओनकर कइँती लखेस। 6मुला पतरस कहेस, “मोरे लगे सोना या चाँदी तउ अहइ नाहीं मुला जउन कछू अहइ, मईँ तोहका देत हउँ। नासरी ईसू मसीह क नाउँ स ठाइ हवा अउर चला।” 7फिन ओकर

दाहिन हथवा धइके ओका उठाएस, फउरन ओकरे गोड़वा अउर अखनी में जान आइ गइ। 8अउर उ फिन आपन गोड़वा क बल उछारा अउर चल दिहस। उ उछरत कूदत चलत अउर परमेस्सर क स्तुति गावत ओनकइ संग मन्दिर में घुसा। 9सबहिं मनइयन ओका चलत अउर परमेस्सर क स्तुति गावत लखेन। 10पहिचानेन कि इ उहइ अहइ जउन मन्दिर क सुन्नर दुआरे प बइठा भीख माँगत रहा। ओकरे संग जउन कछू भवा रहा ओह पइ उ पचे अचरज स भरि अउर चकित होइ गएन।

पतरस क प्रबचन

11उ मनई अबहिं पतरस अउर यूहन्ना क संग रहा। तउ सबहिं मनई अचम्भा में पड़िके उ ठउर प ओकरे लगे दउड़त दउड़त आएन जउन सुलैमान क ड्यौदी कहवावत रहा। 12पतरस जब इ लखेस तउ उ मनइयन स बोला, “हे इस्त्राएल क मनइयन, तू पचे इ बाते प चकित काहे होत बाट्या? अइसे घूरि घूरिके हमका काहे लखत बाट्या, जइसे मान ल्या हम ही आपन सक्ती या बल प इ मनई क चलइ फिरइ जोगग बनइ दीन्ह ह। 13इब्राहीम, इसहाक अउर याकूब क परमेस्सर, हमरे पूर्वजन क परमेस्सर आपन सेवक ईसू क महिमा स बखानेस। अउर तू पचे ओका मरवावइ बरे धरवाइ दिहा। अउर फिन पिलातुस क जरिए ओका छोर दिहे जाए क जिअरा में ठान लेइ स पिलातुस क समन्वा तू पचे ओका मानइ स इनकार कइ दिहा। 14ईसू पवित्तर अउर भोला रहा मुला तू ओका मान्या नाहीं अउर माँग्या कि एक हत्तियारा क तोहरे बरे छोर दीन्ह जाइ। 15जो मनइयन क जिन्गी देत रहा ओका तू मारि डया मुला परमेस्सर मरा भवा में स ओका पुनर्जीवन दिहस। हम ँकर साच्छी अही। 16इ ईसू क सक्ती रही जउन इ लँगड़ा क चंगा किहेस। इ भवा काहेकि हम ईसू क सक्ती में पतिआइत ह। तू पचे इ मनई क लख सकत ह अउर तू सबइ ओका जानत ह। उ पूरी तरह स चंगा होइ गवा काहेकि उ ईसू में ओकर बिसवास रहा। तू पचे निहरया कि इ सब कछू भवा।

17“हे भाइयो, अब मईँ जानत हउँ कि जइसे अग्याने में तू सबइ वइसा ही किहा, वइसा ही तोहार ही नेतन किहेन। 18परमेस्सर आपन सबहिं नबियन क मुँहना स बकरवाइ दिहेस कि ओकरे मसीह क दुःख भोगे पड़ी। उ इ तरह पूरा किहेस। 19यह बरे तू आपन मनफिरावा अउर परमेस्सर कइँती फिरि आवा काहेकि तोहार पाप धोइ दीन्ह जाँइ। 20जेसे पर्भू क हाजिर होइ क समइ आत्मा क सान्ति क समइ आइ जाइ अउर पर्भू तोहरे बरे मसीह क पठवइ जेका उ तोहरे बरे चुन लिहे बा, कहइ क अरथ ईसू मसी। 21मसीह क उ समइ तलक सरगा में रहइ क होइ जब ताई सबहिं बातन पहिले जइसी न होइ जेनके बारे में बहोत पहिले ही परमेस्सर पवित्तर नबियन क मुँहना स बताइ दिहे रहा। 22मूसा कहे रहा, ‘पर्भू परमेस्सर तोहरे बरे, तोहरे आपन लोगन में स ही एक मोरे जइसा नबी खड़ा करी। उ तू पचन स जउन कछू कहइ, तू पचे उहइ प चल्या। 23अउर जउन मनई उ, इ नबी क बात न सुनी, मनइयन में स ओका परमेस्सर क मनइयन स अलग कर दीन्ह

जाइ।* 24समूएल अउर ओकरे पाछे आए भए सबहि नबियन जब कबहुँ कछू कहने तउ एनही दिनन क एलान किहेन। 25अउ तू सबइ तउ ओन नबियन अउर उ करार क उत्तराधिकारी अहा जेका परमेस्सर तोहरे पूर्वजन क संग किहे रहा। उ इब्राहीम स कहे रहा, 'तोहरे सन्ताने स धरती क सभी रास्ट्र क मनइयन आसीबादि पइहीं।'* 26परमेस्सर जब आपन सेवक क पुनर्जीवित किहेस तउ पहिले पहिले उ तोहरे लगे पठएस काहेकि तू पचन्क तोहरे बुरे राहे स दूर कइके आसीबादि देइ।"

पतरस अउर यूहन्ना यहूदी सभा क समन्वा

4 अबहिं पतरस अउर यूहन्ना मनइयन स बतियात रहेन कि याजक, मन्दिर क सिपाहियन क मुखिया अउर कछू सदूकीयन ओनकइ लगे आएन। 2उ पचे ओनसे इ बाते प भिनका रहेन कि पतरस अउर यूहन्ना उपदेस देत भए ईसू क मरे हुएन में स जी उठइ क जरिए पुनरुत्थान क प्रचार करत रहेन। 3तउ उ पचे ओका बन्दी बनइ लिहेन अउर काहेकि उ समइ साँझ होइ ग रही, ऐह बरे दूसर दिना हौलात में राखेन। 4मुला उ पचे उ संदेसा सुनेन कि ओनमाँ स बहोतन ओह प बिसवास अउर इ तरह ओनकइ गनती पाँच हजार ताई पहेंच गइ।

5दूसरे दिन यहूदी नेतन बुजुर्ग यहूदी नेतन अउर धरम सास्तिरियन यरूसलेम में बटुरेन। 6महायाजक हन्ना, काइफा, यूहन्ना, सिकन्दर अउर महायाजक क परिवारे क सबहिं मनई भी हुवाँ हाजिर रहेन। 7उ सबइ इ प्रेरितन क आपन समन्वा खड़ा कइके पूछइ लागेन, "तू पचे कउने सक्ती या अधिकार स इ काम किहे ह?"

8फिन पवित्तर आतिमा* क सवार होए स पतरस ओनसे कहेस, "हे मनइयन क नेतन अउर बुजुर्ग नेतन। 9जदि आजु हमसे एक बीमार मनई क संग कीन्ह भलाई क बारे में इ पूछब पछोरब होत अहइ कि उ नीक कइसे होइ गवा। 10तउ तू सबन्क अउर इस्त्राएल क मनइयन क इ पता होइ जाइ चाही कि इ काम नासरी ईसू मसीह क नाउँ स भवा ह जेका तू पचे क्रूस प चढ़ाइ दिहा ह जेका परमेस्सर मरि जाए प पुनर्जीवित कइ दिहस ह। उहइ क जरिए पूरी तरह स नीक भवा इ मनई तोहरे समन्वा ठाइ बा। 11इ ईसू उहइ

'पाथर अहइ जेका तू सबइ राजमिस्तीर लोग तुच्छ जान्या रहा, उहइ बहोत खास पाथर बन गवा अहइ।'

भजन संहिता 118:22

12कउनो दूसर स उद्धार नाहीं अहइ, संसारे में अउर दूसर नाउँ नाहीं अहइ जेहसे मानव जाति बचाई जाय सकइ। हम सब ईसू स ही उद्धार पाउब।"

13उ पचे जब पतरस अउर यूहन्ना क निडर होब निहारेन अउर इ समुझेन कि पतरस अउर यूहन्ना अनपढ़ अउर

साधारण मनइ रहेन तउ ओनका बहोत अचरज भवा। फिन उ पचे जान गएन कि इ सबइ ईसू क संग रहि चुका बाटेन। 14अउर काहेकि उ पचे उ मनई क जउन चंगा भ रहा, ओनकइ संग खड़ा भवा लखत रहेन। तउ ओनकइ लगे तनिकउ बोलइ क कछू नाहीं रहा। 15उ पचे ओनसे यहूदी महासभा स निकर जाइ क कहने अउर फिन उ सबइ इ कहत भए आपुस में बिचार करइ लागेन कि 16'इ पचन्क संग कइसा बिबहार कीन्ह जाइ? काहेकि यरूसलेम में बसइया हर कउनो जानत ह कि एँके जरिये एक तु अचरज क काम कीन्ह गवा ह अउर हम ओका मना नाहीं कइ सकित। 17मुला हम एँका चिताउनी दइ देइ कि उ सबइ इ नाउँ क बात कउनो अउर मनई स जिन करई काहेकि मनइयन म इ बात क संचरइ क अउर फैलि जाइ स रोक जाइ सकइ।"

18तउ पचे ओनका भीतर बोलाएन अउर हुकुम दिहेन कि उ पचे ईसू क नाउँ पन तउ कउनो स कछू बात करई अउर न ही उपदेस देई। 19मुला पतरस अउर यूहन्ना ओनका जवाब दिहेन, "तू पचे ही फरियावा, क परमेस्सर क समन्वा हमरे बरे इ नीक होइ कि परमेस्सर न सुनिके हम तोहार सुनी? 20हम, जउन कछू हम पचे लखा ह अउर सुना ह, ओका कहे क आलावा अउर कछू नाहिं कर सकित।"

21-22फिन उ पचे ओनका धमकाए क पाछे छोड़ दिहेन। ओनका सजा देइ क कउनो रस्ता नाहीं मिलि सका काहेकि जउन कछू भवा रहा, ओकरे बरे सबहिं मनइयन परमेस्सर क स्तुति करत रहेन। जउने मनई क नीक करइ क इ काम कीन्ह गवा रहा, ओकर उमिर चालीस बरिस स जिआदा रही।

पतरस अउर यूहन्ना क लउटब

23जब ओनका छोड़ दीन्ह गवा तउ आपन ही मनइयन क लगे आइ गएन अउर ओनसे जउन कछू मुख्ययाजक अउर बुजुर्ग यहूदी नेतन कहेन, उ सब ओनका कहिके सुनावा गवा। 24जब उ पचे इ सुनेन तउ मिलिके उँची आवाज में परमेस्सर क गोहरावत भवा बोलेन, "स्वामी, तू ही अकास, धरती, समुद्र अउर ओकरे अंदर जउन कछू अहइ, ओका बनाया ह। 25तू ही पवित्तर आतिमा क जरिये आपन सेवक, हमरे पूर्वज दाऊद क मुँहना स कहे रहा:

'देखाएन इ जानित आपन अहंकार काहे? मनइयन वृथा ही कुचाल काहे किहेन?

26इ धरती क राजा लोग आपन क तइयार किहेन ओनके खिलाफ जुद्ध बरे। अउर राजा बटुर गएन पभू अउर ओकरे मसीह क खिलाफत में।'

भजन संहिता 2:1-2

27हाँ, हेरोदेस अउर पुन्तियुस पिलातुस भी इ सहर में गैर यहूदियन अउर इस्त्राएलियन क संग मिलिके तोहरे पवित्तर सेवक ईसू क खिलाफ, जेकर तू मसीह रूप में अभिसेक किहे ह, सचमुच उ पचे एक अउट ग रहेन। 28उ पचे बटुर गएन काहेकि तोहार सक्ती अउर इच्छा क अनुसार जउन

*'पभू...जाई' व्यक्स्था 18:15,19

तोहरे...पइहीं उत्पति 22:18; 26:24

पवित्तर आतिमा परमेस्सर क आतिमा, मसीह क आतिमा अउ सहायक। परमेस्सर अउ ईसू क मिलि जाए स उ मनइयन में परमेस्सर क काम करत ह।

कछू पहिले ही तय होइ चुका रहा उ पूरा होइ। 29अउर अबहिं हे पभू, ओनकइ धमकिन प धियान द्या अउर आपन सेवक लोगन क निडर होइके 'तोहार बचन' सुनावइ क सक्ती द्या। 30जब कि चंगा किहे क पाछे आपन हाथ बढ़ाया अउर अद्भुत चीन्हन अउर अद्भुत कारजन तोहरे पवित्तर सेवकन क जरिये ईसू क नाउँ प कीन्ह जात रहत हीं।

31जब उ पचे पराथना कइ चुकेन तउ जउने ठउरे प उ सबइ बटुरा रहेन, उ हल गवा अउर ओन सब में 'पवित्तर आतिमा' समाइ गवा। अउर उ पचे निडर होइके परमेस्सर क बचन बोलइ लागेन।

बिसवासी क मेल जोल क जिन्गी

32बिसवासियन क इ समूचा दल एक मन अउर एक आतिमा स साथ रहा। कउनो भी इ नाहीं कहत रहा कि ओकर कउनो भी चीज ओकर आपन अहइ। ओनकइ लगे जउन कछू होत, उ पचे सब कछू क आपुस में बाँट लेतेन। 33अउर प्रेरितन पूरी सक्ती क संग पभू ईसू क पुनरुत्थान क बारे में साच्छी देत रहेन। परमेस्सर क महान बरदान ओन पइ बना रहत। 34दले में कउनो क कउनो चीज क कमी नाहीं रहत रही। काहेकि जउन कउनो क लगे खेत या घर होत, उ पचे ओका बेच देत रहेन अउर ओसे जउन धन मिलत, 35ओका लिआइके प्रेरितन क गोइवा प धइ देतेन। अउर जेका जेतनी जरूरत होत, ओका ओतना धन दइ दीन्ह जात।

36उदाहरण बरे यूसुफ नाउँ क, साइप्रस में पइदा भवा, एक लेवी रहा, जेका प्रेरितन बरनाबास (अर्थात् "सात्ति क पूत") भी कहा करत रहेन। 37उ एक ठु खेत बेंच दिहस जेकर उ मालिक रहा अउर उ धन लाइके प्रेरितन क गोइवा प धइ दिहस।

हनन्याह अउर सफीरा

5 हनन्याह नाउँ क एक मनई अउर ओकर पतनी सफीरा मिलिके आपन दौलत क एक हींसा बेंच दिहेन। 2अउ आपन पतनी क जानकारी में एहमाँ स कछू धन जुलय लिहेन। अउर कछू धन प्रेरितन क गोइवा प धइ दिहेन।

3एह पइ पतरस कहेस, "अरे हनन्याह, सइतान क तू आपन मन में इ बात नाइ देइ दिहा कि तू पवित्तर आतिमा स झूठ बोल्या अउर धरती क बेंच स मिला धन में स तनिक बचाइके धइ लिहा? 4ओका बेंचइ स पहिले का उ तोहार ही नाहीं रही? अउर जब तू ओका बेंच दिहा तउ उ धन का तोहरे कब्जा में नाहीं रहा? तू इ बात क काहे सोच्या? तू मनइयन स नाहीं, परमेस्सर स झूठ बोल्या ह।"

5हनन्याह जबहिं इ सब्दन क सुनेस तउ उ चकराइके गिरि गवा अउर दम तोड़ दिहस। जउन कउनो भी इ बारे में सुनेस, सबन प गहिर भय छाइ गवा। 6फिन जवान पुरुसन उठिके ओका कफन में लपेटेन अउर बाहेर लइ जाइके गाइ दिहेन।

7कउनो तीन घण्टा पाछे, जउन कछू भवा रहा, ओका न जानत भइ ओकर पतनी भितरे आइ 8पतरस ओसे कहेस, "बतावा, तू आपन खेत क एँते में ही बेच्या ह?"

तउ उ कहेस, "हाँ, एँतना में ही।"

9तबहिं पतरस ओसे कहेस, "तू पचे दुइनुँ पभू क आतिमा क परीच्छा बरे काहे मान लिहा? लखा तोहरे भतारे क दफनावइवालन क गोइ दुआरे ताई आइ ग अहइ अउर उ पचे तोहका भी ढोइ लइ जइहीं।" 10तब उ ओकरे गोइ प गिरि पड़ी अउर मरि गइ। फिन जवान परुसन भितरे आएन अउर ओका मरा पाएन। तउ उ पचे ओका ढोइके ओकरे पति क लगे ओका गाइ दिहन। 11तउ समूचइ कलीसिया अउर जउन कउनो इ बात क सुनेस, ओन सब प गहिरा भय छाइ गवा।

प्रमाण

12प्रेरितन क जरिये मनइयन क बीच बहोत स अद्भुत कारजन परगट होत रहेन अउर अचरज कारजन कीन्ह जात रहेन। उ पचे सबहिं सुलैमान क ओसारे में बटुरा रहेन। 13मुला ओनमाँ स कउनो क हिम्मत प्रेरितन में मिलइ बरे नाहीं होत रही। मुला मनइयन ओनकइ गुन खूब गावत रहेन। 14ओहर पभू प बिसवास करइवालन स्त्रियन अउर पुरुसन जिआदा स जिआदा बाढ़त जात रहेन। 15एँकरे कारण मनइयन आपन कछू बीमार लोगन क लइके खटिया अउर बिछौना प गलियन में ओलारइ लागेन काहेकि तबहिं पतरस ओहर स निकरा तउ ओनमाँ स कछू प कमती स कमती छाया पड़ि सकइ। 16यरूसलेम क आसपास क नगर स लोग आपन बेरमियन अउर दुस्ट आतिमा स सतावा गएन मनइयन क लइके आवइ लागेन। अउर सबहिं चंगा होइ जात रहेन।

यहूदियन क प्रेरितन क रोकइ क जतन

17फिन महा याजक अउर ओकर संगी यानी सदूकियन क दल, ओनकइ खिलाफ खड़ा होइ गएन। उ पचे मने में कुदत रहेन। 18यह बरे उ पचे प्रेरितन क बंदी बनाइ लिहन अउर ओनका कैदखाना में बन्द कइ दिहेन। 19मुला राति क समइ पभू क एक दूत कैद क फाटक खोल दिहस। उ ओनका बाहेर लइ जाइके कहेस, 20"जा, मन्दिर में ठाड़ होइ जा अउर इ नई जिन्गी क बारे में मनइयन क सब कछू बतावा।" 21जबहिं उ पचे इ सुनेन तउ भोरहिं तइके मन्दिर में घुसि गएन अउर उपदेस देइ लागेन।

फिन जब महायाजक अउर ओकर संगी हुवाँ पहेंचेन तउ उ पचे यहूदी संघ अउर इस्त्राएल क बुजुर्ग क पूरी सभा न्योतेन। उ पचे कैदखाना स प्रेरितन क बोलवावइ पठएन। 22किन्तु जब अधिकारी कैदखाना में पहुँचेन तउ उ पचे प्रेरितन क हुवाँ नाहीं पाएन। उ पचे लौटिके एँका बताएन अउर 23कहेन, "हम पचे कैदखाना में सुरच्छा क लगा भवा ताला अउर दुआरे प तैनात सुरच्छाकारियन क पावा। मुला जब हम दरवाजा खोला तउ हमका भितरे कउनो नाहीं मिला।" 24जइसेन मन्दिर क सुरच्छाकारी अउर

मुख्ययाजकन इ सब्दन क सुनेन तउ उ पचे चकराइ गएन अउ सोचइ लागेन, “अब का होई।”

25एतने में कउनो दूसर मनई आवा अउर ओनका बताएस, “जेनका तू पचे जेल में धाँध दिहा ह, उ पचे मन्दिर में खड़ा होइके उपदेस देत बाटेना।” 26तउ सुरच्छाकारी आपन अधिकारी संग हुवाँ गवा अउर बिना ताकत क प्रयोग किए ओनका वापस धइ लिआवा काहेकि उ पचे डेरात रहेन कि कहुँ मनई ओनका (मन्दिर क सुरच्छा कर्मी) पाथर स न मारई।

27उ पचे ओनका भितरे लइ आएन अउर सबन त ऊँचकी यहूदी सभा क समन्वा खड़ा कइ दिहन। फिन महायाजक ओनसे फरियावत भवा पूछेस, 28“हम इ नाउँ स उपदेस न देइ बरे तोहका कारा हुकुम दिहे रहे। अउर तू पचे फिन भी समूचइ यरूसलेम क आपन उपदेस स भरि दिहा ह। अउर तू पचे इ मनई क मउत क अपराध हम पचे लइ लादइ चाहत बाट्या।”

29पतरस अउर दूसर प्रेरितन जवाब दिहेन, “हमका मनइयन क बनिस्बद परमेस्सर क आग्या मानइ चाही। 30उ ईसू क हमरे पूर्वन क परमेस्सर मउत स फिन जीवित कइके खड़ा कइ दिहेस ह जेका एक सूली प टाँगिके तू पचे मार डया। 31ओका ही प्रमुख अउर उद्धारकर्ता क रूप में बड़कइ देत भवा परमेस्सर आपन दाहिन हाथे कइँती बइठाएस काहेकि इस्त्राएलियन क मनफिराव अउर पाप क छमा दीन्ह जाइ सकइ। 32एँ सबन बातन क हम साच्छी अही अउर वइसे ही पवित्तर आतिमा भी बा उहइ परमेस्सर ओनका दिहेस ह जउन ओकरे आज्ञा क मानत हीं।”

33जब उ पचे इ सुनेन तउ उ पचे कोहाइ गएन अउर ओनका मारि डावइ चाहेन। 34मुला महासभा में स एक गमलिले नाउँ क फरीसियन जउन धरमसास्तिरी अध्यापक रहा अउर जेकर सब लोग मान सम्मान करत रहेन, ठाड़ भवा अउर हुकुम दिहेस कि एँका तनिक देरी बरे बाहेर कइ दीन्ह जाइ। 35फिन उ ओनसे कहेस, “इस्त्राएल क पुरुसो, तू पचे इ मनइयन क संग जउन कछू करइ प उतारु अहा, ओका सोच बिचारिके किहा। 36कछू समइ पहिले आपन क बड़कवा एलान करत भवा थियूदास परगट भवा। ओर कउनो चार सौ मनई ओकरे पाछे भी होइ गएन, मुला उ मार डावा गवा अउर ओकर सबहिं मनइयन एहर ओहर छिटक गएन। ओकरे फल कछू नाहीं निकरा। 37ओकरे पाछे जनगणना क समइ गलीली क बसइया यहूदा परगट भवा। उ भी कछू मनइयन क आपन पाछे कइँती हैच लिहेस। उ भी मारि डावा गवा। ओकर भी सबहिं एहर ओहर होइ गएन। 38यह बरे अबहिं मई तू पचन्स कहत हउँ, इ मनइयन स अलग रहा, एँका अइसे ही अकेल्ले छोरि दया काहेकि एँकइ इ चाल या काम मनई कइँती स अहइ तउ खुद नास होइ जाइ। 39मुला जदि उ परमेस्सर स अहइ तउ तू पचे ओनका रोक न पउब्या। अउर तब होइ सकत ह तू आपन खुद क ही परमेस्सर क खिलाफ लड़त भिड़त पउब्या।”

उ पचे जइसा गेमलिले कहेस मान लिहेन। 40अउर प्रेरितन क भितरे बोलाइके उ पचे कोड़ा लगवाएन अउर इ

आज्ञा दइके कि उ पचे ईसू क नाउँ क कउनो चर्चा न करई, ओनका जाइ दिहेन। 41तउ उ पचे प्रेरितन इ बात क मजा मारत भए कि ओनका ओकरे नाउँ बरे बेज्जत रहइ क जोगग गना गवा ह, यहूदी महासभा स बाहिर चला गएन।

42फिन मन्दिर अउर घर-घर में हर रोज इ सुसमाचार कि ईसू मसीह अहइ उपदेस देब अउर प्रचार करब उ पचे कबहुँ नाहीं तजेन।

खास काम बरे सात मनइयन क चुना जाब

6 उ दिनन जबहिं चेलन क गनती बाढ़त रही, तउ यूनाली बोलवइया अउर इब्रानी बोलवइया यहूदियन में एक झगड़ा होइ गवा काहेकि रोजाना विधवावन क चीज बाँटइ में ओनकइ सुधि नाहीं लीन्ह जात। 2तउ बारहुँ प्रेरिन क समूची मण्डली क एक साथे बोलाइके कहेन, “हम सबइ बरे परमेस्सर क बचन क सेवकइ तजिके खिलाने क इन्तजाम करब नीक नाहीं अहइ। 3भाइयन, आपन में स सात नामी मनइयन क पवित्तर आतिमा अउर सूझबूझ स भरा भवा सात मनइयन क चुनिल्या। हम ओनका इ कामे क हकदार बनइ देइ। 4अउर आपन आपका पराथना अउर बचन क सेवा क कामे में जिअरा लगाइ क राखब।”

5इ सुझावे स समूचइ मण्डली बहोत खुस भइ। तउ उ पचे बिसवास अउर पवित्तर आतिमा स भरा भवा स्तिफनुस नाउँ क मनई क अउर फिलिप्पुस, प्रखुरूस, नीकानोर, तिमोन, परमिनास अउर अन्ताकिया क निकुलाऊस क यहूदी धरम क कबूले रहा, चुन लिहेस। 6अउर इ मनइयन क फिन उ पचे प्रेरितन क समन्वा हाजिर कइ दिहन। प्रेरितन पराथना किहेन अउर ओन पइ हाथ धरेन।

7इ तरह परमेस्सर क बचन संचरइ लाग अउर यरूसलेम में चलन क गनती बहोत बाढ़इ लाग। याजकन क एक बहोत बड़ा गुट भी इ मत क मानइ लाग।

यहूदी स्तिफनुस क खिलाफ

8स्तिफनुस एक अइसा मनई रहा जउन अनुग्रह अउर सामर्थ स भरपूर रहा। उ मनइयन क बीच बड़ा बड़ा अद्भुत कारजन अउर अद्भुत चीन्हन परगट करत रहा। 9मुला अजाद कीन्ह भवा अइसा कहवावत मनइयन में स कछू लोग जउन कुरेनी अउर सिकन्दरिया, अउर किलिकिया अउर एसिया स आवा भएन यहूदी रहेन, उ पचे ओनकइ खिलाफ बहस करइ लागेन। 10मुला उ जउन बुद्धिमानी अउर आतिमा स बोलत रहा, उ पचे ओकरे समन्वा नाहीं टिक पाएन।

11फिन उ पचे कछू क लालच दइके कहवाएन, “हम पचे मूसा अउर परमेस्सर क खिलाफ एँका बेज्जत स भरा सबद कहत सुना ह।” 12इ तरह उ पचे जनता क बुजुर्ग यहूदी नेतन क, अउर धरम सास्तिरियन लोगन्क हुस्काइ दिहेन। फिन उ पचे ओका आइके धइ लिहेन अउर सबन स सर्वोच्च यहूदी महासभा क समन्वा लइ आएन।

13उ पचे उ सब लबार गवाह हाजिर किहेन जउन कहेन, “इ मनई इ पवित्तर ठउर अउर व्यवस्था क

खिलाफ बोलत बालत कबहुँ रुकत नाहीं बा। 14हम एँका कहत सुना ह कि इ नासरी ईसू इ जगह क नास कइ देइ अउर मूसा जउन रीति-रिवाज क हमका दिहे अहइ ओका बदल देइ।” 15फिन सबन स सर्वोच्च यहूदी महासभा में बइठा भए सबहिं मनइयन में ओका धियान स लखा तउ पावा कि ओकर मुहँना कउनो सरगदूत क नाई देखाई देत रहा।

स्तिफनुस क भाखन

7 फिन महायाजक कहेस, “का इ बात अइसे ही अहइ?” 2उ जवाब दिहस, “भाइयो, अउर बाप क समान बुजुर्गन, मोर बात सुना। हारान में बसइ स पहिले अबहिं जब हमार बाप इब्राहीम मेसोपोटामिया में रहा, तउ महिमा वाला परमेस्सर ओका दर्सन दिहसे 3अउर कहेस, ‘आपन देस अउर आपन रिस्तेदारन क तजिके तू उ धरती प चला जा, जेका तोहँका मई देखौउबा।’* ”

4“तउ उ कसदियन क धरती क तजिके हारान में बसि गवा जहाँ ते ओकरे पिता क मउत क पाछे परमेस्सर ओका इ देस में आवइ क न्योतेस जहाँ तू पचे अबहिं रहत बादत्या। 5परमेस्सर हियाँ ओका हेबानामा में कछू नाहीं दिहस, डग भइ धरती भी नाहीं। तउ भी ओकरे कउनो पूत नाहीं रहा फिन परमेस्सर ओसे प्रतिग्या किहेस इ देस उ ओका अउर ओकरे बंसज क ओकरी दौलत क तरह देइ।

6“परमेस्सर ओसे इ भी कहेस, ‘तोहार बंसज कहुँ विदेस में परदेसी होइके रइहीं अउर चार सौ बरिस ताई ओका नउकर बनइके, ओनके संग बहोत बुरा बर्ताव कीन्ह जाइ।’ 7परमेस्सर कहेस, ‘दास बनइवइवाली उ राष्ट्र क मई सजा देब अउर एँकरे पाछे उ पचे देस स बाहेर आइ जइहीं अउर इ स्थान प मोर सेवा करिहीं।’* ”

8“परमेस्सर इब्राहीम क खतना क चीन्हा स करार किहेस। अउर उ इ तरह इसहाक क पिता बना। ओकरे जनम क पाछे अठएँ दिन उ ओकर खतना किहेस। फिन इसहाक स याकूब अउर याकूब स बारहु कुल क पहिला मनई पइदा भएन।

9“उ पचे पहिलउ मनइयन यूसुफ स जलन राखत रहेन। तउ उ पचे ओका मिस्त्र में दास बनवइ बरे बेंच दिहेन। मुला परमेस्सर ओनके संग रहा। 10अउर उ ओका सबहिं मुसीबतन स बचाएस। परमेस्सर यूसुफ क गियान दिहसे अउर ओका इ जोगग बनएस जेसे उ मिस्त्र क राजा फिरौन क अनुग्रह पात्र बन जाइ। फिरौन ओका मिस्त्र क राज्यपाल अउर आपन घर-बार क अधिकारी तैनात किहेस। 11फिन समूचइ मिस्त्र अउर कनान देस में अकाल पड़ा अउर बड़ा संकट छाइ गवा। हमार पूर्वजन खाइ क कछू नाहीं पाइ सकेन।

12“जब याकूब सुनेस कि मिस्त्र में अनाज अहइ, तउ उ हमरे पूर्वजन क हुवाँ पठएस इ पहिला मौका रहा। 13ओनकइ दूसर जात्रा क मौका पइ यूसुफ आपन भाइयन

क बारे में बताएस अउर तब्बइ फिरौन क भी यूसुफ क परिवार क जानकारी मिली। 14तउ यूसुफ आपन पिता याकूब अउर परिवार क सबहि लोगनक, जउन कुल मिलाइके पचहतर रहेन, बोलवाइ पठएस। 15तब याकूब मिस्त्र आइ गवा अउर उ हुवाँ वइसे ही प्राण तजेस जइसेन हमार पूर्वजन हुवाँ प्राण तजे रहेन। 16ओनकइ ल्हास हुवाँ स सेकम लइ जावा गएन जहाँ ओनका मकबरा में दफनाइ दीन्ह गवा। इ उहइ मकबरा रहा जेका इब्राहीम हमोर क बेतहनन स कछू चान्दी दइके खरीदे रहा।

17“जब परमेस्सर क इब्राहीम क जउन बचन दिहे रहा, ओका पूरा होइ क समइ नगिचे आवा तउ मिस्त्र में हमरे मनइयन क गनती बहोत जिआदा होइ गइ। 18आखिर में मिस्त्र प एक अइसे राजा क राज्य भवा जउन यूसुफ क नाहीं जानत रहा। 19उ हमरे मनइयन क छलेस अउर उ हमरे पूर्वजन क निर्दय होइके मजबूर किहेस कि उ पचे आपन गदेलन क बाहेर मरइ क छोरि देई जेहसे उ सबइ जिन्दा न रहि पावई।

20“उहइ समइ मूसा क जन्म भवा। उ बहोत सुन्नर लरिका रहा। उ तीन महीना भर आपन पिता क घर में पलत भवा बाढ़त रहा। 21फिन जब ओका बाहेर छोरि दीन्ह गवा तउ फिरौन क बिटिया ओका आपन बेटवा बनइके उठाइ लइ गइ। उ आपन बेटवा क नाई ओका पालेस पोसेस। 22मूसा क पूरंपूर मिस्त्रयन क ग्यान क सिच्छा दीन्ह गइ। ओकर सामर्थ बोलइ अउर कामे में दुइनँ में रहा।

23“जब उ चालीस बरिस क भवा तउ उ इस्त्राएल क बंसज, आपन भाइयन क निअरे जाइके ठान लिहेस। 24तउ जब उ एक दाई लखेस कि ओनमाँ स कउनो एक क संग बुरा व्यवहार कीन्ह जात अहइ तउ उ ओका बचाएस अउर मिस्त्री मनई क मारिके उ दलित मनई क कसर लिहेस। 25उ सोचेस कि ओकर भाई बंधु जान जइहीं कि ओनका छोड़ावइ बरे परमेस्सर ओका बइपरत अहइ। मुला उ पचे ओका नाहीं समझ पाएन।

26“दुसरे दिना ओहमाँ स (ओकरे आपन मनइयन में स) जब कछू मनई झगड़त रहेन तउ उ ओनकइ निअरे पहोंचा अउर इ कहत भवा ओनमाँ बीच-बचाव करइ लाग, ‘तू पचे आपुस में भाई-भाई अहा! एक दूसर क संग बुरा बर्ताव काहे करत अहा?’ 27मुला उ मनई जउन आपन पड़ोसी क संग झगड़त रहा, मूसा क धकियावत भवा कहेस, ‘तोहका हमार राजा अउर न्यायाधीस के बनएस? 28जइसे काल्ह तू उ मिस्त्रि क हत्या कइ दिहे रहा, का तू वइसे ही मोका मारि डावा चाहत ह?’* 29मूसा जब इ सुनेस तउ उ हुवाँ स चला गवा अउर मिदयान में एक पड़ोसी क रूप में रहइ लाग। हुवाँ ओकरे दुइ बेटवा भएन।

30“चालीस बरिस बीते क पाछे सिनाई पहाड़े क लगे रेगिस्तान में एक बरत भइ झाड़ी क लपट क बीच ओकरे समन्वा एक सरगदूत परगट भवा। 31मूसा जब इ लखेस तउ ओका अचरज भवा। जब अउर जिआदा नगिचे स लखइ बरे उ ओकरे लगे गवा तउ ओका पर्भू क बाणी

‘आपन ... देखौउबा’ उत्पत्ति 12:1

‘तोहार ... करिहीं’ उत्पत्ति 15:13-14; निर्ग 3:12

‘तोहका ... ह’ निर्ग 2:14

सुनई पड़ी। 32मई तोहरे पूर्वजन क परमेस्सर हउँ इब्राहीम, इसहाक अउर याकूब क परमेस्सर हउँ।* डर स कँपकँपात भवा मूसा कछू निहारइ क हिम्मत नाहीं कइ पावत रहा।

33“तबहि पभू ओसे कहेस, ‘आपन गोड़वा क पनही उतार द्या काहेकि जउने ठउर प तू खड़ा अहा, उ पवित्तर भुईया अहइ। 34मई मिस्त्र में आपन मनइयन क संग दुर्दसा क लखेउँ ह, परखेउँ ह। मई ओनका जोर स विलाप करत भवा सुनेउँ ह। ओनका अजाद करइ बरे नीचे उतरेउँ ह। आवा, अब मई तोहका मिस्त्र पठउब।*’

35“इ उहइ मूसा अहइ जेका उ पचे इ कहत भवा नकारेन, ‘तोहका राजा अउर न्यायकर्ता कउन बनाएस ह?’ इ उहइ अहइ जेका परमेस्सर उ सरगदूत क जरिये, जउन ओकरे बरे झाड़ी में परगट भवा रहा, राजा अउर मुक्ति देइवाला होइ बरे पठएस। 36उ ओनका मिस्त्र क भुईया अउर लाल सागर अउर रेगिस्ताने में चालीस बरिस ताई बहुत अचरज कारजन करत भवा अउर अद्भुत चीन्हन दखौवत भवा बाहेर निकारी लइ आवा।

37“इ उहइ मूसा अहइ जउन इस्त्राएल क लोगन स कहे रहा, ‘तोहरे भाइयन में स ही तोहरे बरे परमेस्सर एक मोरे जइसा नबी पठइ।*’ 38इ उहइ अहइ जउन वीरान जगह में सभा क बीच हमार पूर्वजन अउर उ सरगदूत क साथे मौजूद रहा जउन सीनै पहाड़े प ओसे बात किहेस। मूसा परमेस्सर स जीवित बचन पाएस जउन हमका जिन्नगी देत हीं।

39“मुला हमार पूर्वजन ओका मानइ स इनकार कइ दिहेन। एतना ही नाहीं, उ पचे ओका नकार दिहन अउर आपन मने में फिन उ पचे मिस्त्र लौटि गएन। 40उ पचे हारून स कहे रहेन, ‘हमरे बरे अइसे देवतन क बनावा जउन हम पचन्क राह सोझौवइ। इ मूसा क बारे में जउन मिस्त्र स बाहेर निकारा गवा रहा, हम नाहीं जानित कि ओकरे संग का कछू घटा।*’ 41ओनही दिनन में उ पचे बछवा क तरह एक ठु मूरत गढ़ेन। उ मूरत प उ सबइ बलि चढ़ाएन। अउर जेका उ पचे आपन हाथे स चढ़ाएन, ओह पइ आनन्द मनावइ लागेन। 42मुला परमेस्सर ओनसे मुँहना मोड़ि लिहस। उ सबन्क अकासे क ग्रह-नछत्र क आराधना करइ बरे छोड़ दीन्ह गवा। जइसा कि नबियन क किताबे में लिखा अहइ:

‘ओ इस्त्राएल क परिवारे क लोगो, का तू पसु बलि अउर दूसर बलि वीरान में मोका नाहीं चढ़ावत रह्या? चालीस बरिस तलक।

43तू पचे मोलेक क तम्बू अउर आपन देवता रिफान क तारा भी आपन संग लइ गवा रहे। ओन मूरत क भी लइ गवा रहे जेनका तू पचे आराधना करइ बरे बनए रह्या। यह बरे मई तोहका बेबिलान स भी परे पठउब।’ *आमोस 5:25-27*

‘मई ... हउँ’ निर्ग 3:6

‘आपन ... पठउब’ निर्ग 3:5-10

‘तोहरे ... पठइ’ व्यवस्था 18:15

‘हमरे ... घटा’ निर्ग 32:1

44“पवित्तर क तम्बू भी उ वीरान में हमरे पूर्वजन क संग रहा। इ तम्बू उहइ नमूने प भी बनवा ग रहा जइसा कि मूसा लखे रहा अउर जइसा कि मूसा स बात करवइया बनावइ बरे ओसे कहे रहा। 45हमार पूर्वजन ओका पाइके तबहिं हुवाँ स आए रहेन जब यहोसू क अगुअइ में उ पचे उ राष्ट्रन स धरती लइ लिहे रहेन जेनका हमरे पूर्वजन क समन्वा परमेस्सर निकारिके खदेरे रहा। दाऊद क समइ तलक हुवाँ उ रहा। 46दाऊद परमेस्सर क अहुग्रह क आनन्द उठाएस। उ चाहत रहा कि उ याकूब क परमेस्सर बरे एक ठु मंदिर बनवाइ सकइ। 47मुला उ सुलेमान ही रहा जउन ओकरे बरे मंदिर बनवाएस।

48“कछू भी होइ परम परमेस्सर हथवा स बना भवन में निवास नाहीं करत। जइसा कि नबी कहे अहइ:

49“प्रभू कहेस, सरग मोर सिंहासन अहइ धरती गोड़वा क चौकी बनी अहइ। कउने तरह क तू बनउब्या मोर घर? अहइ कहुँ अइसी जगह, जहाँ अराम पावउँ?

50का सबहिं कछू इ, मोर बनवा नाहीं रहा हाथे का?”

यसायाह 66:1-2

51“अरे हठीले लोग बिना खतना क मन अउर कान वाले जिद्दी मनइयन, तू पचे सदा पवित्तर आतिमा क खिलाफत किहे ह। तू सबइ आपन पूर्वजन जइसा ही अहा! 52का कउनो भी अइसा नबी रहा, जेका तोहार पूर्वजन नाहीं सताएन? उ पचे तउ ओनका मारि डाए रह्या। जउन बहोत पहिले स ही उ धर्मी (मसीह) क अवाई क एलान कइ दिहे रहेन, जेका अब तू धोखा दइके पकड़वाइ दिहा अउर मरवाइ डाय। 53तू सबइ उहइ अहा जउन सरगदूतन क जरिये दीन्ह गवा व्यवस्था क तउ पाइ लिहा मुला ओह पइ चल्या नाहीं!”

स्तिफनुस क कतल

54जब उ सबइ इ सुनेन तउ उ पचे किरोध स पगलाइ गएन अउर स्तिफनुस पर दौँत पीसइ लागेन। 55मुला पवित्तर आतिमा स भरा स्तिफनुस सरगे कईती लखत रहा। उ निहारेस परमेस्सर क महिमा क अउर परमेस्सर क दाहिन कईती खड़ा भवा ईसू क। 56तउ उ कहेस, “लखा! मई लखत हउँ कि सरग खुला भवा अहइ अउर मनई क पूत परमेस्सर क दाहिन कईती खड़ा बा!”

57एह पइ उ पचे चिचिआत भवा आपन कान ढाँपि लिहेन अउर फिन उ सबइ एक संग टूट पड़ेन। 58उ सबइ ओका घेरवित भए सहर स बाहेर लइ गएन अउर ओहँ पइ पाथर बरसावइ लागेन। तबहिं गवाह लोग आपन ओढ़ना उतारि के साऊल नाउँ क एक ठु जवान क गोड़े प धइ दिहेन।

59स्तिफनुस प जब स उ पचे पाथर बरसावइ सुरू किहेन, उ इ कहत भवा पराथना करत रहा, “पभू ईसू, मोर आतिमा क ग्रहण करा।” 60फिन उ घुटना क बल भइराइ गवाँ अउर ऊँचि अवाजे में चिल्लान, “पभू, इ पाप क ओनकइ खिलाफ जिन ल्या!” एतना कहिके उ हमेसा क नींद में सोइ गवा।

8 साऊल स्तिफनुस क कतल क ठीक बताएस। उहइ दिना स यरूसलेम क कलीसिया प घोर अत्याचार होब सुरु भवा प्रेरितन क तजिके उ पते सबहिं मनइयन यहूदिया अउर सामरिया क गाउँ में तितराइ-बितराइके फैलि गएन।

बिसवासियन प अत्याचार

2-3कछू भगत लोग स्तिफनुस क गाड़ दिहन अउर ओकरे बरे बहोत दुःख मनाएन। साऊल कलीसिया क बरबाद करब सुरु कइ दिहेस। उ घर-घर जाइके स्त्रियन अउर पुरुसन क घेरावत भवा जेल में धाँधइ लाग। 4ओहर तितराए बितराए मनई हर ठउरे प जाइके नीक खबर क सुसमाचार देइ लागेन।

सामरिया में फिलिप्पुस क उपदेस

5फिलिप्पुस सामरिया नगर क चला गवा अउर हुवाँ मनइयन में मसीह क बारे में प्रचार कइ लाग। 6फिलिप्पुस क मनइयन जब सुनेन अउर जउन अद्भुत चीन्हन क उ परगट करत रहा, लखेस, तउ जउन बातन क उ बतावा करत रहा, ओन पइ उ पचे एक चित्त लाइके धियान दिहेन। 7बहोत स मनइयन में स, जेनमाँ दुस्ट आतिमा समाई रहिन, उ सबई ऊँच अवाजे में चिल्लात भइ बाहेर निकारि आइन। बहोत स सुखाड़ी क बेरिमिया अउर अंग भंग नीक होत रहेन। 8उ सहर में खुसी छइ रही।

9हुवँई समौन नाउँ क मनई रहत रहा। फिलिप्पुस क अवाई स पहिले उ ढेर समइ स उ सहर में जादू टोटका करत रहा। अउर सामरिया क मनइयन क अचरज में डाइ देत रहा। उ महा पुरुख होइ क दावा करत रहा। 10नान्ह स लइके बड़वारे तलक सबहिं मनइयन ओकरे बात प धियान देतेन अउर कहत रहतेन, “इ मिला परमेस्सर क उहइ सकती बा जउन ‘महान सकती’ कहवावत ह!” 11काहेकि उ ढेर दिनन स ओन पचन्क आपन चमत्कारन क घनचक्कर में नाइ देत रहा, यह बरे उ पचे ओह पइ धियान देत रहेन। 12मुला उ पचे जब फिलिप्पुस प पतिमानेन काहेकि उ ओनका परमेस्सर क राज्य क सुसमाचार अउर ईसू मसीह क नाउँ बाँचत रहा, तउ उ पचे स्त्रियन अउर पुरुसन दुइनउँ ही बपतिस्मा लेइ लागेन। 13अउर खुद समौन ही ओन पइ पतियाइ लाग। अउर बपतिस्मा लेइ क पाछे फिलिप्पुस क संग उ बड़े निचके स बसइ लाग। उ अद्भुत कारजन अउर अद्भुत चीन्हन क जब उ लखेस, तब दंग रहि गवा।

14जब यरूसलेम में प्रेरितन इ सुनेन कि सामरिया क मनइयन परमेस्सर क बचन क मान लिहे अहईँ तउ उ पचे पतरस अउर यूहन्ना क ओनके लगे पठएन। 15जबहिं उ पचे आएन, तब उ दुइनउँ सामरियन बरे पराथना किहेन कि ओनका पवित्तर आतिमा मिलि जाइ। 16काहेकि अबहुँ तलक पवित्तर आतिमा कउनो प नाहीं ओतरी, ओनका फिन पभू ईसू क नाउँ प बपतिस्मा हि दीन्ह गवा रहा। 17तउ पतरस अउर यूहन्ना ओन पइ आपन हाथ धरेस अउर ओनका पवित्तर आतिमा मिलि गइ।

18जब समौन लखेस कि प्रेरितन क हाथ धरे भइ स पवित्तर आतिमा मिलि गइ तउ ओनके समन्वा धन धरत भवा कहेस, 19“इ सक्ती मोका दइ द्या काहेकि जेह पइ मईँ हाथ धरउँ, ओका पवित्तर आतिमा मिलि जाइ।”

20पतरस ओसे कहेस, “तोहार अउर तोहरे धने क सतियानास होइ! काहेकि तू इ बिचारया ह कि तू धने स परमेस्सर क बरदान क मोल लइ सकत ह। 21इ बारे में तोहार हमार मेल नाहीं खात काहेकि परमेस्सर क समन्वा तोहार हिरदय सही नाहीं बा। 22यह बरे आपन इ दुस्टता बरे मनफिराव अउर आपन कुकर्म प पछतावा करा अउर पभूँ स पराथना करा। इ होइ सकत ह कि इ बिचार बरे तोहका छमा कइ दीन्ह जाइ जउन तोहरे मने में रहा। 23मईँ लखत हउँ कि तू परिहँसे स भरा अहा अउर पाप क पंजा में फँसा बाट्या।”

24यह पइ समौन जवाब दिहेस, “तू पभूँ स मोरे बरे पराथना करा काहेकि तू जउन कहया ह, ओहमाँ स कउनो भी बात मोह प न आइ जाइ।”

25फिन प्रेरितन साच्छी दइके अउर पभूँ क बचन सुनाइके, राहे में टेर क सामरी गाँवन में सुसमाचार क उपदेस देत भएन यरूसलेम लौटि गएन।

इथियोपिया स आवा भएन मनइयन क फिलिप्पुस क उपदेस

26पभूँ क एक सरगदूत फिलिप्पुस क कहत भवा बताएस, “तइयार होइ जा, अउर सरक प दक्खिन कईती जा, जउन सरक यरूसलेम स गाजा क जात ह। इ एक निर्जन राह अहइ।”

27तउ उ तइयार भवा अउर निकारि गवा। सरक पइ इथियोपिया क मनई क लखेस। उ हिजरा रहा। इथियोपियन क रानी कंदाके क एक अधिकारी रहा जउन ओकरे सारा खजाना क खजांची रहा। उ आराधना कइ यरूसलेम गवा रहा। 28लउटत भवा उ आपन रथे में बैठिके नबी यसायाह क पोथी बाँचत रहा।

29तबहिं उ आतिमा फिलिप्पुस स कहेस, “उ रथे क निचके जा अउर हुवँई ठहर जा।”

30फिलिप्पुस जब उ रथे क निचके दौड़िके गवा तउ उ ओका यसायाह क पढ़त भवा लखेस। तउ उ कहेस, “का तू जेका बाँचत अहा, ओका बूझत भी बाट्या?”

31उ कहेस, “मईँ भला कहाँ तलक समुझ बूझ सकत हउँ? जब तलक कउनो मोका एकर अरथ न बतावइ?” फिन उ फिलिप्पुस क रथे प आपन संग बइठाएस।

32पवित्तर सास्तर क जउन हीसा क उ बाँचत रहा, उ रहा: “उ भेड़ क नाई जप कइ दीन्ह बरे लइ जावा जात रहा उ ओ मेम्ना क नाई चुप रहा जउन आपन उन क कतरइवाला क समन्वा चुप रहत ह। ठीक वइसे ही उ आपन मुँह खोलेस नाहीं।

33अब अइसी दीन दसा में ओका निआव स दुरिआवा गवा। ओकरी पीढ़ी क कबहँ गाथा कउन गाई? काहेकि धरती स तउओकर जिन्गी लइ लीन्ह गइ।”

34उ अधिकारी फिलिप्पुस स कहैस, “अहुग्रह कइके बतावा कि इ नबी केकर बारे में कहत बाटइ? इ आपन बारे में या कउनो अउर क बारे में?” 35फिन फिलिप्पुस कहब सुरु किहैस अउर इ सास्तर स लइके ईसू क सुसमाचार तलक सब कछू ओका कहिके सुनाएस।

36रस्ता में आगे बढ़त भए उ सबइ पानी क निचके पहुँचैन। फिन उ अधिकारी कहैस, “लखा! हिआँ पानी बाटइ। अब मोका बपतिस्मा लेइ मैं का बियाधा अहइ?” 37* 38तब उ रथे क रोकइ बरे आग्या दिहैस। फिन फिलिप्पुस अउर उ अधिकारी दुइनउँ ही पानी में उतरि गएन अउर फिलिप्पुस ओका बपतिस्मा दिहैस। 39अउर फिन जब उ पचे पानी स बाहेर निकसेन तउ फिलिप्पुस क पर्भू क आतिमा छीन लइ गवा। अउर उ अधिकारी फिन ओका कबहुँ नाहीं लखेस। ओहर उ अधिकारी खुसी मनावत आपन राहे प चला गवा। 40ओह कइँती फिलिप्पुस खुद क असवोद में पाएस अउर कैसरिया पहोंच तलक उ सब नगरन में सुसमाचार प्रचार करत रहा।

साऊल क हिरदय बदलब

9 साऊल अबहुँ पर्भू क चलन क मारि डावइ क धमकी देत रहा। उ महायाजक क लगे गवा। 2अउर उ दमिस्क क आराधनालय क नाउँ इ मंसा क चिट्ठी लिहैस कि जेहसे ओका हुवाँ अगर कउनो इ पंथ क चलन मिलइ, फिन चाहे उ स्त्रियन होइ, चाहे पुरुसन, तउ उ ओका बंदी बनाइ सकइ अउर फिन वापिस यरूसलेम लइ आवइ। 3तउ जब चलत चलत उ दमिस्क क निचके पहुँचा, तउ एकाएक ओकरे चारिहुँ कइँती अकासे स रोसनी कउँधी 4अउर उ भुइँया प जाइ गिरा। उ एक अवाज अनकेस जउन ओसे कहत रही, “साऊल, अरे ओ साऊल! तू मोका काहे सतावत अहा?”

5साऊल कहैस, “पर्भू, तू कउन अहा?”

उ कहैस, “मइँ ईसू अहउँ जेका तू सतावत बाट्या। 6मुला अब तू खड़ा हवा अउर नगर में जा। हुवाँ तोहका बताइ दीन्ह जाइ कि तोहका का करइ चाही।”

7जउन मनई ओकरे संग जात्रा करत रहेन, उ पचे चुपचाप रहि गएन। उ पचे अवाज तउ अनेकेन मुला कउनो क लखेन नाहीं। 8फिन साऊल भुइँया पइ स खड़ा भवा। मुला जब उ आपन आँखी खोलेस तउ उ कछू भी नाहीं निहारि सका। यह बरे उ पचे ओकर हाथ धइके दमिस्क लइ गएन। 9तीन दिना तलक उ न तउ कछू निहारि पाएस, अउर न ही कछू खाएस या पीएस।

10दमिस्क में हनन्याह नाउँ क ईसू क एक चेला रहा। पर्भू दर्सन दइके ओसे कहैस, “हनन्याह!”

तउ उ बोला, “पर्भू, मइँ इ हउँ।”

11पर्भू ओसे कहैस, “खड़ा हवा अउर उ गली में जेका सोझ कहवावइ वाली गली कहा जात ह। अउर हुवाँ यहूदी

क घरे में जाइके तारसी क बसइया साऊल नाउँ क एक मनई क बारे में पूछताछ करा काहेकि उ पराथना करत बाटइ। 12उ एक दर्सन में लखेस ह कि हनन्याह नाउँ क एक मनई घरे में आइके ओह प हाथ रखेस ह ताकि उ फिन लखि सकइ।”

13हनन्याह जवाब दिहैस, “पर्भू, मइँ इ मनई क बारे में बहोतन स सुना ह। यरूसलेम में तोहरे संत लोगन क संग इ जउन बुरा काम किहैस ह, उ सब मइँ सुनेउँ ह। 14अउर हियाँ भी इ मुख्ययाजक स तोहरे नाउँ में सबहिँ बिसवासी मनइयन क बंदी बनावइ क हुकुम लइ आवा ह।”

15मुला पर्भू ओसे कहैस, “तू जा काहेकि इ मनई क विधर्मी मनइयन, राजा लोगन अउर इस्त्राएल क मनइयन क समन्वा मोर नाउँ लेइ बरे, एक जरिया क रूप में मइँ चुनेउँ ह। 16मइँ खुद ओका उ सब कछू बताउब, जउन ओका मोरे नाउँ बरे सहइ क होइ।”

17तउ हनन्याह चला गवा अउर उ घरे क भितरे पहुँचा अउर साऊल प आपन हाथ रखि दिहैस अउर कहैस, “भाइ साऊल! पर्भू ईसू मोका पठएस ह जउन तोहरे राह में तोहरे समन्वा परगट भ रहा जेहसे तू फिन स लखि सका अउर पवित्तर आतिमा स भरि उठा।” 18फिन तुरतहि बोकला जइसी कउनो चीज ओकरी आँखिन स टेघरी अउर ओका फिन देखौँ देइ लाग। उ खड़ा भवा अउर उ बपतिस्मा लिहैस। 19ओकरे पाछे फिन तनिक खइया खाए क बाद आपन ताकत पाइ गवा।

साऊल क दमिस्क में प्रचार काम

उ दमिस्क में चलन क संग कछू समइ ठहरा। 20फिन इ सोझइ यहूदी आराधनालय में पहुँचा अउर ईसू क प्रचार करइ लाग। उ कहैस, “इ ईसू परमेस्सर क पूत अहइ।”

21जउन कउनो भी ओका सुनेन, चकित रहि गएन अउर बोलेन, “का इ उहइ नाहीं अहइ, जउन यरूसलेम में ईसू क नाउँ में बिसवास करइया मनइयन क नास करइ क जतन नाहीं किहैस। अउर का इ ओनका धरवावइ अउर मुख्ययाजक क समन्वा लइ जाइ नाहीं आवा रहा?”

22मुला साऊल जिआदा स जिआदा सक्तीसाली होत गवा अउर दमिस्क में बसइया यहूदियन क इ सिद्ध करत भवा कि इ ईसू ही मसीह अहइ, हरावइ लाग।

साऊल क यहूदियन स बच निकरब

23बहोत दिन बीति जाए क पाछे यहूदियन ओका मारि डावइ क षडयन्त्र किहैन। 24मुला ओनकइ चाल क पता साऊल क होइ गवा। उ पचे सहर क दुआरन प घात लगाए रहत रहेन जेहसे ओका मारि डावइ। 25मुला ओकर चलन ओका राति में उठाइ लइ गएन अउर झउआ में बइठाइके सहर क चहरदीवार के छेदे स ओका खाले उतारि दिहैन।

यरूसलेम में साऊल क पहुँचब

26फिन जब उ यरूसलेम पहुँचा तउ उ चलन क संग मिलइ क जतन करइ लाग। मुला उ पचे तउ ओसे ससान

पद 37 'प्रेरितन क काम' की कछू बाद की प्रतियन में पद 37 मिलत ह: “फिलिप्पुस जवाब दिहैस, ‘जदि तू आपन पूरंपूर हिरदय स बिसवास करत ह तउ लइ सकत ह।’ अधिकारी कहैस, ‘हाँ! मइँ पतियात हउँ कि ईसू मसीह परमेस्सर क पूत अहइ।’”

रहेन। ओनका इ बिसवास नाहीं रहा कि उ भी ईसू का एक चेलन अहइ। 27मुला बरनाबास ओका आपन संग प्रेरितन क लगे लइ गवा अउर उ ओनका बताएस कि साऊल पर्भू क राहे में कउने तरह लखेस अउर पर्भू ओसे कइसे बतियायन ह। अउर दमिस्क में कउने तरह उ बेडर होइके ईसू क नाउँ क प्रचार करइ लाग।

28फिन साऊल ओनके संग यरुसलेम में अजादी स आवइ जाइ लाग। उ बेडर होइके पर्भू क नाउँ क प्रबचन करत रहा। 29उ यूनानी भाखा क बोलवइया क साथ तहतुक अउर धरम चर्चा करत रहा मुला उ सबइ तउ ओका मारि डावा चाहत रहेन। 30मुला जब भाई लोगनक इ बात क पता लाग तउ उ पचे ओका कैसरिया लइ गएन अउर फुन ओका तस्सुस पहोंचाइ दिहेन। 31इ तरह समूचइ यहूदिया, गलील अउर सामरिया क कलीसिया क उ समइ सांति स बीति गवा। उ कलीसिया अउर जिआदा सक्तीसाली होइ लाग। काहेकि उ पर्भू स डेराइके आपन जिन्नगी काटत रही, अउर पवित्तर आत्मा ओका अउर जिआदा हिम्मत देत रही तउ ओकर गनती बाढ़इ लाग।

लुदा अउर याफा में पतरस

32फिन उ समूचइ पहँटा में टहरत घूमत पतरस लुदा क संत लोगन स भेटइ पहोंचा। 33हुवों ओका एनियास नाउँ क एक मनई मिला जउन आठ बरिस स बिछउना प ओलरा रहा। ओका लकुआ मारि गवा रहा। 34पतरस ओसे कहेस, “एनियास, ईसू मसीह तोहका चंगा करत ह। खड़ा हवा अउर आपन बिछउना सोझ करा!” तउ उ तुरंत खड़ा होइ गवा। 35फिन लुदा अउर सारोन में बसइया सब मनइयन ओका लखेन अउर उ पचे पर्भू कइँती घूमि गएन। 36याफा में तबीता नाउँ क एक चेली रहत रही (जेकर यूनानी अनुवाद अहइ दोरकास अरथ अहइ “हिरनी”)। हमेसा नीक नीक काम करत अउर गरिबन क दान देत। 37ओनही दिनों उ बीमार भइ अउर मरि गइ। उ पचे ओकरे लहासे क नहवाइके सीढ़ी क ऊपर खोली में धइ दिहेन। 38लुदा याफा क लगे रहा, तउ चेलन जबहिं इ सुनेन कि पतरस लुदा में बाटइ तउ उ पचे ओकरे लगे दुइ मनई पठएन कि उ सबइ ओसे बिनती करई, “अनुग्रह कइके हाली स हाली हमरे लगे आइ जा!”

39तउ पतरस तइयार होइके ओनके संग चला गवा। जब पतरस हुवों पहोंचा तउ उ पचे ओका सीढ़ी क ऊपर खोली में लइ गएन। हुवों सबहिं विधवावन छाती पीटिके रोवत भइन अउर उ सबइ कुर्ती अउर ओढ़ना क, जेनका दोरकास बनाए रहा; जबहिं उ पचे ओकरे संग रहिन देखोंवत भइन खड़ी होइ गइन। 40पतरस हर कउनो क बाहेर पठएस अउर घुटना क बल निहुरिके ओसे पराथना किहेस। फिन लहास कइँती घूमत भवा बोला, “तबीता-खड़ी होइजा!” उ आपन आँखिन उघारेस अउर पतरस क लखतन भइ उठिके बइठी। 41ओका आपन हाथ दइके पतरस खड़ा किहेस अउर फिन संत अउर विधवावन क बोलवाइ के ओनका ओका जिन्दा सौप दिहेस।

42समूचइ याफा में हर कउनो क इ बात क पता लग गवा अउर बहोत स मनइयन पर्भू में बिसवास किहेन। 43फिन याफा में समौन नाउँ क एक चमार क हियाँ पतरस बहोत दिनों तक रूका रहा।

पतरस अउर कुर्नेलियुस

10 कुर्नेलियुस नाउँ क एक मनई कैसरिया में रहा। उ फउज क उ दले क नायक रहा जेका इतालवी कहा जात रहा। 2उ परमेस्सर स डेरोंइवाला भगत रहा अउर वइसा ही ओकर परिवार भी रहा। उ गरीबन क मदद करइ बरे दिल खोलिके दान देत रहा अउर हमेसा ही परमेस्सर क पराथना करत रहत रहा। 3दिन क नवे* पहर क नगिचे उ एक दर्सन में साफ साफ लखेस कि परमेस्सर क एक सरगदूत ओकरे लगे आवा ह अउर ओसे कहत ह, “कुर्नेलियुस।”

4तउ कुर्नेलियुस डेरात भवा सरगदूत कइँती लखत भवा बोला, “हे पर्भू, इ का अहइ?”

सरगदूत ओसे कहेस, “तोहार पराथना अउर गरीब गुरबा क दिया भवा तोहार दान एक यादगार क रूप में तोहार याद दियावइ बरे परमेस्सर क लगे पहोंचा अहइ। 5तउ कछू मनइयन क याफा पठवा अउर समौन नाउँ क एक मनई क, जउन पतरस कहा जात ह, हिआँ बोलौइ ल्या। 6उ समौन नाउँ क एक चमार क हिआँ रहत ह। ओकर घर समुदर क किनारे बा।” 7उ सरगदूत जउन ओसे बात करत रहा, जब चला गवा तउ उ आपन दुइ नउकरन अउर आपन खुद क सहायक लोगन में स एक भक्त सिपाही क बोलाएस 8अउर जउन कछू भवा रहा, ओनका सब कछू बताइके याफा पठइ दिहेस।

9अगले दिन जब उ पचे चलतइ चलत सहर क निचके पहोंचइ क ही रहेन, पतरस दुपहरिया में पराथना करइ छल्ले प चढ़ा। 10ओका भूख लाग, तउ उ कछू खाइ चाहत रहा। उ पचे जब खइयाके तइया करत रहेन तउ ओकर समाधि लग गइ। 11अउर उ लखेस कि अकास खुलि गवा अहइ अउर एक बड़वार चदर जइसी चीज तरखाले उतरत बा। ओका चारिहुँ कइँती स धइके धरती प उतारा जात बा। 12ओह प हर तरह क पसु, धरती प रेंगइ वाला जीव-जंतु अउर अकासे क पंछी रहेन। 13फिन एक अवाज ओसे कहेस, “पतरस उठ, मार अउर खा।”

14पतरस कहेस, “पर्भू, फुरइ तउ नाहीं, काहेकि मई कबहुँ भी अपवित्तर या असुद्ध चीज क नाहीं खाएँ ह।” 15एँह पइ ओनका दूसरी बार फिन अकासबाणी सुनाई दिहेस, “कउनो भी चीज क जेका परमेस्सर पवित्तर बनाए अहइ, ओनका तू ‘अपवित्तर’ न काह!” 16तीन दाई अइसा ही भवा अउर उ पूरी वस्तु फिन अकास में वापिस उठाइ लीन्ह गइ।

17पतरस जउने दर्सन जेका लखे रहा क अरथ क बारे में दुबिधा करत रहा, कुर्नेलियुस क पठए भए लोग दुआरे प ठाइ भवा पूछत रहेन, “समौन क घर कहाँ बा?” 18उ सबइ

नवे दिन क तीन बजे।

बाहेर गोहरावत भए पूछेन, “का पतरस कहा जाइवाला समौन मेहमान क रूप में हियँई रूका अहइ?”

19पतरस अबहिँ उ दर्सन क बारे में सोचत ही रहा कि आतिमा ओसे कहेस, “सुना! तोहका तीन मनई हेरत अहई। 20तउ खड़ा हवा, अउर तरखाले उतरिके बेझिझके चला जा, काहेकि ओनका मई ही पठएउँ ह।” 21इ तरह पतरस तरखाले उतरि आवा अउर ओन मनइयन स बोला, “मई उहइ अहउँ, जेका तू हेरत बाटया। तू काहे आया ह?”

22उ पचे बोलेन, “हम सबनक फऊजीनायक कुर्नेलियुस पठाएस ह। उ अच्छा मनई अहइ अउर सच्चे परमेस्सर क आराधना करत ह। यहूदी मनइयन में ओकर बहोत सम्मान अहइ। पवित्तर सरगदूत ओसे तोहका आपन घरे नेउतइ बरे कहे अहइ अउर जउन कछू कहइ ओका सुनइ बरे कहे अहइ।” 23एँह पइ पतरस ओका भितरे बोलाइ लिहस अउर ठहरइ क जगह दिहस।

फिन दूसर दिन तइयार होइके उ ओनके संग चला गवा। अउर याफा क निवासी कछू अउर बंधु भी ओकरे संग होइ गएन। 24दूसर दिन उ कैसरिया पहुँच गवा। हुवाँ आपन खास मित्र अउर नातेदार क बोलाइके कुर्नेलियुस ओनका जोहत रहा। 25पतरस अब भीतर पहुँचा तउ कुर्नेलियुस ओसे भेंटइ आवा। कुर्नेलियुस श्रद्धा स ओकरे गोड़वा प गिरत भवा ओका प्रणाम कियेस। 26मुला ओका उठावत भवा पतरस बोला, “ठाइ हवा! मई तउ खुद सिरिफ एक मनई हउँ।” 27फिन ओकरे संग बात करत करत उ भितरे चला गवा। अउर हुवाँ उ बहोत स मनइयन क बटोरेस।

28उ ओनसे कहेस, “तू सबइ जानत ह कि एक यहूदी बरे गैर यहूदी जाति क मनई क संग कउनो सम्बंध रखब या ओकरे हियाँ जाब विधान क खिलाफ अहइ मुला तउ भी परमेस्सर मोका देखाएस ह कि मई कउनो भी मनई क ‘असुद्ध’ या ‘अपवित्तर’ न कहउँ। 29यह बरे मोका जब बोलावा गवा तउ मई बिना कउनो एतराज क आइ गएउँ। यह बरे मई तोहसे पूछत हउँ कि तू मोका काहे बरे बोलाया ह।”

30एँह पइ कुर्नेलियुस कहेस, “चार दिन पहिले इहइ समइ दिन क नवें पहर (तीन बजे) मई आपन घरे में पराथना करत रहेउँ। एकाएक चमचमात ओढ़ना में एक मनई मोरे समन्वा आइके खड़ा भवा। 31अउर बोला, ‘कुर्नेलियुस! तोहार बिनती सुनि लीन्ह गइ अहइ अउर गरीब गुग्बन क दीन्ह भवा तोहार दान परमेस्सर क समन्वा याद कीन्ह ग अहई। 32यह बरे याफा पठइके पतरस कहावावइवाला समौन क बोलवाइके पठावा। उ समुद्धर क किनारे चमार समौन क घरे रूका बा।’ 33यह बरे मई तुरंतहि तोहका बोलवावइ पठावा ह अउर हिआँ आवइ क कृपा कइके बहोत नीक किहा ह तउ अब पर्भू जउन कछू आग्या तोहका दिए अहई, उ सब कछू सुनइ बरे हम पचे हिआँ परमेस्सर क अगवा हाजिर अही।”

कुर्नेलियुस क घरे पतरस क उपदेस

34फिन पतरस बोलइ लाग अउर कहेस, “फुरइ अब मई समुझ गवा हउँ कि परमेस्सर कउनो भेद-भाव नाहीं राखत 35बल्कि हर जाति क कउनो मनई जउन ओसे डेरात ह अउर

नीक काम करत ह, उ ओका अपनावत ह। 36इहइ अहइ उ संदेसा जेका उ ईसू मसीह स सांति क सुसमाचार क उपदेस देत भवा इस्त्राएल क मनइयन क दिहे रहा। उ सबहिँ का पर्भू अहइ।

37“तू पचे उ बड़की घटना क जानत ह, जउन समूचइ यहूदिया में भइ रही। गलील स सुरु होइके यहून्ना क जरिए बपतिस्मा दीन्ह जाए क पाछे जेकर प्रचार कीन्ह गवा रहा। 38तू सबइ नासरी ईसू क बारे में जानत ह कि परमेस्सर पवित्तर आतिमा स अउर सक्ती स ओकर अभिसेक कइसे किये रहा अउर उतिम कारज करत भवा अउर ओन सब क जउन सइतान क बस में रहेन, नीक करत भवा चारिहुँ कइँती उ कइसे घूमत रहा। काहेकि परमेस्सर ओकरे संग रहा।

39“अउर हम पचे ओन सब बातन क साच्छी अही जेनका उ यहूदियन क पहुँटा अउर यरूसलेम में किये रहा। उ पचे ओका ही एक ठु लकड़ी के सलीब प टाँगिके मारि डायन। 40मुला परमेस्सर तीसरे दिन ओका फिन स जिन्दा कइ दिहस अउर ओका परगट कराएस। 41सब मनइयन क समन्वा नाहीं मुला ओन साच्छियन क अगवा जउन परमेस्सर क हीला स पहिले ही चुन लीन्ह गएन। अरथ अहइ हमरे समन्वा जउन मर भएन में स जी जाए क पाछे ओकरे संग खाएन अउर पीएन।

42“उहइ हमका हुकुम दिहे अहइ कि हम लोगन क उपदेस देई अउर सिद्ध करई कि इ उहइ, अहइ जउन परमेस्सर क हीला स जिन्दा भएन अउर मरे भएन में स निआव करइवाला मुकरर कीन्ह गवा अहइ। 43सब नबी लोग ओकरे बारे में साच्छी दिहे अहई कि ओहमा बिसवास करइवाला हर मनई ओकरे नाउँ क हीला स पापनक छमा पावत ह।”

गैर यहूदियन प पवित्तर आतिमा क उतरब

44पतरस अबहिँ इ बातन क करत ही रहा कि ओन सब प पवित्तर आतिमा उतरि आइ जउन सुसमाचार सुने रहेन। 45काहेकि पवित्तर आतिमा क बरदान गैर यहूदी प उड़ेरा जात रहा, तउ पतरस क संग आए भए यहूदी अचरज में पड़ि गएन। 46उ पचे किसिम किसिम क भाखा बोलत रहेन अउर परमेस्सर क स्तुति करत भए अनकत रहेन। तब पतरस बोला, 47“का कउनो इ मनइयन क बपतिस्मा देइ बरे, जल आसानी स देइ बरे मना कइ सकत ह? एँनका भी वइसे ही पवित्तर आतिमा मिलि गवा ह, जइसेन हम पचन का।” 48इ तरह उ ईसू मसीह क नाउँ में ओनका बपतिस्मा देइ क हुकुम दिहस। फिन पतरस स उ पचे पराथना कियेन कि कछू दिन ओनकइ संग ठहरइ।

पतरस क यरूसलेम लौटब

11 समूचइ यहूदिया में भाइयन अउर प्रेरितन सुनेन कि परमेस्सर क बचन गैर यहूदी भी मान लिहे अहई। 2तउ जब पतरस यरूसलेम पहुँचा तउ उ पचे जउन खतना क चाहत रहेन, ओकर नुक्ताचीनी कियेन। 3उ सबइ कहेन, “तू खतना क बिना मनइयन क घरे गवा अहा अउर तू ओनकइ संग खइया क खाया ह!”

4^{एँह} पइ पतरत सच जउन भवा रहा, ओका सुनावइ समुझावइ लाग। 5^{मई} याफा सहर में पराथना करत भवा समाधि में एक दर्सन कीन्ह। मई निहारेउँ कि एक बड़की चद्दर जइसी कउनो चीज खाले उतरत बा, ओका चारिहूँ कोना स धइके अकासे स धरती प उतारा जात अहइ। फिन उ उतरिके मोरे लगे आइ गइ। 6^{मई} ओका धियान स लखेउँ कि ओहमाँ धरती क चौपाया जीव-जंतुं, जंगली पसु रेंगइ वाला जीव अउर अकासे क पंछी रहेन। 7^{फिन} मई एक अवाज सुनेउँ, जउन मोसे कहत रही, 'पतरस उठा, मारा अउर खाइ ल्या।'

8^{मुला} मई कहेउँ, 'पर्भू, निहचय रूप स तउ नार्हीं, काहेकि मई कबहुँ भी कउनो तुच्छा या समइ क अनुसार कउनो बे पवित्तर अहार क नार्हीं खाएउँ ह।'

9^{अकास} स दूसर दाई उ अवाज फिन कहेस, 'जेका परमेस्सर पवित्तर बनाएस ह, ओका तू अपवित्तर जिन समुझा।'

10^{तीन} दाई अइसा ही भवा। फिन उ सब अकास में वापिस उठाइ लीन्ह गवा। 11^{उहइ} समइ जहाँ मई ठहरा रहेउँ, उ घरे में तीन मनई आइ गएन। उ पचे मोरे लगे कैसरिया स पठवा ग रहेन। 12^{आतिमा} मोका ओनकइ संग बेझिझके चला जाइ बरे कहेस। इ छः भाई भी मोरे संग गएन। अउर हम पचे उ मनई क घरे में चला गए। 13^उ हमका बताएस कि एक सरगदूत क आपन घरे में ठाइ उ कइसे लखेस। जउन कहत रहा, 'याफा पठइके पतरस कहावावइवाला समौन क बोलवाइ ल्या। 14^उ तोहका बचन सुनाई जेहसे तोहार परिवार क उद्धार होइ।'

15^{जब} मई प्रबचन सुरु कीन्ह तब पवित्तर आतिमा ओन पइ उतरि आइ। ठीक वइसेन जइसे सुरु में हम पइ उतरी रही। 16^{फिन} मोका पर्भू क कहा भवा बचन याद होइ गवा, 'यूहन्ना पानी स बपतिस्मा देत रहा मुला तोहका पवित्तर आतिमा स बपतिस्मा दीन्ह जाइ।' 17^इ तरह जदि परमेस्सर ओनका ही उहइ बरदान दिहेस जेका उ जब हम पचे पर्भू ईसू मसीह में बिसवास कीन्ह, तब्बइ हमका दिहे रहा, तउ खिलाफत करइवाला मई कउन होत हउँ?"

18^{बिसवासी} मनइयन जब इ सुनेन तउ उ पचे प्रस्न करब बंद कइ दिहेन। उ पचे परमेस्सर क महिमा करत भए कहइ लागेन, "अच्छा, तउ परमेस्सर गैर यहूदी मनइयन तलक क मनफिरावइ बरे उ औसर दिहेस ह, जउन जिन्गी कइँती लइ जात ह।"

अन्ताकिया में सुसमाचार क अवाई

19^उ पचे जउन स्तिफनुस क समइ में दीन्ह जात सबइ यातना क कारण तितराइ बितराइ ग रहेन, दूर-दूर तलक फीनीक, साइप्रस अउर अन्ताकिया तलक चलाग रहेन। इ पचे यहूदियन क तजिके कउनो अउर क सुसमाचार नार्हीं सुनावत रहेन। 20^{एनही} बिसवासी मनइयन में स कछू साइप्रस क अउर कुरेनी क रहेन। तउ जब उ पचे अन्ताकिया आएन तउ यूनानियन क भी प्रबचन देत भए पर्भू ईसू क सुसमाचार सुनावइ लागेन। 21^{पर्भू} क सक्ती ओनकइ संग

रही। तउ एक बड़ा मनइयन क मजमा बिसवास धइके पर्भू कइँती मुड़ि गवा।

22^{एँकर} खबर जब यरूसलेम में कलीसिया क काने तलक पहुँची तउ उ पचे बरनाबास क अन्ताकिया जाइके पठएन। 23^{जब} बरनाबास हुँवा पहोंचिके परमेस्सर क अनुग्रह क सकारथ होत लखेस तउ उ बहोत खुस भवा अउर उ ओन सबहिं क पर्भू बरे भक्ति भरा हिरदय स बिसवासी बनइ बरे हिम्मत देवोंएस। 24^{काहेकि} उ पवित्तर आतिमा अउर बिसवास स भरा भवा एक भरपूर उत्तिम मनई रहा। फिन पर्भू क संग एक बड़वार मनइयन क मजमा जुड़ गवा।

25^{बरनाबास} साऊल क हेरइ तरसुस क चला गवा। 26^{फिन} उ ओका हेरिके अन्ताकिया लइ आवा। पूरे साल भइ उ पचे कलीसिया स मिलत जुलत अउर बड़का मनइयन क मजमा क उपदेस देत रहेन। अन्ताकिया में सबन त पहिले एँही चेलन क "मसीही" कहा गवा।

27^{इहइ} समइ यरूसलेम स कछू नबी अन्ताकिया आएन। 28^{ओनमाँ} स अगबुस नाउँ क एक नबी खड़ा होइके पवित्तर आतिमा क जरिये इ भविस्सबाणी किहेस कि सारी दुनिया में एक खउफनाक अकाल पड़ी (क्लौदियुस क समइ इ अकाल पड़ा रहा।) 29^{तब} हर चेलन आपन ताकत देखिके यहूदिया क बसइयन बंधु क मदद बरे कछू पठवइ क ठान लिहेन। 30^{तउ} उ पचे अइसा ही किहेन अउर उ पचे बरनाबास अउर साऊल क हाथ स यहूदिया में आपन बुजुर्गन क लगे उपहार पठएन।

हेरोदेस क कलीसिया प जुल्म

12^{उहइ} समइया क लगभग राजा हेरोदेस कलीसिया क कछू निअंबर क सताउब सुरु किहेस। 2^उ यूहन्ना क भाई याकूब क तरवार स कतल कराइ दिहेस। 3^उ जब इ लखेस कि इ बात स यहूदी खुस होत हीं तउ उ पतरस क भी गिरफतार करइ बरे सोचेस (इ बे खमीरे क रोटी क उत्सव क दिनन क बात अहइ) 4^{हेरोदेस} पतरस क धइके जेलि में धाँध दिहेस। ओका चार चार सिपाहियन क कतार क पहरा लगाइ दीन्ह गवा। मतलब इ रहा कि ओह प मुकदमा चलावइ बरे फसह क त्यौहार पाछे ओका मनइयन क समन्वा बाहेर लइ आवा जाइ। 5^{तउ} पतरस क जेल में रोक दीन्ह गवा। ओहर कलीसिया हिरदय स ओकरे बरे परमेस्सर स पराथना करत रही।

जेल स पतरस क छूटब

6^{जब} हेरोदेस मुकदमा चलावइ बरे ओका बाहेर लोगन क सामने लइ आवइ क रहा, उ रात पतरस दुइ सिपाहियन क बीच सोवा रहा। उ दुइ जंजीरे स बँधा रहा अउर दुआर प पहरुआ जेल क रखवारी करत रहेन। 7^{एकाएक} पर्भू क सरगदूत हुँवा आइके खड़ा भवा, जेल क खोली रोसनी स जगमगाइ उठी। उ पतरस क बगली थपथपाएस अउर ओका जगावत भवा कहेस, "हाली, खड़ा हवा!" जंजीर ओकरे हाथ में खुलके गिरि गइ। 8^{तबहिं} सरगदूत ओका कहेस, "तइयार हवा अउर आपन चप्पल पहिरा।" तउ पतरस वइसा ही

किहेस। सरगदूत ओका फिन कहेस, “आपन चोगा पहिरा अउर मोरे पाछे चला आवा।”

१फिन ओकरे पाछे-पाछे पतरस बाहेर निकरि आवा। उ समुझ नाहीं पाएस कि सरगदूत जउन कछू करत रहा, उ फुरइ रहा। उ बिचारेस कि उ कउनो दर्सन लखत अहइ। 10पहिले अउर दूसर पहरे क छोड़िके आगे बढत भवा उ पचे लोहा क उ फाटक प आइ गएन जउन सहर कइँति जात रहा। उ फाटक ओनकइ बरे खुद ही खुलि गवा। अउर उ पचे बाहेर निकरि गएन। उ पचे अबहिँ गली क पार किहेन कि उ सरगदूत एकाएक ओका छोड़ि गवा। 11फिन पतरस क जइसे होस आवा, उ बोला, “अब मोरी समझ में आवा ह कि असल में फुरइ अहइ कि पर्भू आपन सरगदूत क पठइके हेरोदेस क पंजा स मोका छुटकारा दियाएस ह। यहूदी लोग मोह प जउन कछू बुरा होइ क सोचत रहेन, ओहसे उहइ मोका बचाएस ह।”

12जब उ इ समझ गवा तउ उ यूहन्ना क महतारी मरियम क घर चला गवा। (यूहन्ना जउन मरकुस भी कहवावत ह।) हुँवा ढेर मिला बटुरा रहेन अउर पराथना करत रहेन। 13पतरस दुआरे क बाहेर स खटखाटाएस। ओका लखइ रुदे नाउँ क एक दासी हुँवा आइ। 14पतरस क अवाज क पहिचान के खुपी क मारे ओकरे बरे फाटक बगैर खोले भए उ उलटिके भीतर दउइ आइ अउर उ बताएस कि पतरस दुआरे प खड़ा अहइ। 15उ पचे ओसे बोलेन, “तू पागल होइ गइ अहा।” मुला उ जोर दइके कहतइ रही कि इ अइसा ही अहइ। ऐह पँइ उ पचे कहेन, “उ ओकर सरगदूत होइ।”

16ओहर पतरस दुआर खटखाटावत ही रहा। फिन उ पचे जब दुआर खोलेन तउ उ पचे अचरज में पड़ि गएन। 17ओनकइ हाथे स चुप रहइ क इसारा करत भए उ खोलिके बताएस कि पर्भू ओका जेलि स कइसे बाहेर निकारेस ह। उ कहेस, “याकूब अउर दूसर भइयन क इ बारे में बताइ दिहा।” अउर तब उ ठहर क तजिके कउनो दूसर स्थान प चला गवा।

18जब भोर भवा तउ पहरुअन में बड़ी खलबली मचि गइ। उ पचे अचरज में पड़ा सोचत रहेन कि पतरस क संग का भवा होइ। 19ऐकरे पाछे हेरोदेस जब ओकर छानबीन कइ चुका अउर उ ओका नाहीं मिला तउ उ आपन पहरुअन स पूछताछ किहेस अउर ओनका मारि डावइ क हुकुम दिहेस।

हेरोदेस क मउत

हेरोदेस फिन यहूदिया स जाइके कैसरिया में रहइ लाग। हुँवा उ कछू समइ बिताएस। 20उ सूर अउर सैदा क मनइयन स बहोत कोहान रहत रहा। उ पचे एक झुण्ड बनइके ओसे भैटइ आइ रहेन। राजा क खुद क सेवक बलास्तुस क मान मनउवल कइके उ पचे हेरोदेस स सांति क पराथना किहेन काहेकि ओनकइ देस क राजा क देस स खाइक मिलत रहा।

21एक निहचत दिन हेरोदेस आपन राजसी वेस-भूसा पहिरिके आपन सिंहासन प बइठा अउर मनइयन क बियाख्यान देइ लाग। 22लोग चिचियाने, “इ तउ कउनो देवता क बानी अहइ, मनई क नाहीं।” 23काहेकि हेरोदेस परमेस्सर क महिमा नाहीं दिहेस, यह बरे फउरन पर्भू क एक दूत ओका बीमार

कइ दिहेस। अउर ओहमाँ किरवा परि गएन जउन खाइ लागेन अउर उ मरि गवा।

24मुला परमेस्सर क बचन क प्रचार होत रहा अउर उ फइलत जात रहा अउर बिसवासियन की संख्यि बढत जात रही। 25बरनाबस अउर साऊल आपन काम पूरा कइके मरकुस कहवावइवाला यूहन्ना का भी संग लइके अन्ताकिया लौटि आएन।

बरनाबास अउर साऊल क चुना जाब

13 अन्ताकिया क कलीसिया में कछू नबी अउर बरनाबास, समौन (नीगर) कहा जाइवाला समौन कुरेनी क लूकियुस, देस क चउथाई हींसा क राजा हेरोदेस क संग पालितयोसित मनाहेम अउर साऊल जइसे कछू सिच्छक रहेन। 2उ पचे जब उपवास करत भए पर्भू क आराधना में लाग रहेन, तबहिँ पवित्तर आतिमा कहेस, “बरनाबास अउर साऊल क जउने काम बरे मई बोलाएउँ ह, ओका करइ बरे मोरे निस्बत, ओनका अलगाइ द्या।”

3तउ जब सिच्छक अउर नबी आपन उपवास अउर पराथना पूरी कइ चुकेन तउ उ पचे बरनाबास अउर साऊल प आपन हाथ धरेन अउर ओनका बिदा कइ दिहेन।

बरनाबास अउर साऊल क साइप्रस जात्रा

4पवित्तर आतिमा क जरिए पठए भए उ सबइ सिलूकिया गएन जहाँ स जहान में बइठिके उ पचे साइप्रस पहोंचेन। 5फिन जब उ पचे सलमीस पहोंचेन तउ उ पचे यहूदियन क आराधनालय में परमेस्सर क बचन क प्रचार किहेन यूहन्ना सहायक क रूप में ओनकइ संग रहा।

6उ समूचइ द्वीप क जात्रा करत करत उ पचे पाफुस ताई जाइ पहोंचेन। हुवाँ ओनका एक जादूगर मिला, उ झूठा नबी रहा। उ यहूदी क नाउँ रहा बार-ईसू। 7उ एक बहोत बुद्धिमान पुरुस राज्यपाल सिरगियुस पौलुस क दोस्त रहा जउन फिन परमेस्सर क बचन सुनइ बरे बरनाबास अउर साऊल क बोलवाएस। 8मुला इलीमास जादूगर ओनकइ खिलाफत किहेस (इ बार-ईसू क अनुवाद क नाउँ बा।) उ नगर-पति क बिसवास दुगावइ क जतन किहेस।

9फिन साऊल जेका पौलुस भी कहा जात रहा, पवित्तर आतिमा स भरपूर होइके इलीमास प पैनी निगाह डारत भवा कहेस, 10“सबहिँ तरह क छल अउर धूर्तताई स भरा, अरे सइतान क बेटहना, तू हर नेकी क दुस्मन अहा। का तू पर्भू क सोझ सच्चे राह क तोड़ब मरोड़ब न तजब्या? 11अब लखा पर्भू क हाथन तोह प आइ पड़ा बा। तू आँधर होइ जाब्या अउर कछू समइ बरे सूरज तक भी नाहीं लख पउब्या।”

तुरंतहिँ एक धूँध अउर अँधियारा होइ पइ छाइ गवा अउर एहर-ओहर टोवइ लाग कि कउनो हथवा धइके ओका चलावइ। 12तउ राज्यपाल, जउन कछू भवा रहा, जब ओका लखेस तउ उ बिसवास धरेस। उ पर्भू क बाबत उपदेसन स बहोत होइ गवा।

पौलुस अउर बरनाबास क साइप्रस स जाब

13फिन पौलुस अउर ओकर संगी पाफुस स नाउ क जरिये पंपूलिया क पिरगा में आइ गएन। मुला यूहन्ना ओनका हुँवइ छोड़िके यरूसलेम लौटि आवा। 14ओहर उ पचे आपन जात्रा प बढ़त भए पिरगा स पिसिदिया क नजदीक नगर अन्ताकिया में आइ गएन। फिन सबित क दिना यहूदी आराधनालय में जाइके बइठि गएन। 15मूसा क व्यवस्था क मुताबिक अउर नबियन क पोथी क पाठ कइ चुके क पाछे यहूदी आराधनालय क अधिकारियन ओनकइ लगे इ संदेसा कहवाइ पठएन, “भाइयो, मनइयन क उपदेसन देइ बरे तोहरे लगे कहइ क प्रोत्साहन क कउनो अउर बचन अहइ जउन ओका सुनावा।”

16एँह पइ पौलुस खड़ा भवा अउर आपन हाथ हिलावत भवा बोलइ लाग, “हे इस्राएल क मनइयो अउर परमेस्सर स डेराइवाले गैर यहूदियो, सुना: 17इ इस्राएल क मनइयन क परमेस्सर हमरे पूर्वजन क चुने रहा अउर जब हमार लोग मिस्र में ठहरा रहेन, उ ओनका महान बनाए रहा अउर आपन महान सवित स उ ओनका उ धरती स बाहेर निकारि लइ आवा रहा। 18अउर लगभग चालीस बरिस तलक उ जंगल में ओनकइ मदद करत रहा। 19अउर कनान देस क सात जातियन क नास कइके उ धरती इस्राएल क मनइयन क वसीयत क रूप में दइ दिहेस। 20इ सब कछू में लगभग साढ़े चार सौ बरिस लगेन।

“एँकरे पाछे समूएल नबी क समइ तलक उ ओनका अनेक निआव क न्यायकर्ता दिहेस। 21फिन उ पचे एक राजा क निवेदन किहेन, तउ परमेस्सर बिन्यामीन क गोत क एक मनई कीस क बेटवा साऊल क चालीस बरिस बरे ओनका दइ दिहेस। 22फिन साऊल क हटाइके उ ओनकइ राजा दाऊद क बनाएस जेकरे बारे में उ इ साच्छी दिहेस, ‘मईं यिसै क बेटवा दाऊद क एक अइसे मनई क रूप में मिला ह, जउन मोरे मन क मुताबिक अहइ। जउन कछू मईं ओसे करावइ चाहत हउँ, उ उ सब कछू क करी।’

23“इ ही मनई क एक बंसज क आपन प्रण क मुताबिक इस्राएल में उद्धार करइया ईसू क रूप में लाइ चुका अहइ। 24ओकरे आवइ स पहिले यूहन्ना इस्राएल क सबहिं मनइयन में मनफिराव स बपतिस्मा क प्रचार करत अहइ। 25यूहन्ना जब आपन काम क पूरा करइ क रहा, तउ उ कहेस रहा, ‘तू मोका जउन समुझत ह, मईं उ नहीं हउँ। मुला एक अइसा अहइ जउन मोरे पाछे आवत अहइ। मईं जेकर पनही क फीतास खोलइ लायक भी नहीं अहउँ।’

26“भाइयो, इब्राहीम क सन्तानो अउर सच्चे परमेस्सर क आराधक गैर यहूदियो, उद्धार क इ सुसमाचार हमरे बरे ही पठवा ग अहइ। 27यरूसलेम में बसइयन अउर ओनकइ राजा लोगन ईसू क नहीं पहिचानेन। अउर ओका दोखा ठहराइ दिहेन। इ तरह उ पचे नबी लोगन क उ बचन क पूरा किहेन जेनकइ सबित क दिन पाठ कीन्ह जात ह। 28अउर जदि अपि ओनका ओकरे मउत क राजा क कउनो सबूत नहीं मिला, तउ भी उ पचे पलातुस स ओका मरवाइ डावइ क माँग किहेन।

29“ओकरे बारे में जउन कछू लिखा रहा, जब उ पचे सब कछू क पूरा कइ चुकेन ओका क्रूस प स खाले उतारेन अउर एक कब्र में धइ दिहेन। 30मुला परमेस्सर ओका मरइ क पाछे फिन जीवित कइ दिहेस। 31अउर फिन जउन लोग गलील स यरूसलेम तलक ओकरे संग गएन, उ ओनकइ अगवा कइउ दिना ताई परगट होत रहा। इ सबइ अब मनइयन बरे ओकर साच्छी अहइ।

32“हम तोहका उ प्रण क बारे में सुसमाचार सुनावत अही जउन हमरे पूर्वजन क संग कीन्ह गइ रही। 33ईसू क, मरि जाए क पाछे फिन जीवित कइके, ओनकइ संताने क बरे परमेस्सर उहइ सपथ क हमरे बरे पूरा किहेस ह। जइसा कि दूसर भजन संहिता में लिखा भी अहइ:

‘तु मोर पूत अहा, मईं तोहका आजु ही जनम दिहेउँ ह।’
भजन संहिता 2:7

34अउर उ ओका मरे भएन में जिआइ के उठाएस जेहँसे नास होइ स पहिले ओका फिन स लौटब न होइ। उ इ तरह कहे रहा:

‘मईं तोहका उ सबइ पवित्तर अउर न टरइ क असीस देब जेनका देइ क बचन मईं दाऊद क दिहेउँ।’

यसायाह 55:3

35इ तरह एक दूसर भजन में उ कहत ह:

‘तू आपन पवित्तर जने क नास क अनुभव नहीं होइ दिहा।’
भजन संहिता 16:10

36फिन दाऊद आपन जुग में परमेस्सर क प्रयोजन क मुताबिक आपन सेवा-काम पूरा कइके मर गवा, ओका ओकरे पूर्वजन क संग दफनाइ दीन्ह गवा अउर ओकर छय भवा। 37मुला जेका परमेस्सर मरे भएन क बीच क जीवित कइके उठाएस, ओकर छय नहीं भवा। 38-39तउ भाइयो, तू सबन्क जान जाइ चाही कि ईसू क जरिए ही पाप क छमा क उपदेस तोहका दीन्ह गवा ह। अउर इहइ क जरिए हर कउनो जउन बिसवासी अहइ, ओन पापन्स छुटकारा पाइ सकत ह, जेनसे मूसा क व्यवस्था छुटकारा नहीं दियाइ सकत रही। 40तउ होसियार रहा, कहुँ नबियन जउन कछू कहे बाटेन, तू सबन प न घटइ:

41‘निन्दा करइया लोगो, लखा, होइके भउचक्का मरि जाब्या, काहेकि तोहरे जुग में एक कारज अइसा करत हउँ, जेकर चर्चा तलक प तोहका कबहुँ ह बिसवास होई।’

हबक्कुक 1:5

42पौलुस अउर बरनाबास जब हुवाँ स जात रहेन मनइयन ओनसे अगले सबित क दिन अइसी ही अउर बातन बतावइ बरे पराथना किहेन। 43जब सभा खतम भइ तउ बहोत स यहूदियन अउर बहुत गैर यहूदी भक्तन पौलुस अउर बरनाबास क पाछा किहेन। पौलुस अउर बरनाबास ओनसे बातचीत

करत भए बिनती किहेन कि उ सबइ परमेस्सर क अनुग्रह में बन रहई।

44अगले सबित क दिन तउ लगभग समूचा सहर ही पर्भू क बचन सुनइ बरे उमड़ि आवा। 45इ बड़का मनइयन क मजमा क जब यहूदियन लखेन तउ उ पचे बहोत जरि भुनि गएन अउर भद्दा सब्द क बइपरत भए पौलुस जउन कछु कहे रहा, ओकर खिलाफत करइ लागेन। 46मुला पौलुस अउर बरनाबास निडर होइके, “इ जरूरी रहा कि परमेस्सर क बचन पहिले तोका पढ़ावा जात मुला काहेकि तू पचे ओका नकारत अहा अउर तू सबइ आपन खुद क अनन्त जिन्गी क जोगग नाही ठहरउत्या, तउ हम पचे अब गैर यहूदी लोग कइँती मुड़ि जात अही। 47काहेकि पर्भू हमका अइसि ही आग्या दिहे अहइ:

‘मईँ जोति बनाएउँ तोहका, ओनकइ बरे जउन नाही यहूदी, ताकि संसार के सब लोगन का उद्धार करई।’

यसायाह 49.6

48गैर यहूदियन जब इ सुनेन तउ उ पचे बहोत खुस भएन अउर उ पचे पर्भू क बचन क सम्मान किहेन। फिन उ सबइ, जेनका अनन्त जिन्गी पावइ बरे ठहरावा ग रहा, बिसवास धारण कइ लिहेन।

49इ रतह समूचइ पहँटा में पर्भू क बचन क प्रचार होत रहा। 50ओहर यहूदी लोग जँच कुले क धार्मिक स्त्रियन अउर सहर क मुड्ड मनइयन क उसकाएन अउर पौलुस अउर बरनाबास क खिलाफ अत्याचार करब सुरु कइ दिहेन अउर दबाव डाइके ओनका आपन पहँटा स बाहेर निकरिवाइ दिहेन। 51फिन पौलुस अउर बरनाबास ओनकइ खिलाफ आपन गोड़े क धूरि झारिके इकुनियुम क चला गएन। 52मुला अतीक में ओनकइ चलन आनंद अउर पवित्र आतिमा स भरपूर होत रहेन।

इकुनियुम में पौलुस अउर बरनाबास

14 इहइ तरह पौलुस अउर बरनाबास इकुनियुम में यहूदी आराधनालय में गएन। हुवाँ उ पचे इ तरीका स बियाख्यान दिहेन कि यहूदियन क एक बड़का मनइयन क मजमा बिसवास कइ लिहेस। 2मुला उ यहूदियन जउन नाही पातियानेन, गैर यहूदियन क उसकाएन अउर भाई बहनन क खिलाफ दुस्मनी पड़वा कइ दिहेन।

3तउ पौलुस अउर बरनाबास हुवाँ बहोत दिनों तलक ठहरा रहेन अउर पर्भू क बारे में बेडर होइके प्रबचन देत रहेन। ओनकइ हीला स पर्भू अद्भुत कारजन अउर अचरज कारजन करवावत भव आपन द्या क संदेसा क मान करावत रहा। 4ओहर सहर क मनइयन में फूट पड़ि गइ। कछू मिला प्रेरितन कइँती अउर कछू मिला यहूदियन कइँती होइ गएन।

5फिन जब गैर यहूदी लोग अउर यहूदी लोग आपन आपन नेता स मिलिके ओनके संग बुरा बेवहार करइ लागेन (गरियाव) अउर ओन प पाथर लोकावइ क बात चली, 6तउ पौलुस अउर बरनाबास क ँँकर पता लग गवा अउर

पचे लुकाउनिया अउर लुस्त्रा अउर दिरबे जइसे सहरन अउर सासपास क पहँटा में परानेन। 7उ पचे हुवाँ भी सुसमाचार क प्रचार करत रहेन।

लुस्त्रा अउर दिरबे में पौलुस

8लुस्त्रा में एक मनई बइठा भवा रहा। उ आपन गोड़वा स अंपग रहा। उ जन्मत ही लँगड़ा रहा, चल फिन तउ कबहुँ नाही पाएस। 9इ मनई पौलुस क बोलत भए सुने रहा। पौलुस ओह पइ निगाह गड़ाएस अउर लखेस कि चंगा होइ क बिसवास ओहमाँ बा। 10तउ पौलुस जँची अवाज में कहेस, “अपने गोड़वा प सोझ खड़ा ह्वा।” तउ उ ऊपर उछरा अउर चलइ-फिरइ लाग। 11पौलुस जउन कछू किहे रहा, जब भिड़िया ओका लखेस तउ मनइयन लुकाउनिया क भाखा में गोहार लगाइके कहइ लागेन, “हमरे बीच मनई क रूप धइके, देवता उतरि आवा अहई।” 12उ पचे बरनाबास क “जेअस”* अउर पौलुस क “हिरमेस”* कहइ लागेन। (पौलुस क हिरमेस यह बरे कहा गवा काहेकि उ प्रमुख बोलवइया रहा।) 13सहर क सोझइ बाहेर बना जेअस क यहूदियन क मंदिर क पूजारी सहर क दुआरे सोई अउर माल लइके आइ पहाँवा। उ भीड़ क संग पौलुस अउर बरनाबास बरे बलि चढ़ावइ चाहत रहा।

14मुला जब प्रेरितन बरनाबास अउर पौलुस इ सुनेन तउ उ पचे आपन ओढ़ना फाड़ि डानेन अउर उ पचे जँची अवाज में इ कहत भए भीड़ में घुसि गएन, 15“अरे मनइयन, तू पचे इ काहे करत बाटया? हम पचे भी वइसे मनई अही, जइसे तू पचे अहा। हिआँ हम सबइ तू सबन्क सुसमाचार सुनावइ आइ अही ताकि तू पचे बेकार क बातन स मुँह मोड़िके उ सजीव परमेस्सर कइँती लउटा जउन अकास धरती, समुदर अउर एनमाँ स जउन कछू अहइ, ओकर रचना किहेस ह। 16बीत गए काल में उ सबहिं जातियन क आपन आपन राहे प चलइ दिहेस। 17मुला तोहका उ खुद आपन साच्छी दिए बगैर नाही तजेस। काहेकि उ तोहरे संग भलाई किहेस। उ तू पचन्क अकास स बर्खा दिहेस अउर रिनु क मुताबिक फसल दिहेस। उहइ तोहका खइया क देत ह अउर तोहरे मन क आनंद स भरि देत ह।”

18इ बचन क पाछे भी उ पचे भिड़िया क ओनकइ बरे बलि चढ़ावइ स अक्सर नाही रोक सकेन।

19फिन अन्ताकिया अउर इकुनियुस स आए भए यहूदी लोग भीड़ क अपने पच्छ में कइके पौलुस प पाथर लोकाएन अउर ओका मरा जानिके सहर क बाहेर घेराई लइ गएन। 20फिन जब ओकर चलन ओकरे चारिहुँ कइँती बटुरेन, तउ उ उठा अउर सहर में चला आवा अउर फिन अगले दिन बरनाबास क संग उ दिरबे बरे चल पड़ा।

जेअस यूनानी बहोत देवता में बिसवास करत हीं। जेअस ओनकइ एक बहोत महत्व क देवता रहा।

हिरमेस एक अउर दूसर यूनानी देवता। यूनानियन क बिसवास क मुताबिक हिरमेस दूसर देवता क हरकारा (संदेसा लइ जाइवाला)।

सीरिया क अन्ताकिया क लउटब

21उ सहर में उ पचे सुसमाचार क प्रचार कइके बहोत स चेलन बनएन। उ सबइ लुस्रा, इकुनियुम अउर अन्ताकिया लउटि आएन। 22अउर मनवइयन क आतिमन क स्थिर कइके बिसवास में रहइ बरे ओनका कहि क हिम्मत बढ़ाएन, “हमका बड़ा घोर दुख झेलिके परमेस्सर क राज्य में घुसइ क अहइ।” 23हर कलीसिया में उ पचे ओनका नुयुक्त किहेन उ पभू क सौप दिहेन जेहमों उ पचे बिसवास करत रहेन। 24एकरे पाछे पिसिदिया स होत भए उ पचे पंफूलिया आइ गएन। 25अउर पिरगा में जब सुसमाचार सुनाइ चुकेन तउ इटली में आइ गएन। 26हुवाँ स उ पचे अन्ताकिया क जहाज स गएन जहाँ जउने काम क अबहिँ उ पचे पूरा किहेन। उ काम बरे उ सबइ परमेस्सर क अनुग्रह प न्यौछावर होइ गएन।

27अइसे जब उ पचे पहोंचेन तउ उ पचे कलीसिया क मनइयन क बटोरेन अउर परमेस्सर ओनके द्वारा जउन कछू किहेस, ओकर वृत्तांत कहिके सुनाएन। अउर उ पचे एलान किहेन कि परमेस्सर दूसरे देसन क मनइयन बरे बिसवास क दुआर खोले अहइ। 28फिन चेलन क संग हुवा बहोत दिनों तलक ठहरेन।

यरूसलेम में एक सभा

15 फिन कछू लोग यहूदिया स आएन अउर भाई लोगन क सिच्छा देइ लागेन, “जदि मूसा क व्यवस्था क मुताबिक तोहार खतना नाहीं भवा अहइ तउ तोहार उद्धार नाहीं होइ सकत।” 2पौलुस अउर बरनाबास क बिचार मेल नाहीं खात रहा, तउ ओनमों एक बड़ा मत भेद पइदा होइ गवा। यह बरे पौलुस अउर बरनाबास अउर ओनके कछू अउर संगी इ समस्या क हल निकारइ बरे प्रेरितन अउर मुखियन क लगे यरूसलेम पठवइ क ठान लिहेन।

3उ पचे कलीसियन क जरिए पठवा गाएन अउर फीनीके अउर सामरिया होत भए अधर्मियन क हिरदय बदलत भए भाई बहिनियन क समाचार सुनाइके खुस करत रहेन। 4फिन जब उ पचे यरूसलेम पहोंचेन तउ कलिसिया, प्रेरितन अउर बुजुर्ग लोगन अगवानी किहेन। अउर उ पचे ओनके संग परमेस्सर जउन किहे रहा, उ सब कछू ओनका कहिके सुनाएन। 5एँह पइ फरीसियन क दल क कछू बिसवासि खड़ा भएन अउर बोलेन, “ओनकइ खतना जरुर कीन्ह जाइ चाही अउर ओनका हुकुम देइ चाही कि उ पचे मूसा क व्यवस्था क पालन करई।”

6तउ इ सवाल प बिचार करइ बरे प्रेरितन अउर बुजुर्गन आपुस में बटुर गएन। 7एक लम्बी चौड़ी तहलतुक पाछे पतरस खड़ा भवा अउर ओनसे बोला, “भाइयो, तू पचे जानत ह कि बहोत दिना पहिले तोहमों स परमेस्सर एक चुनाव किहे रहा कि मोरे हीला स गैर यहूदियन लोग सुसमाचार क संदेसा सुनइहीं अउर बिसवास करिहीं। 8अउर अन्तर्त्यामी परमेस्सर हमरे ही तरह ओनका भी पवित्तर आतिमा क बरदान दइके, ओकरे बारे में आपन समर्थन देखाए रहा। 9बिसवास क जरिए ओनकइ हिरदय क पवित्तर

कइके हमरे अउर ओनके बेच उ कउनो भेद-भाव नाहीं किहेस। 10तउ अब चेलन क गटइया प एक अइसा जुआ लादिके जेका न हम उठाइ सकित अही अउर न हमार पूर्वज तू पचे परमेस्सर क गुस्सा करावइ चाहत ह? 11मुला हमार तउ इ बिसवास अहइ कि पभू ईसू क अनुग्रह स जइसे हमार उद्धार भवा ह, वइसे ही हमका भरोसा अहइ कि ओनकइ भी बचाव जाई।”

12एँह पइ समूचा दल सन्न मारि गवा अउर बरनाबास अउर पौलुस क बोलब सुनई लागेन। उ पचे, गैर यहूदियन क बीच परमेस्सर ओनकइ हीला स दुइ अद्भुत कारजन परगट किहे रहा, अउर अचरज कारजन किहे रहा, ओकरे बाबत बतावत रहेन। 13उ पचे जब बोल चुकेन तउ याकूब कहइ लाग, “भाइयो, मोरउ सुना।

14समौन बताए रहा कि परमेस्सर गैर यहूदियन में स कछू लोगनक आपन नाउँ बरे चुनिके सबन ते पहिले कइसे पिरम परगट किहे रहा। 15नबी लोगनक बचन भी इ बात क समर्थन करत हीं। जइसा कि लिखा बाटइ:

16अउर जाबइ मई एकरे पाछे, फिन स दाऊद क उ घरे क खड़ा करब जउन गिर चुका ह। फिन स ओकर खण्डहर क सँवारब, फिन स पुराने क उद्धार करब।

17काहेकि जउन बचा अहई उ सबइ गैर यहूदी सबहिँ जउन अब मोर कहवावत हीं, पभू क हेरई।

आमोस 9:11-12

18उहइ पभू इ बात क कहत ह, जउन जुग-जुग स इ बातन क परगट करत रहा।

19“इ तरह मोर इ निर्णय अहइ कि हमका ओन मनइयन क, जउन गैर यहूदी होत भए परमेस्सर कइँती घूमा अहई, सतावइ नाहीं चाही। 20मुला हमका तउ ओनके लगे लिखिके पठवइ चाहीं। हमका ओनका इ बातन क बतावइ चाही:

मूरत क चढ़ावा भवा खइया क जिन खा (एँसे खइया क अपवित्तर होत ह।) कउनो तरह क व्यभिचार जिन करा लहू क कबहुँ जिन चखा। गटइ घोटिके मारा गवा गोरु क मांस जिन खा।

21ओन पचनक क इ बात न करइ चाही, काहेकि हर सहर में मनइयन (यहूदी) बाटेन जउन मूसा क व्यवस्था सिखावत हीं। हर सबित क दिन मूसा क व्यवस्था क तरीका स पाठ आराधनालय में बरिसन स होत आवत ह।”

गैर यहूदी बिसवासियन क नाउँ चिट्ठी

22फिन प्रेरितन अउर बुजुर्गन समूचइ कलीसिया क संग इ निहचय किहेन कि ओनमों स कछू लोगन क चुनिके पौलुस अउर बरनाबास क संग अन्ताकिया पठवा जाइ। तउ उ पचे बरसब्बा कहा जाइवाला यहूदा अउर सीलास क चुन लिहेन। उ सबइ भाइयन में यरूसलेम में मान्य रहेन। 23उ पचे ओनकइ हाथे स इ चिट्ठी पठएन:

तोहरे बंधु, बुजुर्ग अउर प्रेरितन कइँती स अन्ताकिया, सीरिया अउर किलिकिया क गैर यहूदी भाइयन क नमस्ते पहुँचइ मोरे भाइयन,

24हम पचे जब त इ सुना ह कि हम स कउनो आदेस पाए बिना ही, हम पचन में स कछू मनइयन जाइके आपन सब्दन स तोहार जिअर दुखी किहेन हे, अउर तोहरे मन क नाहीं थिरइ दिहेन। 25हम पचे आपुस में एक मत होइके इ निहचय कीन्ह ह हम सबइ आपन में स कछू मनई चुनी अउर आपन पिआरा बरनाबास अउर पौलुस क संग ओनका तोहरे लगे पठई। 26इ सबइ उ पचे ही लोग अहई जउन हमरे पभू ईसू मसीह क नाउँ बरे आपन प्राण क बाजी लगाइ दिहे रहे। 27हम पचे यहूदा अउर सीलास क पठावत अही। उ सबइ तोहका आपन मुँह स इ सब बातन क बतइहीं। 28पवित्तर आतिमा क अउर हमका इ नीक जान पड़ा कि तू सबन प इ जरूरी बात क अलावा क अउर कउनो बात क बोझा न डावा जाइ:

29मूरतिन प चढ़ावा गवा भोजन तोहका नाहीं ग्रहण करइ चाही। खून, गटइ घोटिके बधा गवा पसु अउर व्यभिचार स बचा रहा।

जदि तू आपन आप क इ बातन स बचाए रखब्या तउ तोहार कल्याण होइ।

अच्छा बिदा।

30इ तरह ओनका बिदा कइ दीन्ह गवा अउर उ सबइ अन्ताकिया पहुँचेन। हुवाँ उ पचे बिसवासियन क धरम सभा क बोलाएन अउर ओनका उ चिट्ठी दइ दिहेन। 31चिट्ठी बाँचिके जउन उछाह ओनका मिला ओह पइ उ पचे आनंद मनाएन। 32यहूदा अउर सीलास, जउन खुद ही दुइनउँ नबी रहेन, आइयन क समन्वा ओनकइ हिम्मत बँधावत भए अउर मजबूती देत भए, एक लम्बा प्रबचन दिहेन। 33हुवाँ कछू समइ बिताए क पाछे, भाई लोग ओनका सांति क साथ ओनही क लगे लौटि जाइ बरे बिदा किहेन जउन ओनका पठाए रहेन। 34*

35पौलुस अउर बरनाबास अन्ताकिया में कछू समइ बिताएन। बहोत स दूसर मनइयन क संग उ पचे पभू क बचन क उपदेस देत भए मनइयन में सुसमाचार क प्रचार किहेन।

पौलुस अउर बरनाबास क अलग होव

36कछू दिनन क बाद बरनाबास स पौलुस कहेस, “आवा, जउन जउन नगरन में हम पचे पभू क बचन क प्रचार कीन्ह ह, हुवाँ आपन भाई लोगन क लगे बापिस लौटिके इ लखी कि उ पचे का कछू करत बाटेन।” 37बरनाबास चाहत रहा कि मरकुस कहवावइवाला यूहन्ना क भी उ पचे संग लइ चलई। 38मुला पौलुस इहइ ठीक समझेस कि उ पचे ओका आपन संग न लेई जउन पंफूलिया में ओनकइ संग छोड़ दिहे रहा अउर (पभू क) काम में जउन ओनकइ साथ नाहीं दिहेस। 39एह पइ उ दुइनउँ में घोर खिलाफत

जन्मी। नतीजा इ भवा कि उ पचे आपुस में एक दूसर स अलगाइ गएन। बरनाबास मरकुस क लइके पानी क जहाजे स साइप्रस गवा। 40पौलुस सीलास क चुनिके हुवाँ स चला गवा अउर भाइयन ओका पभू क छत्रछाया में सौपेन। 41तउ पौलुस सीरिया अउर किलिकिया क जात्रा करत भवा हुवाँ क कलीसियन क मजबूत करत रहा।

तीमुथियुस क पौलुस अउर सीलास क संग जाब

16 पौलुस दिरबे अउर लुस्त्रा में भी आवा। हुवाँइ तीमुथियुस नाउँ क एक चेला रहा। उ कउनो बिसवासी यहूदी स्त्री क बेटवा रहा मुला ओकर बाप यूनानी रहा। 2लुस्त्रा अउर इकुनियुम क सहर क भाइयन क संग ओकर अच्छा उठब बैठब रहा। 3पौलुस तीमुथियुस क जात्रा प लइ जावा चाहत रहा। तउ उ ओका आपन संग लइ लिहेस अउर स्थानन प बसइया यहूदियन क कारण ओकर खतना किहेस; काहेकि उ पचे सबहिँ जानत रहेन कि ओकर बाप एक यूनानी रहा। 4सहरन स जात्रा करत भवा उ पचे हुवाँ क मनइयन क ओन नियम क बारे में बताएन जेनका यरूसलेम में प्रेरितन अउर बुजुर्गन तय कइ दिहे रहेन। 5इ तरह हुवाँ क कलीसिया क बिसवास अउर मजबूत होत गोवा अउर रोज हर ओनकइ गनती बाढ़त गइ।

पौलुस क एसिया स बाहेर बोलावा जाब

6तउ उ पचे फ्रूगिया अउर गलातिया क पहुँटा स होइके निकरेन काहेकि पवित्तर आतिमा ओनका एसिया में पवित्तर बचन क प्रचार क मना कइ दिहे रही। 7फिन उ पचे जब मूसिया क सरहदे प पहुँचन तउ उ पचे बितूनिया में प्रवेस किहेन। मुला ईसू क आतिमा ओनका हुवाँ भी जाइ नाहीं दिहेस। 8तउ उ पचे मूसिया होत भए त्रोआस पहुँचेन। 9राति क समइ पौलुस दिव्य दर्शन में निहारेस कि मैसीडोनिया क मनई ओसे पराथना करत भवा कहत अहइ, “मैसीडोनिया में आवा अउर हमार मदद करा!” 10इ दिव्य दर्शन क लखे क पाछे तुरंतहि इ नतीजा निकारत भए कि परमेस्सर ओन मनइयन क बीच सुसमाचार क प्रचार करइ हमका बोलाए अहइ हम पचे मैसीडोनिया जाइ बरे ठान लीन्ह।

लुदिया क हिरदय बदलाव

11इ तरह हम त्रोआस स जल मार्ग क जरिए जाइ बरे आपन नाउ खोलि दीन्ह अउर सोझइ समोश्राके जाइ पहुँचेन। फिन अगले दिन नियापुलिस चला गएन। 12हुवाँ स हम पचे एक रोमी उपनिवेस फिलिप्पी पहुँचेन जउ मैसीडोनिया क उ पहुँटा क एक प्रमुख सहर रहा। इ सहर में हम कछू दिन बितावा।

13फिन सबित क दिन इ बिचारत भए कि पराथना करइ बरे हुवाँ कउनो स्थान होइ हम सहर-दुआरे नदि क तीरे गए। हम पचे हुवाँ बइठे अउर बटुगी भइ स्त्रियन स बातचीत करइ लागे। 14हुवाँइ लुदिया नाउँ क एक स्त्री रही। उ बैगनी रंग क ओढ़ना क बिक्री करत रही। उ परमेस्सर क आराधिका रही। उ बड़ा धियान स हमार बातन क सुनत रही। पभू ओकरे हिरदय क दुआर खोल दिहेस ताकि, जउन

पद 34 कछू यूनानी प्रतियन में पद 34 जोड़ी गइ अहइ: “मुला सिलास हुवाँइ ठहरइ क निस्चय किहेस।”

कछू पौलुस कहत रहा, उ ओन बातन प धियान देइ सकइ। 15 आपन समूचइ परिवार क संग बपतिस्मा लेए क पाछे उ हम सबन स इ कहत भए बिनती किहेस, “जदि तू पचे मोका पर्भू ईसू क सच्चा भगत मानत ह तउ मोरे घरे आवा।” तउ उ हम पचन क जाइ बरे तइयार किहेस।

पौलुस अउर सीलास क बंदी बनावा जाब

16 फिन अइसा भवा कि जब हम पचे पराथना ठउर कइँत जात रहे, हम पचन क एक दासी मिली जेहमँ एक सगुन वतावइ वाली आतिमा क सवारी रहीं। उ मनइयन क भागग बताइके आपन मालिकन क ढेर धन कमाइके देत रही। 17 उ हमरे पौलुस क पाछे इ चिचियात भइ होइ गइ “इ पचे परम परमेस्सर क सेवक अहइँ। इ पचे तोहका मुक्ति क रस्ता क संदेसा सुनावत अहइँ।” 18 उ बहोत दिनों तलक अइसा ही करत रहाइ तउ पौलुस परेसान होइ गवा। उ मुड़िके उ आतिमा स कहेस, “मई ईसू मसीह क नाउँ प तोहका आदेस देत हउँ, ‘इ बिटिया मँ स बाहेर निकरि आवा।’” तउ उ फउरन ओहमँ स बाहेर निकरि गइ।

19 फिन ओकर स्वामी लोगन जब लखेन कि ओनकइ कमाई क आसा स मन टूटि गवा अहइ तउ उ पचे पौलुस अउर सीलास क धइ दहबोचेन अउर ओनका घेरावत भए बजार क बीच नगर क अधिकारियन क समन्वा लइ गएन। 20 फिन न्यायकर्ता क लगे ओनका लइ जाइके बोलेन, “इ सबइ यहूदियन अहइँ अउर हमरे सहर मँ गइबड़ी फइलावत बाटेन। 21 इ पचे अइसी रीति रिवाज क दोहाई देत हीं जेनका अपनाउब या जेन पइ चलब हम रोमी मनइयन बरे निआव क मुताबिक नाही बा।” 22 भीड़ भी खिलाफत मँ मनइयन क संग होइके हमला करइ आइ। दण्डनायक भी ओनकइ ओढ़ना फाइके उतरवाइ दिहेन अउर आग्या दिहेन कि ओनकइ कुटुम्स होइ। 23 ओन पइ बहोत मारि पइ चुकइ क पाछे उ पचे ओनका जेल मँ डाइ दिहेन अउर जेल क अधिकारि क आदेस दिहेन कि ओनके बरे कर्रा पहरा बइठाइ दीन्ह जाइ। 24 अइसा आदेस पाइके उ ओनका जेल क भितरी खोली मँ धाँध दिहेन। उ ओनकइ गोइवा मँ कठघरा जइ दिहेन।

25 लगभग आधी राति बीते प पौलुस अउर सीलास परमेस्सर क भजन गावत भएन पराथना करत रहेन अउर दूसर कैदी ओनका अनकत रहेन। 26 तब्वइ हुवाँ अचानक एक अइसा खौफनाक भूचाल आवा कि जेल क नीव हल गइ। अउर फउरन जेल क फटक्का खुल गवा। हर कउनो क बेड़ी ढीली होइके फिसल गइ। 27 जेलि क अधिकारी जागिके जब लखेस कि जेलि क फटक्का खुलि गवा अहइँ तउ उ आपन तरवार हींच लिहेस अउर इ सोचत भए कैदी पराइ गएन बाटेन। उ खुद क मार डावइ वाला रहा तबहिं 28 पौलुस ऊँची अवाज मँ चिल्लाइके कहेस, “आपन क नस्कान जिन पहोंचावा काहेकि हम सब हियँइ अही।”

29 एह पइ जेल क अधिकारी मसाल मँगवाएस अउर हलबुली मँ भितरे गवा। अउर डर स काँपत भवा पौलुस अउर सीलास क समन्वा भहराइ पड़ा। 30 फिन उ ओनका

बाहेर लइ जाइके बोला, “साहेब लोगो, उद्धार पावइ बरे मोका का करइ चाही?”

31 उ पचे जवाब दिहेन, “पर्भू ईसू प बिसवास करा। एँहसे तोहार उद्धार होइ-तोहार अउर तोहरे परिवार का।” 32 फिन ओकरे सारे परिवार क संग उ सबइ ओका पर्भू क बचन सुनाएन। 33 ओकरे पाछे जेल क अधिकारी उहइ रात अउर उहइ घड़ी ओनका हुवाँ स लइ गवा। उ ओकर घाव धोएस अउर आपन सारे परिवार क संग बपतिस्मा लिहेस। 34 फिन उ पौलुस अउर सीलास क आपन घर लइ गवा अउर ओनका खइया क खिलाएस। परमेस्सर मँ बिसवास क कारण उ आपन समूचइ परिवार क संग आनन्द मनाएस।

35 जब भोर भवा तउ हाकिम इ कहइ बरे पिआदा क हुवाँ पठएन कि ओन पचन क छोड़ दीन्ह जाइ। 36 फिन जेलि क अधिकारी इ बतियाँ पौलुस क बखानेस “दण्डधिकारी तू पचन क छोड़ि देइ क कहवाइ पठएन ह। यह बरे अब तू बाहेर आवा अउर सांति क साथ चला जा।”

37 मुला पौलुस ओन सिपाहियन स कहेस, “जद्यपि हम रोमी नागरिक अही, मुला उ पचे हमका बिना अपराधी होए बिना सब मनइयन क समन्वा मारेन पीटेन ह अउर जेलि मँ धाँध दिहेन। अउर अब चुपे चुपे उ पचे हमका बाहेर पठइ देत चाहत हीं, निहचय ही अइसी नाही होइ। होइ तउ इ चाही कि उ पचे खुद ही आइके हम पचन क बाहेर खदेरई।”

38 सिपाही लोग न्यायाधीस क इ सब्द जाइके सुनाएन। न्यायाधीस क जब इ पता लाग कि पौलुस अउर सीलास रोमी आहइँ तउ उ सबइ बहोत ससाइ गएन। 39 तउ उ पचे हुवाँ आपन अउर ओनसे छमा माँगिके ओनका बाहेर लइ गएन अउर ओनसे सहर क तजि देइ क कहेन। 40 पौलुस अउर सीलास जेल स बाहेर निकरिके लुदिया क घर पहोंचेन। धर्म बंधुअन स मिलत भए उ पचे ओनकइ हौसला बढ़ाएन अउर फिन हुवाँ स चलि दिहेन।

पौलुस अउर सीलास थिस्सलुनीके मँ

17 फिर अम्फिपुलिस अउर अपुल्लोनिया क सफर पूरा कइके उ पचे थिस्सलुनीके पहोंच गएन। हुवाँ यहूदियन क एक आराधनालय रहा। 2 आपन साधारण सुभाव क अनुसार पौलुस ओनके लगे गवा अउर तीन सबित क दिन तलक ओनकइ संग सास्तरन प बिचार क लेन-देन करत रहा। 3 अउर सास्तरन स लइके ओनका समझावत भवा इ सिद्ध करत रहा कि मसीह क यातनाई झेलइ क रहा अउर फिन ओका मरा भवन मँ स जी उठब रहा। उ कहत, “इ ईसू ही, जेकर मई तोहार बीच प्रचार करत हउँ, मसीह अहइ।” 4 ओहमँ स कछू जउन ओकरे मते स मेल खाएन, पौलुस अउर सीलास क मत मँ सामिल होइ गएन। परमेस्सर स डेराइवालन अगिनती यूनानी भी ओहमँ मिलि गहन। एहमँ ढेर खास खास स्त्रियन भी मिलि गएन।

5 मुला यहूदी तउ डाह मँ जरत भूँजत रहेन। उ पचे कछू बाजार जुण्डन क बटोरेन अउर एक मजमा बनइके सहर मँ दंगा कराइ दिहेन। उ पचे यासोन क घर मँ धावा बोल दिहेन। अउर इ जतन करइ लागेन कि कउनो तरह पौलुस

अउर सीलास क मनइयन क समन्वा लइ आवइँ। 6मुला जब उ पचे ओनका नाहीं पाइ सकेन तउ यासोन क अउर कछू दूसर भाइयन क सहर क अधिकारी क समन्वा घेरेइ के लइ आएन। उ पचे चिचियानेन, “इ मनइयन जउन सारी दुनिया में उथर पुथर मचाए बाटेन अब उ पचे हियाँ आइ अहइँ। 7अउर यासोन सम्मान क संग ओनका आपन घरवा में ठहराए बा। अउर उ पचे सबहिँ कैसर क आदेसन क खिलाप काम करत बाटेन। अउर कहत हीँ एक राजा अउर अहइ जेकर नाउँ अहइ ईसू।” 8जब भीड़ अउर सहर क अधिकारी इ सुनेन तउ उ पचे भड़केन। 9अउर इ तरह उ पचे यासोन अउर दूसर मनइयन क जमानती मुचलका लइके छोड़ दिहेन।

पौलुस अउर सीलास बिरिया में

10फिन तुरंतहि रातउ रात पौलुस अउर सीलास क बिरिया पठइ दिहेन। हुवाँ पहुँचिके उ सबइ यहूदी, आराधनालय में गएन। 11इ पचे थिस्सलुनीके क मनइयन स जिआदा नीक रहेन। इ मनइयन पूरा चित्त लगाइके बचन क सुनेन अउर हर दिन सास्तरन क उलटत पलटत भएन जाँच करत रहेन कि पौलुस जउन बातन क बताएस ह, का उ बातन फुर अहइँ। 12एकरे कारण बहोत स यहूदी लोग अउर खास खास यूनानी स्त्री-पुरुस भी बिसवास धरेन। 13मुला जब थिस्सलुनिके क यहूदियन क इ पता लाग कि पौलुस बिरिया में भी परमेस्सर क बचन क प्रचार करत बाटइ तउ उ पचे हुवई आइ धमकेन। अउर हुवाँ भी गल्बा करइ अउर मनइयन क हुस्कावइ सुरु कइ दिहेन। 14यह बरे तबहिँ भाइयन तुरंत पौलुस क समुदर क किनारे जाइ क पठएन। मुला सीलास अउर तीमुथियुस हुवई ठहरा रहेन। 15पौलुस क लइ जाइवालन मनइयन ओका एथेंस पहुँचाइ दिहेन अउर सीलास अउर तीमुथियुस बरे इ हुकुम दइके कि उ पचे हाली स ओकरे लगे आइ जाई, हुवाँ स चल दिहेन।

पौलुस एथेंस में

16पौलुस एथेंस में तीमुथियुस अउर सीलास क जोहत भए सहर क मूरत स भरा भवा लिखिके मन ही मने में तिलमिलात रहा। 17यह बरे हर रोज आराधनालय में यहूदियन अउर यूनानी भगतन जउन असली भगवान का पूजत रहेन स बहस- मुबाहसा करत रहा। हुवाँ बजार- हाट में जउन कउनो होत उ ओहसे भी हर रोज तर्क करत रहत। 18कछू इपीकूरी अउर स्तोईकी दर्सन क ग्यानी भी ओसे सास्तार्थ करइ लागेन।

ओहमाँ स कछू कहेन, “इ अंटसंट बोलवइया कहब क चाहत ह?” दूसर लोग कहेन, “इ तउ बिदेसी देवतन क प्रचारक जान पड़त ह।” उ पचे इ यह बरे कहे रहेन कि उ ईसू क बारे में उपदेस देत रहा अउर ओकरे फिन स जी उठइ क प्रचार करत रहा। 19उ पचे ओका धइके अरियुपगुस क सभा में आपन संग लइ गएन अउर बोलेन, “का हम जान सक्ति ह कि तू जउन मनइयन क समन्वा रखत बाट्या, उ नई सिच्छा का अहइ? 20तू कछू अजूबी बात हमरे काने

में डावत अहा, तउ हम पचे जानइ चाहित ह कि इ बातन का अरथ का अहइ?”

21हुवाँ रहत भए एथेंस क सबहिँ मनइयन अउर परदेसि सिरिफ बिल्कुल नवा सुनइ या ओनही बातन क चर्चा क अलावा कउनो भी अउर बातन में आपन समइ न लागावत रहेन।

22तब पौलुस अरियुपगुस क समन्वा खड़ा होइके कहेस, “हे एथेंस क मनइयन, मई लखत हउँ कि तू पचे हर तरह स धार्मिक अहा। 23एहत फिरत तोहार आराधना क चीजन क लिखिके मोका एक अइसी वेदी भी मिली जेह पइ लिखा रहा, ‘अनबूझ परमेस्सर बरे’ तउ तू पचे बेजानिके जेकर आराधना करत बाट्या मई तोहका उहइ बचन क सुनावत हउँ।

24“परमेस्सर, जउन इ जगत क अउर इ जगत भितरे जउन कछू बा, ओकर रचना किहेस, उहइ धरती अउर अकास क पभू अहइ। उ हथवा स बनावा गवा मंदिर में नाहीं रहत। 25ओकरे लगे कउनो चीजे क कमी नाहीं बा। एहसे मनई क हथवा स ओकर सेवा नाहीं होइ सकत। उहइ सबन क जिन्नगी, साँस अउर दूसर सब कछू देत रहत ह।

26“एक ही मनई स उ मनई क सबहिँ जातिन क बनएस ताकि उ पसे समूचइ धरती प बसि जाई अउर उहइ मनइयन क समइ निश्चय कइ दिहेस अउर उ ठउर क जहाँ उ पचे रहइँ, चउहददी बाँधि दिहेस। 27ओकर मतलब इ रहा कि मनई परमेस्सर क हेरईँ। होइ सकत ह कि उ पचे ओका ओकरे ताई पहोंचिक पाई सकईँ। ऐतना होए प भी हम सबन में कउनो स भी उ दूर नाहीं बा:

28“काहेकि उहइ मैं हम पचे रहित ह, उहइ मैं हमारा चलब फिरब बा अउर उहइ मैं हमार थिर रहब बा।’

इहइ तरह खुद तोहरे ही कछू लिखवइया भी कहेन ह:

‘काहेकि हम पचे ओकर बचवा अही।’

29अउर काहेकि हम परमेस्सर क संतान अही। यह बरे हमका इ कबहुँ नाहीं सोचइ चाही कि उ देउता सोना या चाँदी या पाथर क बनी भइ मानुस कल्पना या कारीगरी स बनी भइ कउनो मूरत जइसी अहइ। 30अइसे अगियान क जुग क परमेस्सर धियान नाहीं दिहेस अउर अब हर कतहुँ क मनई क मनफिराव क आदेस देत बाटइ। 31उ एक दिन तय किहेस ह जब उ आपन एक मनई क जरिए जेका उ मुकईर किहेस ह निआव स दुनिया क निआव करी। मरे भएन में स ओका जिआइके उ हर कउनो क इ बात क परमान दिहेस ह।”

32जब उ पचे मरे भएन में स जी उठइ का बात सुनेन तउ ओहमाँ स कछू तउ ओकर हँसी हसारात करइ लागेन मुला कछू कहेन, “हम सबइ इ विसय प फिन कबहुँ तोहार प्रबचन सुनब।” 33तब पौलुस ओनका तजिके चल दिहेस। 34कछू मनइयन बिसवास कइ लिहेन अउर ओकरे संग होइ गएन। एहमाँ अरियुपगुस* क निअम्बर दियुनुसियुस अउर दमरिस नाउँ क स्त्री अउर ओकरे संगे क अउर मिला भी रहेन।

अरियुपगी एथेंस क खास खास मनइयन क दल। ये पचे न्यायाधीस क लाई होत रहेन।

पौलुस कुरिन्थुस में

18 एकरे पाछे पौलुस एथेंस तजिके कुरिन्थुस चला गवा। 2हुवाँ उ जउ पुन्तुस मा पइदा भवा रहा अक्विला नाउँ क एक यहूदी स मिला। जउन हाल में ही आपन पत्नी प्रिस्किला क संग इटली स आवा रहा उ पचे इटली यह बरे तजेन कि क्लौडियुस सबहिं यहूदियन क रोम स निकरि जाइ क हुकुम दिहे रहा तउ पौलुस ओनसे भेंटइ आवा। 3अउर काहेकि ओनकइ धन्धा एक ही रहा तउ उ ओनही क संग ठहरा अउर काम करइ लाग। बइपार स उ पचे तम्बू बनावइवाला रहेन। 4हर सबित क दिन उ आराधनालय में बाद बिवाद कइके यहूदियन अउर यूनानियन क समुझावइ बुझावइ क जतन करत।

5जब उ सबइ मैसीडोनिया स सीलास अउर तीमुथियुस आएन तब पौलुस आपन सारा समइ बचन क प्रचार करइ में लगाए रहा। यहूदियन क इ परमान देइ चाहत रहा कि ईसू ही मसीह अहइ। 6तउ जबहिं उ पचे ओकर खिलाफत किहेन अउर ओसे फूहर पातर कहेन तउ उ ओनकइ खिलाफ ओढ़ना झारत भवा ओनसे कहेस, “तोहार रकत तोहारे मुँडे प पड़इ। ओकर मोसे कउनो मतलब नाहीं बा। अबहिं स अगवा मई गैर यहूदियन क लगे चला जाबा”

7इ तरह पौलुस हुवाँ स चला गवा अउर तीतुस यूस्तुस नाउँ क एक मनई क घरे गवा। उ परमेस्सर क आराधक रहा। ओकर घर आराधनालय स सटा रहा। 8क्रिसपुस, जउन आराधनालय क प्रधान रहा, आपन समूचइ घराना क संग सत्य पर्भू में बिसवास धारण किहेस। साथ ही बहोत स कुरिन्थुस जउन पौलुस क प्रबचन सुने रहेन, बिसवास ग्रहण कइके बपतिस्मा लिहेस।

9एक राति सपना में पर्भू पौलुस स कहेस, “डेरा जिन, बोलत रहा अउर चुप जिन हवा। 10काहेकि मई तोहरे संग हउँ। तउ तोहरे प हमला कइके कउनो भी तोहका नस्कान नाहीं पहुँचाइ काहेकि इ सहर में मोर ढेर मिला बाटई।”

11तउ पौलुस, हुवाँ डेढ़ बरिस तलक परमेस्सर क बचन क ओनकइ बीच में सिच्छा देत भवा, ठहरा रहा।

पौलुस गल्लियन क समन्वा लइ आवा जाब

12जब अखाया क राज्यपाल गल्लियो रहा तबहिं यहूदी लोग एक एक अउरटिके पौलुस प धावा बोलि दिहेन अउर ओका धइके कचहरी लइ आएन। 13अउर बोलेन, “इ मनई परमेस्सर क आराधना अइसे तरीका स करइ बरे हुस्कावत अहइ हउन व्यवस्था क विधान क खिलाफ बा।”

14पौलुस अबहिं आपन मुँहना खोलइ क ही रहा कि गल्लियन यहूदियन स कहेन, “अरे यहूदियो, जदि इ कछू कउनो अनिआव या गहिर अपराध क होत तउ तोहार बात सुनब मोरे बरे निआव क मुताबिक होत 15मुला काहेकि इ विसय सब्दन, नाउँ अउर तोहार आपन व्यवस्था क सवाल स जुड़ा अहइ, यह बरे एँका तू सबइ खुद ही सुलझावा। अइसी बातन क बारे में मई न्यायाधीस नाहीं बनइ चाहत हउँ।” 16अउर फिन उ ओनका कचहरी स बाहेर निकाल दिहिस।

17तउ उ पचे आराधनालय क नेता सोस्थिनेस क धइ दहबोचेन अउर अदालत क समन्वा ही ओका पीटइ लागेन। मुला गल्लियन इ बातन प तनिकउ भी धियान नाहीं दिहेन।

अन्ताकिया क पौलुस क वापसी

18बहोत दिनाँ तलक पौलुस हुवाँ ठहरा रहा। फिन भाइयन स बिदा होइके उ नाउ क मारग स सीरिया क चला गवा। ओकरे संग प्रिस्किल्ला अउर अक्विला भी रहेन। पौलुस किखिया में आपन बार कटवाएस काहेकि उ एक ठु मन्त माने रहा। 19फिन उ पचे इफिसुस पहोंचेन अउर पौलुस प्रिस्किल्ला अउर अक्विला क हुवाँ छोर दिहेन। अउर खुद आराधनालय में जाइके यहूदियन क संग बहस करइ लाग। 20जब हुवाँ क मनइयन ओसे कछू दिन अउर रुक जाइके निवेदन किहेन तउ उ इन्कार कइ दिहेस। 21मुला जात भए समइ में उ कहेस, “अगर परमेस्सर क इच्छा भइ तउ मई तोहरे लगे फिन अउबइ।” फिन उ इफिसुस स नइया स जात्रा किहेस।

22फिन कैसरिया पहोंचिके उ यरूसलेम गवा अउर हुवाँ कलीसिया क मनइयन स भेंटेस। फिन उ अन्ताकिया कइँती चला गवा। 23हुवाँ कछू समइ बिताए क पाछे उ बिदाई लिहेस अउर गलालिया अउर फ्रूगिया क पहुँटा में एक ठउर स दूसर ठउर क जात्रा करत भवा सबहिं चेलन क बिसवास बढावइ लाग।

इफिसुस अउर अखाया में अपुल्लोस

24हुवाँ अपुल्लोस नाउँ क यहूदी रहत रहा। उ सिकुन्दरिया में पइदा भवा रहा। उ बिद्वान बोलवइया रहा। उ इफिसुस में आवा। सास्तर क ओका पूरा पूरा ज्ञान रहा। 25ओका पर्भू क मारग क दीच्छा भी मिली रही। उ हिरदय में उमंग भरिके प्रबचन करत अउर ईसू क बारे में बड़ी हुसियारी स उपदेस देत रहा। तउ भी ओका यूहन्ना क बपतिस्मा क गियान रहा। 26आराधनालय में उ निडर होइके बोलइ लाग। जब प्रिस्किल्ला अउर अक्विला ओका बोलत सुनेन तउ उ पचे ओका एक कइँती लइ गएन अउर जिआदा बारीकी स ओका परमेस्सर क मारग क बियाख्या समझाएन। 27तउ जब उ अखाया क जाइ चाहेस तउ भाइयन ओकर हिम्मत बढाएन अउर हुवाँ क चेलन क ओकर सुआगत करइ बरे लिखिके पठएन। जब उ हुवाँ पहोंचा तउ ओनकइ बरे बड़कवा सहायक सिद्ध होइ गवा जउन पहमेस्सर क अनुग्रह स बिसवास ग्रहण किहेन। 28काहेकि सास्तरन स इ परमान देत भए कि ईसू ही मसीह अहइ, उ यहूदी लोगन क मजमा में जोरदार सब्दन स ललकारत भवा सास्तरन में पछारे रहा।

पौलुस इफिसुस में

19 अइसा भवा कि जब अपुल्लोस कुरिन्थुस में रहा तबहिं पौलुस भीतर क पहुँटा स जात्रा करत भवा इफिसुस में आइ पहोंचा। हुवाँ ओका कछू चेलन मिलेन। 2अउर उ ओनसे कहेस, “का जब तू पचे बिसवास धारण किहे रहा तब पवित्तर आतिमा क ग्रहण किहे रहा?”

उ सबइ जवाब दिहेन, “हम पचे तउ सुना तलक नाहीं कि कउनो पवित्तर आतिमा बाटइ भी!” अतउ उ कहेस, “तउ तू पचे कइसा बपतिस्मा लिहे अहा!” उ सबइ कहेन, “यूहन्ना क बपतिस्मा।”

४फिन पौलुस कहेस, “यूहन्ना क बपतिस्मा तउ मनफिरावइ क बपतिस्मा रहा। उ मनइयन स कहे रहा कि जउन मोरे पाछे आवत अहइ, ओह पइ अरथ अहइ ईसू प बिसवास धरा।”

५इ सुनिके उ हचे पभू ईसू क नाउँ क बपतिस्मा लइ लिहेन। ६फिन जब पौलुस ओन प हाथ धरेस तउ ओन पइ पवित्तर आतिमा उतरि आइ। अउर उ सबइ अलग अलग भाखा बोलइ अउर भविस्सबाणी करइ लागेन। ७कुल जोरिके उ पचे कउनो बारह मनई रहेन।

८फिन पौलुस यहूदी आराधनालय मँ चला गवा अउर तीन महीना निडर होइके बोलत रहा। उ यहूदी लोगन क साथ बहस करत भवा ओनका परमेस्सर क राज्य क बारे मँ समझावत रहत रहा। ९मुला ओहमों स कछू लोग बहोत जिद्दी रहेन। उ पचे बिसवास ग्रहण करइ स इन्कार कइ दिहेन अउर मनइयन क समन्वा भला बुरा कहत रहेन। तउ उ आपन चलन क संग लइके ओनका तजिके चला गवा। अउर तरन्नुस क पाठसाला मँ हर रोज बिचार करत रहा। १०दुइ बरिस तलक अइसा ही होत रहा। एकर नतीजा इ भवा कि सबइ एसिया क बसइया अउर यहूदियन अउर गैर यहूदियन पभू क बचन सुनि लिहेन।

स्किबा क बेटवन

११परमेस्सर पौलुस क हथवा चमत्कार करम करावत रहा। १२हिआँ तलक की ओकर छुआ रूमाल अउर अँगारखा क बेरामियन क लगे लइ जावा जात तउ ओनकइ बेरामी जरटुट होइ जातिन अउर दुस्ट आतिमा ओहमों म पराइ जातिन। १३-१४कछू यहूदी लोग, जउन दुस्ट आतिमा क उतारत भए एहर ओहर टहरत डोलत रहेन, जिन मनइयन मँ दुस्ट आतिमन क सवारी होतिन, ओन पइ पभू ईसू क नाउँ क बइपरइ क जतन करतेन अउर कहतेन, “मई तोहका उ ईसू क नाउँ प जेकर प्रचार पौलुस करत वा, आदेस देत हउँ!” एक स्किबा नाउँ क यहूदी महा याजक क सात तु बेटवन जब अइसा करत रहेन। १५तउ दुस्ट आतिमा (एक दाँई) ओनसे कहेस, “मई ईसू क पहिचानत हउँ अउर पौलुस क बारे मँ भी जानत हउँ, मुला तू पचे कउन अहा?”

१६फिन उ मनई जेह पइ दुस्ट आतिमा सवार रही, ओन प कूदि पड़ी। उ ओन पइ काबू पाइके अउर ओनकर कपरा फाइ दिहेस। उ ओनका खूबइ पीटेस अउर ओनकइ ओढ़ना फाइ डाएस। एहसे उ पचे बेबस्तर होइके अउर चोटाइके परानेन। १७इफिसुस मँ बसइया लोग सबहिं यहूदियन अउर यूनानी लोगन क इ बाते क पता लग गवा। उ सबइ लोग बहोतइ डेराइ गएन। इ तरह पभू ईसू क नाउँ क आदर अउर जिआदा बाढ़त गवा। १८ओहमों स बहोत स जउन बिसवास ग्रहण किहे रहेन, आपन स कीन्ह गवा कुकरम क सबन क समन्वा कबूलत भए हुवाँ आएन। १९जादूगर अउर टोनहन मँ स बहोतन आपन-आपन पोथी लइके हुवाँ बटोरि

दिहेन अउर सब मनइयन क अगवा बारि दिहेन। ओन पोथिन क कीमत ५०,००० चाँदी क सिक्का क बराबर कूता गवा। २०इ तरह पभू क बचन जिआदा असरदार होत भवा दूर दूर ताई फइल गवा।

पौलुस क जात्रा क योजना

२१इ सब घटित होए क पाछे पौलुस आपन मने मँ मैसीडोनिया अउर अखाया होत भवा यरूसलेम जाइ क निहचय किहेस। उ कहेस, “हुवाँ जाए क पाछे मोका रोम भी लखइ चाही।” २२तउ उ आपन तीमुथियुस अउर इरास्तुस नाउँ क दुइ सहायक लोगन क मैसीडोनिया पठएस अउर एसिया मँ तनिक समइ अउर बिताएस।

इफिसुस मँ उपद्रव

२३उ दिनन मँ परमेस्सर के रस्ता का लइके हुवाँ खुब उपद्रव भवा। २४हुवाँ देमेत्रियुस नाउँ क एक तु चाँदी क बनवइया सोनार रहा। उ चाँदी क मन्दिर मूर्ति देवी अरतिमिस* क बनवत रहा। जेहसे कारीगर लोगन क रोजी मिलत रही। २५उ ओनका इ धंधा मँ लगा भएन दूसर कारीगरन क बटोरिस अउर कहेस, “लखा मनइयो, तू पचे जानत ह कि काम स हमका एक बढ़िया आमदनी होत ह। २६तू सब लखि सकत ह अउर सुनि सकत ह कि इ पौलुस न सिरिफ इफिसुस मँ मुला करीब करीब एसिया क समूचइ पहेँटा मँ मनइयन क अपनी सिच्छा क जरिये बदल दिहे बा। उ कहत बा कि मनई क हथवा क बनावा सच देवता नाहीं अहइ। २७एहसे न सिरिफ इ बात क डर अहइ कि हमार बइपार क नामूसी होइ मुला महान देवी अरतिमिस क मँदिर क इज्जत खोइ जाइ क भी डर बाटइ। अउर जउन देवी क आराधना समूचइ एसिया अउर दुनिया स कीन्ह जात बाटइ, ओकर गरिमा छीन लइ जाइ डर अहइ।”

२८जब उ पचे इ सुनेन तउ उ पचे बहोत कोहाइ गएन अउर चिचिआइ चिचिआइ क कहइ लागेन, “इफिसियो क देवी अरतिमिस महान बा।”

२९ओहार सारे सहर मँ गइबड़ी फैलि गइ। तउ मनइयन मैसीडोनिया स आएन अउर पौलुस क संग जात्रा करत भएन गयुस अउर अरिस्तरखुस क धइ दहबोचेन अउर रंग साला मँ लइ भागेन। ३०पौलुस मनइयन क समन्वा जाब चाहत रहा मुला चलन ओका नाहीं जाइ दिहेन।

३१कछू प्रांत क अधिकारी जउन ओकर मीत रहेन, ओसे कहवाइ पठइएन कि उ हुवाँ रंगसाला मँ आवइ क दुस्साहस जिन करइ। ३२लोगन मँ स कछू चिचियात बा, अउर कउनो कछू काहेकि समूचइ सभा मँ हल्बुली फइली बाटइ। ओहमों मू जिआदा स जिआदा इ नाहीं जानत रहेन कि उ पचे हुवाँ बटुरा काहे बाटेन। ३३यहूदियन सिकन्दर क जेकज नाउँ भीड़ मँ स उ पचे सुझाए रहेन, अगवा ठाइ कइ रखे रहेन। सिकन्दर आपन हथवा क हिलाइ हिलाइके मनइयन क समन्वा सफाई क बयान देत रहा। ३४मुला जब

अरतिमिस यूनानी देवी जेकर आराधना एसिया माइनर क निवासी करत रहेन।

ओनका इ पता लाग कु उ एक यहूदी अहइ तउ उ सबइ एक अउटके कछू दुइ घण्टा तलक एक सुर मँ चिचियात भवा कहत रहेन, “इफिसियन क देवी अरतिमिस महान बा।”

35फिन सहर क बाबू भीड़ क सान्त करत भवा कहेस, “हे इफिसुस क मनइयो, का दुनिया मँ अइसा कउनो मनई बा जउन इ नाहीं जानत कि इफिसियन सहर महान देवी अरतिमिस अउर सरग स गिरी भइ पवित्तर सिला क रखवारा अहइ? 36काहेकि इ बातन स इन्कार नाहीं होइ सकता एँह बरे तोहका सान्त रहइ चाही। 37तू पचे इ मनइयन क धइके हियाँ लाया ह जदि अपि उ सबइ न तउ कउनो मंदिर क लुटेन ह अउर न ही हमरी देवि क बेज्जत किहेन ह। 38अगर देमेत्रियुस अउर संगी कारीगरन क कउनो क खिलाफ कउनो सिकाइत अहइ तउ अदालत खुली बाटई अउर हुवाँ निस्नायकन अहई। हुवाँ आपुस मँ एक दूसर प नालिस करई। 39मुला जदि तू एहसे कछू जिआदा जानइ चाहत ह तउ ओकर फैसला नेम स चलइवाली सभा मँ कीन्ह जाइ। 40जउन कछू अहइ ओकरे मुताबिक हमका इ बाते क डर हइ कि आज क दंगा क कारण हम प दोख न लगावा जाइ। इ दंगा बरे हमरे लगे कउनो भी कारण नाहीं बाटइ जेहसे हम सबइ एँका ठीक ठहराइ सकी।” 41एँतना कहे क पाछे उ सभा क विसर्जित कइ दिहस।

पौलुस क मैसीडोनिया अउर यूनान जाब

20 फिन जब हुल्लड क सांत होइ गवा, एकरे पाछे पौलुस ईसू क चेलन क बोलाएस अउर ओनकइ हिम्मत बढ़ाइ दिहे क पाछे ओनसे बिदा लिहेस अउर मैसीडोनिया क चला गवा। 2उ पहँटा स होइके उ जात्रा किहेस अउर हुवाँ क मनइयन क उछाह क बचन बोलेस। फिन उ यूनान आइ गवा।

3उ हुवाँ तीन महीना रुका अउर काहेकि यहूदी लोग ओकरे खिलाफ एक षडयन्त्र रचे रहेन जब उ पानी क मारग स सीरिया क जाइवाला रहा कि उ निस्चय किहेस कि उ मैसीडोनिया क लौटि जाइ। 4बिरीया क पुरूस क बेटवा, थिस्सलूनीकिया क बसइया लोग अरिस्तार्खुस अउर सिकुन्दुस, दिरबे क निवासि गयूस अउर तिमुथियुस अउर एसिया क पहँटा क तुखिकुस अउर त्रुफिमस ओकर साथ रहेन। 5इ पचे पहिले चला गवा रहेन अउर त्रोआस मँ हमका जोहत रहेन। 6बे खमीर क रोटी क दिनन क पाछे हम पचे फिलिप्पी स नाउ स चेलन अउर पाँच दिना क पाछे त्रोआस मँ ओनसे जाइ भैटेन। हुवाँ हम सात दिना तक ठहरेन।

त्रोआस क पौलुस क आखिरी जात्रा

7हपता क पहिले दिना जब हम पचे रोटी क तोड़इ बरे आपुस मँ बटुरेन तउ पौलुस ओनसइ बतियाइ लाग। ओका भियान ही चला जाइ क रहा तउ उ आधी राति तलक बातचीत करत रहा। 8सीढ़ी क ऊपर क खोली मँ जहाँ हम पचे बटुरा रहेन, हुवाँ ढेर क दिया धरा रहेन। 9हुवँई यूतुखुस नाउँ क एक नौजवान खिड़की प बइठा रहा। ओका गहिर

नींद चाँपि रही। काहेकि पौलुस ढेर बेला स बोलतइ चला जात रहा तउ ओका गहिर नींद आइ गइ। एँहसे उ तीसरी मंजिल स तरखाले भहराइ पड़ा अउर जब ओका उठावा गवा तउ उ गुजर चुका रहा। 10पौलुस तरखाले उतरा अउर ओह पइ निहुरा। ओका आपन कोरा मँ लइके उ कहेस, “जिन घबराअ काहेकि ओकर प्राण उहइ मँ बा।”

11फिन उ ऊपर चला गवा अउर उ रोटी क तोरिके बाँटिस अउर खाएस। उ ओनकइ ढेर देर तलक, भिन्सारे ताई बतियात रहा। फिन उ ओनसे बिदा लिहेस। 12उ जिअत मनई क उ पचे घरे लइ आपन। एँहसे ओनका बहोत चइन मिला।

त्रोस स मिलेतुस क जात्रा

13हम जहाजे प पहिले पहोंचेन अउर अस्सुस कइँती चल दिहेन। हुवाँ पौलुस क हम पचेन क जहाज बइठावइ क रहा। उ अइसी ही योजना बनए रहा। उ खुन पैदर आवइ चाहत रहा। 14उ जब अस्सुस मँ हम पचन स भैटा तउ हम पचा ओका जहाजे प बइठावा अउर हम सबइ मितुलेने कइँती चल पड़ेन। 15दूसर दिन हम हुवाँ स चलिके खियुस क समन्वा जाइ पहोंचेन। अउर दूसर दिन ओह पार सामोस आइ गएन। फिन ओकरे एक दिन पाछे हम मिलेतुस आइ पहोंचेन। 16काहेकि पौलुस जहाँ तलक होइ सका पिन्तेकुस्त क दिन तलक यरुसलेम पहुँच जाइ क हाली करत रहा, तउ उ ठान लिहेस कि उ इफिसुस मँ बे रुके भए अगवा चला जाइ जेहँसे ओका एसिया मँ समइ जिआदा न बितावइ पड़इ।

पौलुस क इफिसुस क पूर्वजन स बात-चीत

17उ मिलेतुस स इफिसुस क बुजुर्ग अउर कलीसिया क संदेसा पठइके आपन लगे बोलाएस। 18ओनकइ आए प पौलुस ओनसे कहेस, “इ तू सबइ जानत ह कि एसिया पहुँचइ क बाद पहिले दिन स ही हर समइ मई तोहरे संग कइसे रहत हउँ। 19अउर बड़ा दीन होइके ऑसू टपकाइ टपकाइके यहूदी लोगनक कुचाल क कारण मोह प कइउ परीच्छा मँ भी मई दीनता पूर्वक पभू क सेवा करत रहेउँ। 20तू पचे जानत बाट्या कि मई तोहका तोहरे भलाई क कउनो बाते स बतावइ मँ कबहुँ हिचकिचाएउँ नाहीं। अउर मँ तोहका ओन बातन क सबहिँ मनइयन क बीच अउर घरे घरे जाइके उपदेस देइ मँ कबहुँ नाहीं झिझक्यो। 21यहूदियन अउर यूनानियन क मई बराबर क भाव स मनफिराव बरे, परमेस्सर कइँती मोड़इ बरे मँ कहत रहेउँ ह अउर हमार पभू ईसू मँ बिसवास बरे ओनका चिताउनी दिहेउँ ह। 22अउर अब पवित्तर आतिमा क अधीन मँ मई यरुसलेम जात अहउँ मई नाहीं जानत हउँ हुआँ मोरे संग का कछू घटी। 23मई तउ सिरिफ एँतना जानत हउँ कि हर सहर मँ पवित्तर आतिमा इ कहत भइ मोका चउकन्ना करत रहत ही कि जेल अउर घोर संकट मोका जोहात बाटेन। 24मुला मोरे बरे प्राण क कउनो कीमत नाहीं बा। मई तउ बस उ दौड़ धूप अउर उ सेवा क पूरा करइ चाहत हउँ जेका मई पभू ईसू

स ग्रहण करेउँ ह-परमेस्सर क अनुग्रह क सुसमाचार क साच्छी देब।

25“अउर अब मईँ जानत हउँ कि तोहमाँ स कउनो भी, जेनकइ मँ मईँ परमेस्सर क राज्य क प्रचार करत घूमेउँ ह, मोर मुँह अगवा कबहुँ न लखि पाइ। 26यह बरे आजु मईँ तोहरे समन्वा गोहराइ के कहत हउँ कि तू सबन मँ स कउनो मँ स कोइ खोवाय जाइ त ओकर दोखी मईँ नाहीं अहउँ। 27काहेकि मईँ परमेस्सर क पूरी इच्छा क तोहका बतावइ क मँ मइ कबहुँ हिचकिचाएउँ नाहीं। 28आपन अउर आपन जात बिरादरी क देख भाल करत रहा। पवित्तर आतिमा ओहमाँ स तोहका ओन प चउकसी करइ बरे बनएस ह जेहसे तू परमेस्सर क कलीसिया क धियान राखा जेहसे उ आपन रकत क बदले बेसहे रहा। 29मईँ जानत हउँ कि मोरे बिदा होइ जाए क पाछे सिकारी बिगवा तोहरे बीच अइही अउर उ पचे इ भोला भाला झुंड क न छोरीहीं। 30हिआँ तलक कि तोहरे आपन बीच मँ स ही अइसेन मनई भी उठि जइहीं, जउन चलन क पाछे लगाइ लेइ बरे बात क घुमाइ फिराइ क कइहीं। 31यह बरे होसियार रहया। याद राखा कि मईँ तिन बरिस तलक एक एक क दिन रात रोइ रोइ क चिताउनी देब नाहीं तज्यों रहे।

32“अब मईँ तोहका परमेस्सर अउर ओकर सुसमाचार क अनुग्रह क हाथे अर्पण करत हउँ। उहइ तोहका बनइ सकत ह अउर ओन मनइयन क संग जेनका पवित्तर कीन्ह गवा अहइ, तोहका बारिस बनइ सकत ह। 33मईँ कबहुँ कउनो क सोना-चाँदी या ओढ़ना क नाहीं ललचाएउँ ह। 34तू सबइ ही जानत ह मोर इ हथवन ही मोर अउर मोरे संगिन की जरूरत क पूरा किहेस ह। 35मईँ आपन हर करम स तोहका इ देखोवा ह कि करी मेहनत करत भए हमका निर्बल क मदद कउने तरह करइ चाही अउर हमका पभू ईसू क बचन याद रखइ चाही जेहसे उ खुद कहे रहा, ‘लेइ स देइ मँ जिआदा सुख बा।’”

36इ कहि चुके क पाछे ओन सबन क संग उ घुटना क बल निहुरा अउर उ पराथना किहेस। 37हर कउनो भोंकारा मारिके रोवत रहा। मिलना मिलत भए उ पचे ओका चूमत रहेन। 38उ जउन इ कहे रहा कि पचे ओकर मुँहना फिन कबहुँ न लखिहीं, एँहसे मनई जिआदा दुःखी रहेन। फिन उ पचे ओकर रच्छा करत भए जहाजे तलक पहोंचाइ दिहेन।

पौलुस क यरूसलेम जाब

21 फिन ओनसे बिदाइ लइके समुद्दर मँ हम पचे आपन नइया खेइ दीन्ह अउर सोझ राहे म कास पहोंच गएन अउर भियान रोडुस। फिन हुवाँ स हम पतरा चला गएन। 2हुवाँ हम एक ठु जहाज लीन्ह जउन फिनीके जात रहा। 3जब साइप्रस लखइ क आइ गवा तउ हम पचे ओका बाई कइँती छोड़िके सीरिया कइँती मुड़ि गएन काहेकि जहाज क सूर मँ माल उतारइ क रहा तउ हम पचे भी हुवेई उतरि गएन। 4हुवाँ हम पचन क अनुयायी मिलेन जेनके संग हम सात दिनाँ ताई ठहरेन। उ पचे आतिमा क असर स पौलुस क यरूसलेम जाइ स रोक दिहेन। 5फिन

हुवाँ ठहरइ क आपन समइ बिताइके हम पचे बिदा भएन आपन जात्रा पर निकरि गएन। आपन स्त्रियन अउर बचवन क संग उ पचे सहर क बाहेर तलक हमरे संग आएन। फिन हुवाँ समुद्दर क किनारे हम पचे घुटना क बल निहुरिके पराथना कीन्ह। 6अउर एक दूसर स बिदा होइके हम पचे जहाजे प चढ़ि गएन। अउर उ पचे आपन-आपन घनन क लौटि आएन। 7सूर स पानी क रस्ता क जरिए जात्रा करत भए हम पतुलिमथिस मँ उतरेन। हुवाँ भाई लोगन क सुआगत सत्कार करत भए हम पचे ओनकइ संग एक दिन ठहरेन।

8दूसर दिन ओनका छोरिके हम कैसरिया आइ गएन। अउर सुसमाचार क प्रचारक फिलिप्पुस, जउन चुना भवा सात सेवकन मँ एक रहा, घर जाइके ओनके संग ठहरेन। 9ओकरे चार ठु कुँवारी बितिया रहिन जउन भविस्सबाणी करत रहिन। 10हुवाँ हमरे कछू दिनन ठहरे रहइ क पाछे यहूदिया स अगबुस नाउँ क एक नबी आवा। 11हमरे निअरे आवत भवा उ पौलुस क करिहाउँ बाँधिके उठाइके ओसे अपनइ ही गोइ अउर हाथ बाँधवाइ लिहेस अउर बोला, “इ अहइ जउन पवित्तर आतिमा कहत बा, ‘यानी यरूसलेम मँ यहूदियन, जेकर इ कमर बाँध अहइ, ओका अइसे ही बाँधिके गैर यहूदियन क हाथे सौँपि देइहीं।’”

12हम पचे जब इ सुनेन तउ हम हुवाँ क मनइयन ओसे यरूसलेम न आवइ क पराथना किहेन। 13यह पइ पौलुस जवाब दिहेस, “इ तरह रोइ रोइके मोर हिरदय तोइत भए इ तू पचे का करत बाट्या? मईँ तउ यरूसलेम मँ न सिरिफ बाँधा जाइ बरे बल्कि पभू ईसू मसीह क नाउँ प मरइ तलक सन्ध अही!”

14काहेकि हम ओका मना नाहीं कइ पाएन। तउ बस एँतना कहिके चुप्पी साधि गएन “जइसी पभू क इच्छा।”

15इ दिनन क पाछे फिन हम तइयारी कइके यरूसलेम चला गएन। 16कैसरिया स कछू चलन भी हमरे संग होइ गएन। उ पचे हमका साइप्रस क मनासोन नाउँ क एक मनई क हियाँ लइ गएन जउन ईसू का पहिला चेला रहा। हमका उहइ क संग ठहरइ क रहा।

पौलुस क याकूब स भेंट

17यरूसलेम पहुँचे प भाई लोगन बड़ा उछाइ स हमार सुआगत सत्कार किहेन। 18दूसर दिन पौलुस हमरे संग याकूब स भेंटइ गवा। हुवाँ सबहिं कलीसिया क अगुआ हाजिर रहेन। 19पौलुस ओनकइ सुआगत सत्कार किहेस अउर ओन सब कामे क बारे मँ जउन परमेस्सर ओकरे हीला स गैर यहूदियन क बीच करवाए रहा, एक एक कइके कहि सुनाएस। 20तउ उ पचे परमेस्सर क स्तुति करत भए बोलेन, “बंधु तू पचे तउ लखत ही अहा हियाँ केनेना ही हजार यहूदी अइसा अहइँ जउन बिसवास ग्रहण लिहे बाटेन। मुला उ पचे सोचत ही मूसा का व्यवस्था क मानब बहुत जरूरी अहइ। 21तोहरे बारे मँ ओनसे कहा गवा बाटइ कि तू पचे गैर यहूदियन क बीच रहइवाला सबहिं यहूदी लोगन क मूसा क सिच्छा क तजइ क सीख देत बाट्या। अउर ओनसे कहत ह कि उ पचे न तउ आपन गदेलन क

खतना करावई अउर न ही यहूदी रीति रिवाजे प चलई। 22तउ का कीन्ह जाइ? उ पचे इ तउ जरूरी ही सुनिहीं कि तू आवा अहा। 23यह बरे तू उहइ करा जउन तोहसे हम कहत अही। हमरे संग चार ठु अइसे मनई बाटेन जउन कउनो मन्त मानेन ह। 24इ मनइयन क लइ जा अउर ओनकइ संग सुद्ध होइ क जलसा में सामिल होइ जा। ओनकइ खर्जा दइ दया उ पचे आपन मूँइ मुड़वाइ लइ लेई। एहसे सब लोग जान लेइहीं कि उ पचे तोहरे बारे में जउन सुने अहई, ओहमाँ स कउनो सच नहीं बाटइ मुला तू तउ खुद ही हमरे व्यवस्था क मुताबिक जिन्गी देत ह। 25हियाँ तलक बिसवास ग्रहण करइवाले गैर यहूदियन क सवाल बा, हम पचे ओनका एक ठु चिट्ठी में लिखिके पठएन ह:

‘उ पचे मूरतियन प चढ़ावा प्रसाद, रक्त क भोजन, गटई घोटि के मारे भएन गोरुअन अउर व्यभिचार स आपने को खुद क दूर राखई।’

पौलस बन्दी बनवा गवा

26इ तरह पौलस ओन मनइयन क आपन संगे लिहस अउर ओन मनइयन क संग आपन खुद क अगले दिन सुद्ध कइ दिहस। फिन उ मंदिर में गवा जहाँ उ गोहराइके कहेस कि सुद्ध होइके दिन कब पूर होइहीं अउर हम पचन में स हर एक बरे चढ़ावा कब चढ़ाइ जाइ।

27जब उ सात दिना पूर होइवाला रहा, एसिया स आए कछू यहूदी लोग ओका मंदिर में लखेन। उ पचे भीड़ में सबहिं मनइयन क हुस्काइ दिहेन अउर पौलस क धइ लिहन। 28फिन उ पचे नरियाइके बोलेन, “इस्त्राएल क मनइयो मदद करा। इ उहइ मनई अहइ जउन हर कहूँ हमार जनता क, मूसा क व्यवस्था क खिलाफ मनइयन क सिखावत बहकावत बा। अउर अब तउ इ गैर यहूदियन क मंदिर में लइ आवा अहइ। अउर इ इ तरह इ पवित्तर स्थान क भरभण्ड कइ दिहे अहइ।” 29(उ पचे अइसा यह बरे कहे रहेन कि त्रुफिमस नाउँ क एक इफिसी क सहर में उ पचे ओकर संग लिखिके अइसा सोचेन कि पौलस ओका मंदिर में लइ गवा अहइ।)

30तउ सारा सहर खिलाफ उठि खड़ा भवा। मनई भागि भागिके चढ़ बइठेन अउर पौलस क धइ लिहेन। फिन उ पचे ओका घिसीटते भए मंदिर स बाहेर लइ गएन अउर फउरन फाटक बन्द कइ दिहेन। 31उ पचे ओका मारइ क जतन करत ही रहेन कि रोमी फऊज क टुकड़ी क नायक क लगे इ सूचना पहुँची कि समूचइ यरूसलेम में खलबली मची बा। 32उ सेनानायक कछू सिपाहियन अउर फउज क अधिकारी क आपन संग लिहस अउर पौलस प हमला करइवाले यहूदियन कइँती बढ़ा। यहूदियन जब सेना नायक अउर सिपाही लोगन क लखेन तउ उ पचे पौलस क पीटब बंद किहेन। 33तब उ सेना नायक पौलस क लगे गवा अउर ओका बंदी बनाइ लिहस। उ ओका दुइ जंजीरे में बाँध लेइ क आदेस दिहस। फिन उ पूछेस, “उ कउन अहइ अउर उ का किहेस ह?” 34भिड़िया में स कछू मनइयन एक बात कहेन तउ दूसर लोग दूसर बात। इ हो-हल्लड़ में काहेकि उ

इ नहीं जान पाएस कु सच्चाई का अहइ, यह बरे उ हुकुम दिहस कि ओका छावनी में लइ चला जाइ।

35-36पौलस जब सीढ़िन क लगे पहुँचा तउ भिड़िया में फइली हिंसा स सिपाहियन क ओका आपन सुरच्छा में लइ जाइ पड़ा। काहेकि ओकरे पाछे मनइयन क एक भारी भीड़ इ चिचियात भइ चलत रही, “एँका मारि डवा!”

37जब उ छावनी क भीतर लइ जावा जाइवाला रहा कि पौलस सेनानायक स कहेस, “का मई तोहसे कछू कहि सकत हउँ?”

सेनानायक बोला, “का तू यूनानी बोलत अहा? 38तउ तू उ मिस्त्र क मनई तउ नहीं अहा न जउन पहिले दंगा सुरु कराए रहा अउर जउन हियाँ रेगिस्तान में चार हजार आतंकवादी लोगन क अगुआई करत रहा?”

39पौलस कहेस, “मई किलिकिया क तरसुस सहर क एक यहूदी मनई हउँ। अउर एक मसहूर सहर क नागरिक हउँ। मई तोहसे चाहत हउँ कि तू मोका इ मनइयन क बीच बोलाइ द्या।”

40ओसे आग्या पाइके पौलस सीढ़ी प खड़ा होइके मनइयन कइँती हाथ हिलावत भवा ओनका सांत होइ क कहेस। जब सब सांत होइ गवा तउ पौलस इब्रानी भाखा में मनइयन स कहइ लाग।

पौलस क भासण

22 पौलस कहेस, “भाई लोगन अउर बाप क नाई भले मनइयन, मोका आपन बचाव में अब जउन कछू कहइ क बाटइ, ओका सुना।” 2उ पचे जब ओका इब्रानी भाखा में बोलत भए सुनेन तउ उ पचे जिआदा सांत होइ गएन। फिन पौलस बोला, 3“मई एक यहूदी मनई हउँ। सिलिकिया क तरसुस सहर में जनम भवा रहा अउर मई इहइ सहर में पाला पोसा जाइके बाढ़ गएँ रहा ह। गमलिलएल* क गोड़वा प बइठिके हमरे पूर्वजन क व्यवस्था क मुताबिक बड़ी कड़ाई स मोर सिच्छा भइ। परमेस्वर बरे मई जिआदा धुन लगावत रहेंउँ। फुरे वइसे ही जइसे आज तू पचे अहा। 4इ ईसू के पंथ क मनइयन क मई एँतना सताएँउ ह कि ओनकइ परान तलक उड़ि गएन। मई पुरुसन अउर स्त्रियन क बंदी बनाएँ ह अउर जेलिया में धाँध दिहेउँ। 5खुद महायाजक अउ बुजुर्ग यहूदी नेतन क समूचइ सभा एँका सिद्ध कइ सकत ह। मई दमिस्क में एँकइ भाइयन क नाउँ चिट्ठी भी लिहेउँ ह अउर इ पंथ क हुवाँ रहइ वालन क धइके बंदी क रूप में यरूसलेम लइ आवइ बरे मई गवा भी रहे रहा ताकि ओनका सजा दीन्ह जाइ सकइ।

पौलस क मन कइसे बदल गवा

6“फिन अइसा भवा कि मई जब जात्रा करत करत दमिस्क क लगे पहुँचा तउ लग भग दुपहरिया क समइ अकास स एकाएक एक जोर क प्रकास चारिहुँ कइँती फइला। 7मई भुइयाँ प भहराइ गवा। तबहिं मई एक अवाज

गमलिलएल यहूदी लोगनक एक धरम क खास फरीसी लोगनक एक ठु खास धरम-गरु। (प्रेरित 5:34)

सुनेउँ जउन मोसे कहत रही, 'साउल' ओ साउल! तू मोका काहे सतावत अहा?' 8तब मई जवाबे मँ कहेउँ, 'पभू, तू कउन अहा?' उ मोसे कहेस, 'मई अहइ नासरी ईसू अहउँ जेका तू सतावत बाट्या।' 9जउन मोरे संग रहेन, उ सबइ भी उ प्रकास निहारेन मुला उ बाणी क जउन मोका गोहराए रहा, उ पचे समुझि नाही पाएन। 10मई पूछेउँ, 'पभू, मई का कररुँ?' एह पइ पभू मोसे कहेस, 'खड़ाहुवा, अउर दमिस्क क चला जा। हुवाँ तोहका सब कछू बताइ दीन्ह जाइ, जेका करइ बरे तोहका मुकरर कीन्ह गवा बा।' 11काहेकि मई उ जोरदार प्रकास स कछू लखि नाही पाएउँ रहा, तउ मोर संगी मोर हथवा धइके मोका लइ चलेन अउर मई दमिस्क पहोचि गएउँ।

12"हुवाँ हनन्याह नाउँ क एक मनई रहा। उ व्यवस्था क पालन करइवाला भगत रहा। हुवाँ क बसइया सबहिं यहूदियन क संग ओकर मेलजोल रहा। 13उ मोरे लगे आवा अउउ मोरे नगिचे खड़ा होइके बोला, 'भाई साऊल, फिन स लखइ लगा।' अउर उहइ छिन मई ओका लखइ क जोग्य होइ गवा। 14उ कहेस, 'हमरे पूर्वजन क परमेस्सर तोहका चुनि लिहे अहइ कि तू ओकर इच्छा क परखा, ओकरे धरम क सरूप क लखा अउर ओकर बाणी सुना। 15काहेकि तू जउन लख्या ह अउर जउन सुन्या ह, ओकरे बरे सबहिं मनइयन क समन्वा तू ओकर साच्छी होब्या। 16यह बरे अब तू केकर बाट जोहत बाट्या, खड़ा होइ जा बपतिस्मा ग्रहण करा अउर ओकर नाउँ क गोहरावत भए आपन पाप क धोइ डावा।'

17"फिन अइसा भवा कि जब मई यरूसलेम लौटिके मंदिर मँ पराथना करत रहेउँ तबहिं मोर समाधि लग गइ 18अउर मई लखेउँ कि ईसू मोसे कहत अहइ, 'हाली! करा अउर फउरन यरूसलेम स बाहेर जा काहेकि मोरे बारे मँ उ पचे तोहार साच्छी न मनिहीं।' 19तउ मई कहेउँ, 'पभू इ लोग तउ जानत हीं, कि तोह प बिसवास करइया मनइयन क बंदी बनवत भए अउर पीटत भए मई यहूदी आराधनालय मँ टहरत फिरा हउँ। 20अउर तउ अउर जब तोहार साच्छी स्तिफनुस क रकत बहावा जात रहा, तब भी मई आपन समर्थन देत भए हुवई खड़ा रहेउ। जउन ओकर कतल किहे रहेन, मई ओनकइ ओढ़ना क रखवाली करत रहेउँ। 21फिन उ मोसे बोला, 'तू जा, काहेकि गैर यहूदियन क बीच दूर-दूर ताई पठउबा।''

22इ बात तलक उ पचे सुनत रहेन फिन ऊँच अवाजे मँ चिल्लाइ उठेन, "अइसे मनइयन क धरती स अजाद करा। इ जिअइ क जोग्य नाही बा।" 23उ पचे जब चिचियात रहेन अउर आपन ओढ़ना क उतारि उतारिके लोकावत रहेन अउर अकासे मँ धूरि उछारत रहेन, 24तबहिं सेनानायक आदेस दिहेस कि पौलुस क जेले मँ लइ जावा जाइ। उ कहेस कि कोड़ा स मारि मारिके ओसे बकरवावा जाइ ताकि मनइयन क पता लागि कि ओह पइ मनइयन क चिचियाइ क कारण का बाटइ। 25मुला जब उ पचे ओका कोड़ा मारइ बरे बाँधत रहेन तबहिं हुवा खड़ा भवा फऊजीनायक स पौलु स कहेस, "कउनो रोमी नागरिक क, जउन अपराधी न पावा गवा होइ, कोड़ा लगाउब का ओका नीक बा?"

26फऊजीनायक इ सुनिके सेनानायक क निअरे गवा अउर बोला, "इ आप का करत अहई?" काहेकि इ तउ रोमी नागरिक अहइ।"

27"एँह पइ सेनानायक ओकरे लगे आइके पूछेस, "मोका बतावा, का तू रोमी नागरिक अहा?"

पौलुस जवाब दिहेस, "हाँ।"

28एँह पइ सेनानायक जवाब दिहेस, "इ नागरिकता पावइ बरे मोका तउ ढेर का धन खर्च करइ पड़ा रहा।"

पौलुस कहेस, "मुला मई तउ जनम स रोमी नागरिक हउँ।"

29तउ उ पचे जउन ओसे पुछताछ करत रहेन, तुरंत पाछे हटि गएन अउर सेनापति भी इ समुझिके कि उ एक रोमी नागरिक अहइ अउर उ ओका बंदी बनाए अहइ, बहोत डेराइ गवा।

यहूदी नेता क समन्वा पौलुस क भासण

30काहेकि उ सेनानायक इ बात क ठीकठीक पता लगावइ चाहत रहा कि यहूदियन पौलुस प जुर्म काहे लगाएन, यह बरे उ दूसर दिन बंधन खोल दिहेस। फिन मुख्ययाजक अउर सबन त सर्वोच्च यहूदी महासभा क बोलाइ पठएन अउर पौलुस क ओनकइ समन्वा लाइके खड़ा कइ दिहेस। पौलुस यहूदी महासभा प टकटकी लगाइके निहारत।

23 भवा कहेस, "मोर भाइयो, मई परमेस्सर क समन्वा आजु तलक अन्तः मन स जिन्नगी बिताएउँ ह।" 2एह पँइ महायाजक हनन्याह पौलुस क निअरे खड़ा भए मनइयन क आदेस दिहेस कि उ पचे ओकरे मुँहे प थप्पड़ मारइँ। 3तब पौलुस ओसे कहेस, "हे सफेदी स पोती भइ दीवार! परमेस्सर क मार तोह पइ पड़ी। तू हिआँ व्यवस्था क मुताबिक कइसा निआब करइ बइठा अहा कि तू व्यवस्था क खिलाफ मोका थप्पड मारइ आदेस देत अहा।"

4पौलुस क लगे खड़ा भए मनइयन कहेन, "परमेस्सर क महायाजक क बेज्जत करइ क हिम्मत तोहका भवा कइसे!"

5पौलुस जवाब दिहेस, "मोका तउ पता नाही कि इ महायाजक अहइ। काहेकि लिखा अहइ, 'तोहका आपन प्रजा क राजा बरे कुभाख बोलइ नाही चाहीं।'*"

6फिन जब पौलुस क पता चला कि ओहमँ स आधा मनई सडूकी अहई अउर आधा फरीसी तउ महासभा क बीच उँच अवाज मँ कहेस, "भाइ लोगो, मई फरीसी हउँ एक फरीसी क बेटवा हउँ। मरइ क पाछे फिन स जी उठइ बरे मोरी मान्ता क कारण मोह प मुकदमा चलावा जात अहइ।"

7ओकरे अइसा कहइ प फरीसियन अउर सडूकियन मँ एक तहतुक उठा अउर सभा क बीच फूटि पड़ गइ।

8सदूकियन क कहब अहइ कि पुनरुत्थान नाहीं होत न सरगदूत होत हीं अउर न ही आतिमा। मुला फरीसियन क एँनके होइ मँ बिसवास करत हीं। 9हुवाँ बहोत सोरगुल भवा। फरीसियन क दल मँ स कछू धरम सास्तरी उठेन अउर खरी बहस करत भए कहइ लोगन, “इ मनई मँ हम पचे कउनो खोट नाहीं पावत अही। जदि कउनो आतिमा या कउनो सरगदूत एँहसे बात किहेन ह तउ एँहसे का?”

10काहेकि इ तहतुक हिंसा क रूप लइ चुका रहा, एँहसे उ सेनानायक डेराइ गवा कि कहूँ उ पचे पौलुस क बोटी बोटी न कइ डावई। तउ उ सिपहियन क आदेस दिहेस कि उ पचे खाले जाइके पौलुस क ओनसे अलगाइके छावनी मँ लइ जाई।

11अगली राति पर्भू पौलुस क नगिचे खड़ा होइके, ओसे कहेस, “हिंमत राखा काहेकि तू जइसे मजबूती क संग यरूसलेम मँ मोर साच्छी दिहा ह, वइसे ही रोम मँ तोहका मोर साच्छी देइ क अहइ!”

कछु यहूदियन क पौलुस क मारइ क योजना

12फिन दिन निकरा। यहूदी लोगन एक कुचाल चलेन। उ पचे किरिया खाएन कि जब तलक उ पचे पौलुस क मार नाहीं डइहीं, न कछू खइहीं, न पिइहीं। 13ओनमों स चालीस स भी जियादा मनइयन इ कुचाल चलेन 14उ पचे मुख्ययाजकन अउर बुजुर्गन क लगे गएन अउर बोलेन, “हम पचे किरिया खावा ह कि हम पचे जब तलक पौलुस क मारि नाहीं डाइत, तब तलक न हम कछू खाब न पिअब। 15तउ अब तू अउर यहूदी महासभा, सेनानायक स बिनती करइ चाहत ह कि उ ओका तोहरे लगे लइ आवइ इ बहाना बनावत भए कि तू ओकरे बारे मँ अउर बारीकी स छानबीन करइ चाहत बाट्या। एँहसे पहिले कि उ हिआँ पहुँचइ, हम पचे ओका मारि डावइ क तइयार अही।”

16मुला पौलुस क भैने क इ कुचाल क भनक लग गइ तउ उ छावरी मँ जाइ पहुँचा अउर पौलुस क सब कछू बताइ दिहेस। 17एँह पइ पौलुस कउनो एक फऊजीनायक क बोलाइके ओसे कहेस, “इ जवान क सेनानायक क लगे लइ आवा काहेकि एँहसे कछू कहइ क अहइ।” 18तउ उ ओका सेनानायक क लगे लइ गवा अउर बोला, “बंदी पौलुस मोका बोलाएस अउर मोसे उ जवान क तोहरे लगे पहुँचावइ क कहेस काहेकि इ तोहसे कछू कहइ चाहत ह।”

19सेनानायक ओकर हथवा धरेस अउर ओका एक कइँती लइ जाइके पूछेस, “बतावा तू मोसे का चाहत बाट्या?”

20जवान बोला, “यहूदी इ बात प एक अउट ग अहई कि उ पचे पौलुस स अउर बारीकी स पूछताछ करइ क बहाना महासभा मँ ओका लइ जाइ बरे तोहसे पराथना करई। 21यह बरे ओनकइ जिन सुन्या। कहेकि चालिस स भी जियादा लोग घात लगाइके ओका जोहत अहई। उ पचे इ किरिया खाए अहई कि जब तलक उ पचे ओका मारि न डावई, ओनका न कछू खाब अहइ, न पिअब। बस अब तोहरे आदेस क जोहत उ पचे तइयार बइठा अहई।”

22फिन सेनानायक जवान क इ आदेस दइके पठएस, “तू इ कउनो क जिन बतावा कि तू मोका एकर खबर दइ दिहे अहा।”

पौलुस क कैसरिया पठवा जाब

23फिन सेनानायक आपन दुइ फऊजीनायकन क बोलवाइ क कहेस, “दुइ सौ सिपाही, सत्तर घुड़सवार दुइ सौ भालावालन क कैसरिया जाइके तइयार राखा। राति क नउ बजे चलइ बरे तइयार रहा। 24पौलुस क सवारी बरे घोड़न क बन्दोबस्त राखा अउर ओका सुरच्छा स राज्यपाल फेलिक्स क लगे लइ जा।” 25एक ठु चिट्ठि लिखेस जेकर विसय रहा:

26महामहीम राज्यपाल फेलिक्स क क्लौदियुस लूसियास क नमस्ते पहुँचइ।

27इ मनई क यहूदी लोगन धइ लिहेन अउर उ पचे एँकर कतल करइ क रहेन कि मई इ जानिके कि इ एक रोमी नागरिक अहइ, आपन सिपाहियन क संग जाइके एका बचाइ लिहेउँ। 28मई काहेकि उ कारण क जानइ चाहत रहेउँ जेहँसे उ पचे ओह पइ दोख लगावत रहेन, ओका ओनकइ महा आराधनालय मँ लइ जावा गवा। 29मोका पता लाग कि ओनकइ व्यवस्था स जुड़ा भए सवाल क कारण ओह पइ दोख लगावा ग रहा। मुला ओह प कउनो अइसा जुर्म नाहीं रहा जउन ओका मउत क सजा क जोगग या बंदी बनावइ जोगग साबित होइ। 30फिन जब मोका इतला मिली कि हुवाँ इ मनई क खिलाफ कउनो षडयन्त्र रचा गवा अहइ तउ मई एका तुरंतहि तोहरे लगे पठइ दीन्ह ह। अउर एँह प जुर्म लगावाइ वालन क इ आदेस दइ दीन्ह ग ह कि एकरे खिलाफ लगावा गवा जुर्म तोहरे अगवा धरई।

31तउ सिपाहिन इ आग्या क पूरा किहेन अउर उ पचे राति मँ ही पौलुस क अन्तिपत्रिस क लगे लइ गएन।

32फिन अगले दिना घुड़-सवारन क ओकरे संग अगवा जाइ बरे छोड़िके उ पचे छावनी लौटि आएन। 33जब उ पचे कैसरिया पहुँचेन तउ उ पचे राज्यपाल क उ चिट्ठी देत भए पौलुस क ओका सौंपि दिहेन। 34राज्यपाल चिट्ठी बाँचेस अउर पौलुस स पूछेस कि उ कउने पहुँटा क रहवइया बा। जबहि ओका पता लाग कि उ किलकिया क बसइया अहइ 35तउ उ ओसे कहेस, “तोह पइ जुर्म लगावइ वालन जब आइ जइहीं, मई तबहि तोर सुनवाइ करबा।” उ आग्या दिहेस कि पौलुस क पहरा क भीतर हेरोदेस क महल मँ रख दीन्ह जाइ।

यहूदियन क जरिए पौलुस प मुकदमा

24 पाँच दिना पाछे महायाजक हनन्याह कछू बुजुर्ग यहूदी नेतन अउर तिरतुल्लुस नाउँ क एक वकील संग लइके कैसरिया आवा। उ पचे राज्यपाल क समन्वा पौलुस प जुर्म सिद्ध करइ आइ रहेन। 2फेलिक्स क समन्वा

पौलुस क पेसी होए पड़ मुकदमा क सुनवाई सुरु करत भवा।

तिरतुल्लुस बोला, “महासय, तोहरे कारण हम सांति स रहत अही तोहार दूंगेस होइ स देस में बहोत जिआदा सूधार भएन ह। ३६ महामहिम फेलिक्स। हम बड़े एहसान क साथ एँका हर तरह स हर कहूँ अंगीकार करित ह। 4तोहार अउर जिआदा समइ न लेत भए, मोर पराथना अहइ कि कृपा कइके आप थोड़े में हमका सुन लेइँ। 5बात इ अहइ कि इ मनई क हम एक उत्पाती क रूप में पाएँ ह। सारी दुनिया क यहूदियन में इ दंगा भइकाएस ह। इ नासरी लोगन क पंथ क नेता अहइ। 6-8इ मंदिर क अपवित्तर करइ क जतन किहेस ह। हम पचे एँका यह बरे धरा ह। हम यह पड़ जउन आरोप लगावत अही, ओन सबन क आप खुद एँसे पूछि पछोरिके जान सकत ह।” * 9इ जुर्म में यहूदी भी सामिल होइ गएन। उ पचे जोर दइके कहत रहेन कि इ सब तथ्य फुरि अहइँ!”

पौलुस राज्यपाल फेलिक्स क सामन्वा

10फिन राज्यपाल जब पौलुस क बोलइ क इसारा किहेस तउ उ जवाब देत भवा कहेस, “तू बहोत दिना स इ देस क न्यायाधीस अहा। इ जानत भए मई खुसी क साथ आपन बचाव रखत अहउँ। 11तू खुद इ जान सकत ह कि अबहि आराधना बरे मोका यरूसलेम गए भए बस बारह दिन बीता बाटेन। 12हुवाँ मंदिर में मोका न तउ कउनो क संग बहस करत भए पावा गवा अहइ अउर न ही आराधनालय या सहर में कतहूँ अउर मनइयन क दंगा बरे भइकावत भवा 13अउर तोहरे समन्वा जउन जुर्म क इ सबइ मोह प लगावत अहइ ओनका सिद्ध नाहीं कइ सकत बाटेन। 14मुला मई तोहरे समन्वा इ बात क अंगीकार करत हउँ कि मई आपन पूर्वजन क परमेस्सर क आराधना ईसू के पंथ क मुताबिक करत हउँ, जेका इ पचे एक पंथ कहत हीं। मई हर उ बात में बिसवास करत हउँ जेका व्यवस्था बतावत ह अउर जउन नबी लोगन क किताबे में लिखी बाटइ। 15अउर मई परमेस्सर में वइसेन ही भरोसा राखत हउँ जइसे खुद ई लोग धरत हीं कि धर्मी अउर विधर्मी दुइनउँ क ही फिन उत्थान होइ। 16यह बरे मई भी परमेस्सर अउर मनइयन क समन्वा हमेसा आपन अन्तारात्मा क सुद्ध बनाए भए बरे जतन करत रहत हउँ।

17“कइउ बरिस तलक यरूसलेम स दूर रहे क पाछे मई आपन रास्ट्र बरे उपहार लइके अपने मंदिर पर भेंट चढावइ बरे आएँ ह। 18जब मई इ करत ही रहेउँ रहा उ पचे मोका मंदिर में पाएन, तब मैं बिधि क मुताबिक सुद्ध रहेउँ रहा न तउ हुवाँ भीड़ रही अउर न कउनो असांति। 19एसिया स आए कछू यहूदी हुवाँ मौजूद रहेन। अगर मोरे खिलाफ

ओनके लगे कछू अहइ तउ उ पचे तोहरे समन्वा हाजिर होइके मोह प जुर्म लगावइ चाही। 20या इ लोग जउन हियाँ अहइँ उ सबइ बतावई कि जब मई यहूदी हमसाभा क समन्वा खड़ा रहा, तब उ पचे मोहे में का खोट पाएन 21सिवाय एँकरे कि जब मई ओनकइ बीच में खड़ा रहा तब मई ऊँची अवाज में कहे रहा, ‘मरे भएन में स जी जाइ क बारे में आजु तोहरे जरिए मोर निआव कीन्ह जात अहइ।”

22फिन फेलिक्स, जउन इ ईसू के पंथ क पूरी जानकारी रखत रहा, मुकदमा क सुनवाई क आगे टारत भवा बोला, “जब सेनानायक लूसियास आइ, मई तबहि तोहरे इ मुकदमे प आपन फैसला देब। 23फिन उ फऊजी नायक क आदेस दिहेस कि तनिक छूट दइके पौलुस क पहरा क भीतर धरा जाइ अउर ओकरे मीतन क ओकर जरूजत पूरा करइ स न रोका जाइ।

पौलुस क फेलिक्स अउर ओकर स्त्रियन स बातचीत

24कछू दिना पाछे फेलिक्स आपन पतनी दुसिल्ला क संग हुवाँ आवा। उ एक यहूदी स्त्री रही। फेलिक्स पौलुस क बोलवावइ पठएस अउर मसीह ईसू में बिसवास क बारे में ओसे सुनेस। 25मुला जब पौलुस नेकी, खुद क संयम में राखइ अउर आवइवाला निआव क बारे में बोलत रहा तउ फेलिक्स डेराइ गवा अउर बोला, “इ समइ तू चला जा, मौका मिले प मई तोहका फिन बोलवाउबा।” 26अहइ समइया ओका इ आसा भी रहाई कि पौलुस ओका कछू धन देइ। यह बरे फेलिक्स पौलुस क बातचीत बरे अक्सर बोलवावइ बरे पठवत रहा।

27दुइ बरिस अइसे ही बीति जाए क पाछे फेलिक्स क जगइ पुरखिउस फेस्तुस ग्रहण कइ लिहस। अउर काहेकि, फेलिक्स यहूदियन क खुस रखइ चाहत रहा, यह बरे उ पौलुस क जेल में ही रहइ दिहेस।

पौलुस कैसर स निआव चाहत ह

25 फेस्तुस जब उ प्रदेस में राज्यपाल होइ गवा अउर तीन दिना पाछे उ कैसरिया स यरूसलेम क रवाना होइ गवा। 2हुवाँ मुख्ययाजकन अउर यहूदियन क मुखिया लोग पौलुस क खिलाफ लगावा गवा जुर्म ओकरे समन्वा रखेन अउर ओसे पराथना किहेन 3कि उ पौलुस क यरूसलेम पठवाइके ओनकइ पच्छ लेइ। (उ पचे रस्त में ही ओका मारि डवइ क कुचाल बनाए रहेन।) 4फेस्तुस जवाब दिहेस कि “पौलुस कैसरिया में बंदि अहइ अउर उ जल्दी ही हुवाँ पहोंचइवाला बाटइ।” उ कहेस, 5“तू आपन कछू मुखिया लोगन क मोरे संग पठइ दया अउर जदि उ मनई अपराध किहे बा तउ उ पचे हुवाँ मोह प जुर्म लगावइ।”

6ओनके संग कछू आठ दस दिन बाताइके फेस्तुस कैसरिया चला गवा। अगले ही दिन अदालत में निआव क आसन प बैठिके उ आदेस दिहेस कि पौलुस क पेस कीन्ह जाइ। 7जब उ पेस भवा तउ यरूसलेम स आए भएन यहूदी लोग ओका घेरिके खड़ा होइ गएन। उ पचे ओह प बहुतेरे भारी दोख लगाएन मुला उ पचे ओके सिद्ध नाहीं कइ सकेन। 8पौलुस खुद आपन बचाव करत भवा कहेस,

पद 6-8 कछू यूनानी प्रतियन पद छः क आखिरी भाग में 7 अउ 8 क सुरु क भाग भी जोड़ा गवा अहइ: “हम आपन व्यवस्था क मुताबिक एँकर निआव करा चाहित ही। 7 मुला सेनानायक लिसिआस जबस ओका हमसे झपट लिहेस 8 अउ आपन मनइयन क हुकुम दिहेस कि उ सबइ एँह पर जुर्म लगावइ बरे तोहरे समन्वा लइ आवई।”

“मई न तउ यहूदियन क व्यवस्था क खिलाफ कउनो करम किहेउँ ह, न ही मंदिर क खिलाफ अउर न ही कैसर क खिलाफ।”

9मुला काहेकि फेस्तुस यहूदी लोगन क खुस करइ चाहत रहा, जवाब मँ उ पौलुस स कहेस, “तउ का तू यरूसलेम जाइ चाहत ह ताकि मई हुवाँ तोह पइ लगावा गवा जुर्म क निआवा कइ सकउँ?”

10पौलुस कहेस, “इ समइ मई कैसर क अदालत क समन्वा खड़ा हउँ। मोर निआव हिअँई कीन्ह जाइ चाही। मई यहूदियन क संग कछू बुराई नाहीं किहे अही, ऐंका तू भी बहोत अच्छी तरह जानत ह। 11यदि मई कउनो अपराधे क दोखी अहउँ अउर मई कछू अइसा स किहे हउँ, जेकर सजा मउत अहइ, तउ मई मरइ स बचब न चाहब, मुला जउन लोग मोह प जउन जुर्म लगावत अहइँ, ओहमाँ स कउनो सच नाहीं बा। तउ मोका कउनो भी ऐंका नाहीं सौंपिर सकत। इहइ कैसर स मोर पराथना अहइ।”

12आपन परिसद स राय लिहे क पाछे फेस्तुस ओका जवाब दिहेस, “तू कैसर स फिन बिचार बरे पराथना किहा ह, यह बरे तोहका कैसर क समन्वा ही लइ लीन्ह जाइ।”

पौलुस क हेरोदेस अग्रिप्पा क समन्वा पेसी

13कछू दिन पाछे राजा अग्रिपा अउर बिरनीके फेस्तुस क सुआगत करइ कैसरिया आएन। 14जब उ पचे हुवाँ कई दिन बिताइ चुकेन तउ फेस्तुस राजा क समन्वा मुकदमा क इ तरह समझाएस, “हिआँ एक अइसा मनई अहइ जेका फेलिक्स बंदी क रूप मँ छोड़ गवा रहा। 15जब मई यरूसलेम मँ रहेउँ, मुख्ययाजक अउर बुजुर्ग यहूदी नेतन ओकरे खिलाफ मुकदमा दर्ज किहेन अउर माँग किहे रहेन कि ओका समा दीन्ह जाइ। 16मई ओनसे कहे रहेउँ, ‘रोमी मनइयन मँ अइसी रीति नाहीं कि कउनो मनइ क, जब तलक वादी प्रतिवादी क आमना समन्वा न कइ दीन्ह जाइ, अउर ओह प लगावा भएन जुर्म स ओका बचावइ क मौका न दइ दीन्ह जाइ। ओका सजा बरे, सौपा जाइ।’ 17तउ उ सबइ मनइयन जब मोरे संग हिआँ आएन तउ मई बिना देर लगाए भए अगले दिना निआव क आसन पबइठिके उ मनई क पेस कीन्ह जाइके हुकुम दिहेस।

18“जब ओह पइ देख लगावइ वालन बोलइ खड़ा भएन तउ उ पचे ओह पइ अइसा कउनो दोख नाहीं लगाएन जइसा कि मई सोचत रहेउँ। 19बल्कि ओनकइ आपन धरम क कछू बातन पर भी अउर ईसू नाउँ क एक मनई प जउन मर चुका बा, ओनमाँ कछू बिचार मँ अलगौझा रहा। तउ भी पौलुस क दावा अहइ कि उ जिअत अहइ। 20मई समुझ नाहीं पावत हउँ की इ बिसयन क छानबीन कइसे कीन्ह जाइ, यह बरे मई ओसे पूछेउँ कि का उ आपन इ जुर्मन क निआव करावइ बरे यरूसलेम जाइ क तइयार अहइ? 21मुला पौलुस जब पराथना किहेस कि ओका सम्राट क बरे ही हुवाँ रखा जाइ, तउ मई हुकुम दिहेउँ, कि मई जब तलक ओका कैसर क लगे न पठइ देउँ, ओका हिअँई रखा जाइ।”

22एँह पइ अग्रिप्पा फेस्तुस स कहेस, “इ मनई क सुनवाई मई खुद कइ चाहत हउँ।”

फेस्तुस कहेस, “तू ओका भियान सुन लिहा।”

23तउ भियान भए प राजा अग्रिप्पा अउर बिरनीके बड़ा सजधज क साथ आएन अउर उ पचे फऊजीनायकन अउर सहर क प्रमुख मनइयन क संग सभाभवन मँ घुसा। फेस्तुस हुकुम दिहेस अउर पौलुस क हुवाँ लइ आवा गया। 24फिन फेस्तुस बोला, “महाराजा अग्रिप्पा अउर सज्जन लोगो जउन हिआँ अहा! तू पचे इ मनई क निहारत अहा जेकरे बारे मँ समूचा यहूदी समाज, यरूसलेम मँ अउर हिआँ, मोसे चिचिआइ चिचिआइके माँग करत अहइ कि ऐंका अब अउर जिन्दा नाहीं रहइ देइ चाही। 25मुला मई जाँच लिहेउँ ह कि इ अइसा कछू नाहीं किहेस ह कि ऐंका मउत क सजा दीन्ह जाइ अउर काहेकि इ खुद सम्राट कैसर स फिन बिचार करइके पराथना किहेस ह कि यह बरे मई ऐंका हुवाँ पठवइ क निर्णय लिहेउँ ह। 26मुला ऐंकरे बारे मँ सम्राट कैसर क लगे लिखिके पठवइ क मोरे लगे कउनो तय कीन्ह भइ बात नाहीं अहइ। मई ऐंका यह बरे आप सबन क समन्वा, अउर खास रूप स हे महाराजा अग्रिप्पा, तोहरे समन्वा लइ आएँ ह ताकि इ जाँच पड़ताल क पाछे लिखइ क मोरे लगे कछू होइ। 27कछू भी होइ मोका कउनो बंदी क ओकर अभियाग पत्र बगैर तइयार किए हुआँ पठउब संगत नाहीं जान पड़त।”

पौलुस राजा अग्रिप्पा क समन्वा

26 अग्रिप्पा पौलुस स कहेस, “तोहका खुद आपन कइँती स बोलइ क अनुमति बाटइ।” एँह पइ पौलुस आपन हाथ उठाएस अउर आपन बचाव मँ बोलब सुरु किहेस, 2“हे राजा अग्रिप्पा, मई आपन क भाग्यवान समुझत हउँ कि यहूदियन मोह पइ जउन जुर्म लगाए बाटेन, ओन सब बातन क बचाउ मँ, तोहरे अगवा बोलइ जात हउँ। 3खास तरह स इ यह बरे सच अहइ कि तोहका सबहिं यहूदी रीति रिवाज अउर ओनके विवाद क गियान अहइ। यह बरे मई तोहसे पराथना करत हउँ कि धीरझ क साथ मोर बात सुनी जाइ।

4“सबहिं यहूदी जानत ही कि सुरु स ही खुद आपन देस मँ अउर यरूसलेम मँ भी बचपन स ही मई कइसा जिन्नगी जिए अहइ। 5उ पचे मोका बहोत समइ स जानत हीं अउर जदि उ पचे चाहइँ तउ इ बात क साच्छी दइ सकत हीं मई आपन धरम क एक सबसे जिआदा कट्टर पंथ क मुताबकि एक फरीसी क रूप मँ जिन्नगी बिताएँ ह। 6अउर अब इ मुकदमा क सफाई क हालत मँ खड़ा भए मोका उ बचन क भरोसा अहइ जउन परमेस्सर हमरे पूर्वजन क दिहे रहा। 7इ उहइ बचन अहइ जेका हमार बारहु जातिन रात दिन मन लगाइके परमेस्सर क सेवा करत भए, पावइ क भरोसा रखत हीं हे राजन! इहइ भरोसा क कारण मोह प यहूदियन क जरिए जुर्म लगावा जात अहइ। 8तू पचन मँ स कउनो क भी इ बात बिसवास क जोगग काहे नाहीं लागत बा कि परमेस्सर मेरे भए क जिआइ देत ह।

9"मई भी सोचत रहेउँ नासरी ईसू क नाउँ क खिलाफत करइ क लिए जउन भी बन पड़इ, उ बहोत कछू करँ। 10अउर अइसा ही मई यरूसलेम मँ किहेउँ भी। मई परमेस्सर क बहोत स भगतन क जेलि मँ धाँध दिहेउँ काहेकि मुख्ययाजक लोगन स एँकरे बरे मोका हक मिला रहा। अउर जब ओनका मारा गवा तउ मई आपन मत ओनकइ खिलाफ दिहेउँ। 11आराधनालय मँ स मई ओनका अक्सर सजा देत रहेउँ अउर ईसू क निन्दा करइ बरे ओन पइ दबाव डावइ क जतन करत रहेउँ। ओनकइ बरे मोर किरोध एँतना जिआदा रहा कि ओनका सतावइ बरे मई बाहेर क सहर तलक गएँ।

पौलुस क जरिए ईसू क दर्शन क बारे मँ बताउब

12"अइसी ही एक जात्रा क मौके प जब मई मुख्ययाजक स आग्या पाइके दमिस्क जात रहेउँ, 13तबहिँ दुपहरिया क जब मई अबहिँ राहे मँ रहेउँ ही कि मई हे राजन, सरग स एक प्रकास उतरत भवा लखेउँ। ओकर तेज सूरज स भी जिआदा रहा। उ मोरे अउर मोरे संग क मनइयन क चारिहँ कइँती चमचमान। 14हम पचे धरती प बहराइ गएन, फिन मोका एक बानी सुनाइ दिहेस। उ इब्रानी भाखा मँ मोसे कहत रही, 'साऊल, अरे ओ साऊल, तू मोपर अत्याचार करत अहा? इ तू अहा जो मोरे विरुद्ध लड़ कर मोका सतावत अहा। धार क नोक प लात मारब तेरे बस क बात नाहीं अहइ।' 15फिन मई पूछेउँ, 'हे पर्भू, तू कउन अहा?' पर्भू जवाब दिहेस, 'मई ईसू हउँ जेका तू यातना देत बाद्या। 16मुला अब तू उठा अउर आपन गोड़े प खड़ा हवा। मई तोहरे अगवा यह बरे परगट भएउँ ह कि तोहका एक सेवक क रूप भर्ती करउँ अउर जउन कछू मई तोहका देखाउब, ओकर तू साच्छी रह्या। 17मई जउन यहूदियन अउर गैर यहूदियन क लगे 18ओकर आँखी खोलइ, ओनका अँधियारा स प्रकास कइँती लावइ अउर सइतान क सक्ती स परमेस्सर कइँती मोड़इ बरे, तोहका पठवत हउँ, ओनसे तोहार रच्छा करत रहब। एँहसे उ पचे पापन स छमा पइहीं अउर ओन मनइयन क बीच ठउर पइहीं जउन मोहे मँ बिसवास धरइ क कारण पवित्तर भएन ह।"

पौलुस क काज

19हे राजन अग्रिप्पा, यह बरे तबहिँ स उ दर्शन क आग्या क कबहुँ भी न उल्लंघन किए भए 20बल्कि ओकरे खिलाफ मई पहिले ओनका दमिस्क मँ, फिन यरूसलेम मँ अउर यहूदिया क समुच्चइ पहुँटा मँ उपदेस देत रहा। अउर गैर यहूदियन क मनफिराव क मुताबिक करम करइ बरे कहत रहा। 21इहइ कारण जब मई हिआँ मंदिर मँ रहा, यहूदी लोग मोका धइ लिहेन अउर मोर कतल क जतन किहेन। 22मुला आजु तलक मोका परमेस्सर क मदद मिलत रही ह अउर यह बरे मई हिआँ छोट अउर बड़कवा सबहिँ लोगन क समन्वा साच्छी देइ बरे खड़ा हउँ। मई बस ओन बातन क तजिके अउर कछू नवा नाहीं कहत जउन नबियन अउर मूसा क मुताबिक होइ क रही 23कि मसीह क यातना

भोगइ क होइ अउर उहइ मरे भएन मँ पहिला जी जाइवाला होइ अउर उ यहूदियन अउर गैर यहूदियन क जोति क संदेस देइ।"

पौलुस क जरिए अग्रिप्पा क भरम

दूर करइ क जतन

24उ आपन बचाउ मँ जब इ बातन क कहत ही रहाकि फेस्तुस चिल्लाईके कहेस, "पौलुस तोहार दिमाग खराब होइ ग अहइ। तोहार जिआदा पढ़ाई तोहका पगलाइ देति अहइ।"

25पौलुस कहेस, "हे परमगुनी फेस्तुस, मई पागल नाहीं अहउँ बल्कि जउन बातन क मई कहत रहेउँ ह उ सच अहइँ अउर संगत भी अहइँ। 26खुद राजा बातन क जानत बा अउर मई अजादी क मन स ओसे कहि सकत हउँ। मोर निस्चय अहइ कि एनमाँ स कउनो बात ओकरी आँखिन स, ओझल नाहीं बाटइ। मई अइसा यह बरे कहत हउँ कि इ बात कउनो कोने मँ नाहीं कही गइ। 27हे राजन अग्रिप्पा, नबियन जउन लिखे अहइँ का तू ओहमाँ बिसवास रखत ह? मई जानत हउँ कि तोहार बिसवास अहइँ।"

28एँह पइ अग्रिप्पा पौलुस स कहेस, "का तू इ सोचत ह कि एँतनी असानी स तू मोका मसीही बनवइ क मनाइ लेब्या?"

29पौलुस जवाब दिहेस, "तनिक समइ मँ, चाहे जिआदा समइ मँ, परमेस्सर स मोर पराथना अहइ कि सिरिफ तू बल्कि उ पचे भी, जउन आजु मोका सुनत बाटेन, वइसा ही होइ जाइँ, जइसा मई हउँ, सिवाय इ जंजीरन क।"

30फिन राजा खड़ा होइ गवा अउर ओकरे संग ही राज्यपाल बिरनिके अउर साथ मँ बइठा भए लोग भी उठिके खड़ा होइ गएन।

31हुवाँ स बाहेर निकरिके उ पचे आपुस मँ बात करत भए कहइ लागेन, "इ मनई तउ अइसा कछू नाहीं किहे बा, जेहसे एँका मउत क सजा या जेल मिल सकइ।"

32अग्रिप्पा फेस्तुस स कहेस, "जदि इ कैसर क समन्वा फिन स बिचार क पराथना न होत, तउ इ मनई क छोड़ जाइ सकत रहा।"

पौलुस क रोम पठउब

27 जब इ तय होइ गवा कि हमका जहाज स इटली जाइ क अहइ तउ पौलुस अउर कछू दूसर बंदी मनइयन क सम्राट क फउज क यूलियुस नाउँ क एक फऊजीनायक क सौँपि दीन्ह गवा। 2अद्रमुतियुम स हम पचे एक जहाजे प सवार भए जउन एसिया क तट क पहुँटा स होइके जाइवाला रहा अउर समुदर क जात्रा प निकरेन। थिस्सलुनीके बसइया एक मैसीडोनि, जेकर नाउँ अरिस्तर्खुस रहा, भी हमरे संग रहा। 3अगले दिन हम सैदा मँ उतरे। हुवाँ यूलियुस पौलुस क संग नीक विउहार किहेस अउर मोका ओकरे मीतन स मिलन बरे क अनुमति दइ दीन्ह गइ जेहसे उ ओकर देखभाल कर सकइ। 4हुवाँ स हम समुदर-स्ता स फिन चल पड़ेन। हम पचे साइप्रास क ओटे ओटे चलत रहे काहेकि हवा हमरे खिलाफ बहत रही। 5फिन हम पचे किलिकिया अउर पंफूलिया क समुदर क

पार करत भए लूसिया क मूरा पहोंचेन 6हुवाँ फऊजीनायक क सिकन्दरिया क इटली जाइवाला एक ठु जहाज मिला। हम पचे ओह पइ सवार भएन।

7कइउ दिन तलक हम पचे धीमे धीमे आगे बढ़त भए बड़ी तकलीफे स कनिदुस क समन्वा पहोंचेन मुला काहेकि हवा आपन राहे प नहीं रहइ देइ चाहत रही, तउ ह सबइ सलभौने क समन्वा क्रीत क ओट में आपन नाउ बढ़ावइ लागे। 8क्रीत क किनारे-किनारे बड़ी तकलीफ स नाउ क अगवा अगवा खेवत भए एक अइसे ठउर प पहोंचेन जेकर नाउ रहा सुरच्छित बंदरगाह। हिआँ स लसया नगर लगे ही रहा।

9समइ बहोत बीति चुका रहा अउर नाउ क आगे बढ़ाउब भी संकट स भरा रहा काहेकि तब तलक उपवास क दिन* बीत चुका रहा। यह बरे पौलुस चिताउनी देत भए ओनसे कहेस, 10“अरे मनइयो, मोका लगत ह कि हमार इ सागर जात्रा नास कइ देइ, न सिरिफ माल असबाब अउर जहाजे बरे बल्कि हमरे परान बरे भी।”

11मुला पौलुस जउन कहे रहा ओका सुनइ क सिवाय उ फऊजीनायक, जहाज क मालिक अउर कप्तान क बातन प जिआदा बिसवास करत रहा। 12अउर काहेकि उ बन्दरगाह सीत रितु बरे चउचक नहीं रहा, यह बरे जिआदातर मनइयन, जदि होइ सकइ तउ फीनिक्स पहोंचइ क जतन करने क ही ठान लिहेन। अउर जाड़ा हुवँइ काटइ क निस्चय किहेन। फीनिक्स पहोंचाइ क्रीत क अइसा बन्दरगाह अहइ जेकर मुँह दक्खिन पच्छिम अउर उत्तर पच्छिम दुइनउँ क समन्वा पड़त ह।

तूफान

13जब तनिक तनिक दक्खिन हवा बहइ लाग तउ उ पचे सोचेन कि जइसा उ पचे चाहे रहेन, वइसा ही ओनका मिलि गवा अहइ। तउ उ पचे लंगर उठाइ लिहेन अउर क्रीत क किनारे किनारे जहाज अगवा खेवइ लागेन। 14मुला अबहि कउनो जिआदा अहइ नहीं बीता रहा कि द्वीप क एक कइँती स एक भयानक आँधी उठी अउर आरपार लपेटत चली गइ। इ “उत्तर पूरब” क आँधी कही जात रही। 15जहाह तूफान में घिरि गवा। उ आँधी क फाड़िके अगवा नहीं बढ़ सकत रहा तउ हम पचे ओका यों ही छोड़िके हवा क रुख चलइ दीन्ह। 16हम क्लोदा नाउँ क एक छोटा स द्वीप क ओटे में बहत भए बड़ी तकलीफे स रच्छा नाउ क पाइ सकेन। 17फिन जीवन रच्छा-नाउ क उठाए क पाछे जहाज क रस्सा क लपेटि के बाँध दिन्ह गवा अउर कहीं सुरतिस क ऊथल पानी में धँस न जाइ, इ डर स उ पचे जहाज क पाल उतारेन अउर जहाज क बहइ दिहेन। 18दूसरे दिन तूफान क घातक थपेड़ा खात भए उ पचे जहाज स माल-असबाब लोकावइ लागेन। 19अउर तीसर दिन उ पचे आपन ही हाथन स जहाजे प धरा औजार फेंक दिहेन।

उपवास क दिन हिआँ उपवासे क दिन स मतलब परिसोधन क उपवास क दिन स अहइ। बरिस क आखिर में इ यहूदियन क एक खास पवित्र दिन होत रहा। जाड़ा क इ दिन में समुदर में खौफनाक तूफान क अंसेसा रहत रहा।

20फिन बहोत दिना तलक जब न सूरज देखान, न तारा अउर तूफान आपन घातक थपेड़ा मारत ही रहा तउ हमरे बच पावइ क आसा पूरी तरह खतम होइ गइ।

21बहोत दिना स कउनो कछू खाएउ नहीं रहा। तब पौलुस ओनकइ बीच खड़ा होइके कहेस, “अरे अमइयो, अगर क्रीत स रवाना न होइके मोर सलाह मान लिहे होत्या तउ तू पचे इ बिनास अउर हानि स बच जात्या।

22मुला मई तोहसे अबहुँ तोहसे हठ करत हउँ कि आपन हिम्मत बाँधि रहा। काहेकि तू सबन में स कउनो क प्राण नहीं खोवइ क अहइ। हौँ, बस इ जहाज क नास होइ जाइ 23काहेकि पछली रात उ परमेस्सर क एक सरगदूत, जेकर मई अहउँ अउर जेकर सेवा करत हउँ, मोरे लगे आइके खड़ा भवा। 24अउर बोला, ‘पौलुस, जिन डेराअ। मोका निहचय ही कैसर क समन्वा खड़ा होइ क बाटइ अउर ओन सबन क अउर तोहरे संग जात्रा करत अहइँ, परमेस्सर तोहका दइ दिहे अहइ।’ 25तउ मनइयन, आपन हिम्मत बनाइ राखा काहेकि परमेस्सर में मोर बिसवास अहइ, यह बरे जइसा मोका बतावा ग अहइ ठीक वइसेन घटी। 26किन्तु हम कउनो टापू क ऊथल पानी में जरूर जाइ धँसब।”

27फिन जब चउदहवीं रात आइ हम अद्रिया क समुदर में थपेड़ा खात रहे रहेन तबहिं आधी रातिक लगे जहाज क चालकन क लाग जइसे कउनो किनारा नगिचे अहइ। 28उ पचे समुदर क गहिराइ नपेन तउ पाएन कि हुवाँ कउनो अस्सी हाथ गहिराइ रही। तनिक बेर क पाछे उ पचे गहराई क फिन टोहेन अउर पा पाएन कि अब गहिराई साठ हाथ रहि गइ रही। 29इ डर स कि उ पचे कतहुँ कउनो चट्टानी ऊथल किनारा में न फँसि जाइँ, उ सबइ जहाज क पिछले हीसा स चार ठु लंगर बहाएन अउर पराथना करइ लागेन कि कउनो तहर दिन निकरि आवइ। 30ओहर जहाज क चलावइ वाला जहाज स पराइ क जतन करत रहेन। उ पचे इ हीला बनावत भए कि उ पचे जहाज क अगले हीसा स कछू लंगर बहावइ जात अहइँ, जीवन रच्छा नाउ क समुदर में उतारि दिहेन। 31तबहिं फऊजीनायक स पौलुस कहेस, “जदि इ सबइ जहाज प नहीं थामेन तउ तू पचे भी नहीं बच पउब्या।”

32तउ सिपाहियन रस्सा क काटिके जीवन रच्छा नाउ तरखाले गिराइ दिहेन।

33भोर होइ स तनिक पहिले पौलुस इ कहत भए सब मनइयन स तनिक खइया खाइके हठ किहेस, “चौदह दिन बीति चुका अहइँ अउर तू पचे लगातर फिकिर क कारण भूखा बाट्या। तू पचे कछू भी नहीं खाए बाट्या। 34मई तोहसे कछू खाइके यह बरे हठ करत अही कि तोहरे जिअइ बरे इ जरुरी अहइ। काहेकि तू पचन में स कउनो क मूँडे क एक बार तलक बाँका नहीं होइ क बा।” 35एतना कहि चुके क पाछे उ तनिक रोटी लिहेस अउर सबन क समन्वा परमेस्सर क धन्यवाद दिहेस। फिर रोटी क तोरेस अउर खाइ लाग। 36एहसे ओन सबन क हिम्मत बाढ़ी अउर उ सबइ भी थोड़ा स खाना क खाएन। 37जहाज प कुल बटोरिके हम सबइ दुइ सौ छिहत्तर मनई रहेन। 38पूरा

खाना खाइ चुकइ क पाछे उ पचे समुद्र मँ अनाज बहाइके जहाज क हल्का कइ दिहेन।

जहाज क टूटब

39जबहिँ दिन क प्रकास भवा तउ उ पचे धरती क पहिचान नाहीं पाएन मुला ओनका लाग कि जइसे हुवाँ कउनो किनारा बाली खाड़ी बाटइ। उ पचे तय किहेन कि अगर होइ सकइ तउ जहाज क ठहराइ देई। 40तउ उ पचे लंगर काटिके ढील दइ दिहेन अउर ओ सबन क समुद्र मँ तरखले भहराइ दिहेन। उहइ समइ उ पचे पतवारे स बाँधा रस्सा क ढीला कइ दिहेन, फिन जहाज क अगला पतवार चढ़ाइके किनारे कइँती बढ़इ लागेन। 41अउर ओनकइ जहाज रेत मँ टकराइ गवा। जहाज क अगला हीसा ओहमाँ फँसिके जाम होइ गवा। अउर सक्तीवाली लहरन क थपेड़न स जहाज क पछिला हीसा टूटइ फाटइ लाग।

42तबबहिँ सिपाही लोग कैदियन क मारि डावइ क कुचाल रचेन ताकि ओहमाँ स कउनो भी तैरके बच न पावइ। 43मुला फऊजीनायक पौलुस क बचावा चाहत रहा, यह बरे उ ओनका ओनकइ कुचाल क पूर होइ स रोक दिहेस। उ हुकुम दिहेस कि जउन भी तैर सकत ही, उ पचे पहिले ही किनारे पहुँच जाई 44अउर बाकी मनई तखतम या जहाजे क दूसर टुकड़न क सहारे चला जाई। इ तरह हर एक सुरच्छा स किनारे आइ पहुँचा।

माल्टा द्वीप प पौलुस

28 इ सब कछू स सुरच्छा क साथ बच निकरे क पाछे हम सबन क पता लाग कि उ द्वीप क नाउँ माल्टा रहा। 2हुवाँ क मूल-निवासियन हमरे संग असाधारण रूप स नीक बियूहार किहेन। काहेकि जाड़ा रहा अउर बरखा होइ लाग, यह बरे उ पचे आगी बारेन अउर हम सबन क सुआगत किहेन। 3पौलुस लकड़ी क गठरा बनाएस अउर जब उ आगी प लकड़ियन क धरत रहा तबहिँ गर्मी लागे स एक बिख स भरा नाग बाहेर निकरा अउर उ ओकरे हाथ क डस लिहेस। 4हुवाँ क निवासी जब उ जंतु क ओकरे हाथ स लटकत भवा निहारेन तउ उ पचे आपुस मँ कहइ लागेन, “सचमुच ही इ मनई हत्तियारा अहइ। जदि अपि इ सागर स बचिके निकरा अहइ मुला दिब्व निआव* ऐँका जिअइ देत नाहीं बा।” 5मुला पौलुस उ नाग क आगी मँ ही पटकेस। पौलुस क कउने तरह क हानि नाहीं भइ। 6मनइयन सोचत रहेन कि उ या तउ सूजि जाइ या फिन बरबस धरती प भहराइ के मरि जाइ। मुला बहोत देर तलक जोहे क पाछे अउर लखिके ओका असाधारण रूप स कछू नाहीं भवा अहइ, उ पचे आपन बिचार बदल दिहेन अउर बोलेन, “इ तउ कइनो देवता अहइ!”

7उ ठउर क नगिचे ही उ द्वीप क प्रधान मनई पुबलियुस की खेत रहा। उ आपन घरे लइ जाइके हमार सुआगत-सत्कार किहेस। बड़ा खुला मन स तीन दिना तलक उ हमार मेहमानदारी करत रहा। 8पुबलियुस क बाप बिस्तर प ओलरा

निआव मनई सोचत रहेन कि निआव नाउँ क एक देवता होत रहा जउन खोट मनइयन क सजा देत रहा।

रहा। ओका बोखार अउर पेचिस होत रही। पौलुस ओसे भेंटइ भितरे गवा। फिन पराथना करइ क पाछे उ ओह पार आपन हाथ धरेस अउर उ नीक होइ गवा। 9इ घटना क बाद उ द्वीप क बाकी सबहिँ बेरमियन हुवाँ आएन अउर उ पचे नीक होइ गएन। 10कहइ उपहार स हमार मान बढ़ाएन अउर जब हम हुवाँ स नाउ प आगे चलेन तउ उ पचे सब जरूरी चीज क लइ आइके हमका दइ दिहेन।

पौलुस क रोम जाब

11तीन महीना पाछे सिकन्दरिया क एक जहाज स हम चल पड़ेन। इ द्वीप प जहाज जाड़ा भरे क बरे रूका जहाज क आगे क हीसा मँ जुड़वा भाइयन* क चीन्हा बना रहा। 12फिन हम पचे सरकुसा जाइ पहुँचेन जहाँ हम तीन दिना तलक ठहरेन। 13हुवाँ स जहाज स हम सबइ रेगियुम पहुँचेन अउर फिन अगले ही दिन दखिनाई हवा चली। तउ अगले दिन हम पुतियुली पहुँचेन। 14हुवाँ हमका कछू बंधु मिलेन अउर उ पचे हमका हुवाँ सात दिना ठहरइ क कहेन अउर इ तरह हम रोम पहुँचि आएन। 15जब हुवाँ क भाइ लोगन क हमार सूचना मिली तउ उ पचे अप्पियुस क बजार अउर तीन सराय* तलक हम पचन स भेंटइ आएन। पौलुस जब ओनका लखेस तु परमेस्सर क धन्यवाद दइके आपना दाढ़स बढ़ाएस।

पौलुस क रोम आउब

16जब हम सबइ रोम पहुँचेन तउ एक तु सिपाही क देखरेख मँ पौलुस क अपने आप अलग रहइ क अनुमति दीन्ह गइ।

17तीन बरिस पाछे पौलुस यहूदी नेतन क बोलाएस अउर ओनकइ बटुर जाए प उ ओनसे बोला, “भाइयो, चाहे मई आपन रास्ट्र या आपन पूर्वजन क व्यवस्था क खिलाफ कछू भी नाहीं किहेउँ ह, तउ भी यरूसलेम मँ मोका बंदी क रूप मँ रोमी लोगन क हवाले कइ दीन्ह गवा रहा। 18उ पचे मोर जाँच पड़ताल किहेन अउर मोका छोड़इ चाहेन काहेकि अइसा कछू मई किहेउँ ही नाहीं रहा जउन मउत क सजा क काबिल होत 19मुला जब यहूदी लोगन एतराज किहेन तउ मई कैसर स फिन बिचार करइ क पराथना करइ क बेबस होइ गएँ। यह बरे कि नाहीं कि मई आपन ही लोगन प कउनो दोख लगावइ चाहत रहेउँ। 20इहइ कारण अहइ जेहसे मइ तोहसे मिलइ अउर बातचीत करइ चाहत रहेउँ काहेकि इस्त्राएल क उ भरोसा ही बाटइ जेकरे कारण मई जंजीर मँ बंधा अहउँ।”

21यहूदी नेतन पौलुस स कहेन, “तोहरे बारे मँ यहूदिया स न तउ कउनो चिट्ठी ही मिली बाटइ, अउर न ही हुवाँ स आवइवाला कउनो भी भाई तोहार कइनो खबर दिहेन अउर तोहरे बारे मँ कउनो बुरी बात कहेस। 22मुला तोहार का

जुड़वा भाइयन यूनान क पुराण क देवता यानी केस्टर अउ पौलकस क मूरत।

तीन सराय दुइनुँ रोम क नगिचे क कस्बन क नाउँ अहइ। पहिला रोम स 27 मील प अउ दूसर 30 मील प रहा।

बिचार अहई, इ हम तोहसे सुनइ चाहित ह काहेकि हम जानित ह कि लोग सब कछू पंथ क खिलाफ बोलत रहत हीं।”

23तउ उ पचे ओकरे साथ एक दिन ठहराएन। अउर फिन जहाँ उ ठहरा रहा, बड़ी गनती में ओइके उ लोग बटुर गएन। मूसा क व्यवस्था अउर नबी लोगन क किताबन स ईसू क बारे में ओनका समझावइ क जतन करत भए उ परमेस्सर क राज्य क बारे में आपन साच्छी दिहेस अउर समुझाएस।

24उ जउन कछू कहे रहा, ओहसे कछू मिला तउ बात मान गएन मुला कछू बिसवास नाहीं किहेन। 25फिन आपुस में एक दूसर स असहमत होत भएन उ पचे हुवाँ स जाइ लागेन। तब पौलुस एक बात अउर कहेस, “यसायाह नबी क जरिया पवित्तर आतिमा तोहरे पूर्वजन स केतौना ठीक कहे रहा, 26‘जाइके इन लोगन स कहि द्या: तू पचे सुनब्या, पर न बुझब्या कबहुँ। लखत ही लखत बस तू रहब्या हज न बुझब्या कबहुँ भी।”

27काहेकि ऐनकइ हिरदय मूर्खपन स गवा भरि कान ऐनकइ मुस्किल स सुनत हीं अउर कइ लिहन मूँद आँखी आपन इ सबइ, काहेकि अइसा न होइ जाइ कि इ सबइ आँखीन स लखई, सुनई अउर कान स आपन अउर समुझई हिरदय में, लौटई साइद अउर करइ पड़ब मोका चंगा ओनका।”

यसायाह 6:9-10

28“यह बरे तोहका जान लेइ चाही कि परमेस्सर क इ उद्धार बिधर्मियन क लगे पठइ दीन्ह ग अहइ। उ पचे एँका सुनिहीं।” 29*

30हुआँ किराये क आपन मकान में पौलुस पूरा दुइ बरिस तलक ठहरा। जउन कउनो भी ओसे मिलइ आवत, उ ओकर सुआगत करत। 31उ परमेस्सर क राज्य क प्रचार करत रहत अउर पर्भू ईसू मसीह क बारे में उपदेस देत। उ इ कारज क पूरा बेडर होइके अउर बगरे कउनो बाधा क मानत भवा करत रहा।

पद 29 कछू यूनानी प्रतियन में पद 29 मिलत हय: “जब पौलुस इ बातन कहि चुका तउ आपुस में चर्चा परिचर्चा करत भए यहूदी हुवाँ स चला गएन।”